





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.116





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.116




Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.116




Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di Firenze.
CFMAGL 1.7.116


1.7.116




1.94.116











17. 116
41
IOANNIS NICOLAI
SAVLII CARREGAE
GENVENSIS

EPISTOLARVM
LIBRI TRES

POSTERIORES.


AD
PERILLVSTREM DOMINVM
D. LAURENTIVM
CENTVRIONEM.

IOANNIS IACOBI FILIVM.



GENVAE,
IN AEDIBVS IOSEPHI PAVONIS.
CID DC XIX.
SVPERIORVM PERMISSV.

P. Mart. P. de la Cour



AD
PERILLVSTREM
DOMINVM
D. LAURENTIVM
CENTVRIONEM
IO. IACOBI FILIVM.

ATINA lingua recte vten-
L tium, quod te non fugit,
Laurenti adolescens nobi-
lissime, mira semper pau-
citas fuit. Huius difficultatis causas
recensere apud te praesertim omni li-
berali doctrina politissimum laborem
duco superuacaneum. Illud potius di-
xerim Viros illos veluti quaedam huius
linguae tutelaria numina appellandos,
qui rem vtilem pariter, ac necessariam
si minus viventem omnino, spirantem
adhuc certe, depromptis ex ingenij of-
ficina vitalibus pharmacis fouent, &
conseruant. Quam quidem ad rem

* 2 quan-

quantum adiumenti attulerint Io. Nicolai Saulij Carregæ præclara monumenta, non meæ mediocritatis est iudicare. Standum potius arbitror eruditorum hominum testimonio, quorum serijs de hoc viro sermonibus cum ego sæpe interfuerim, hoc illi elogium impertitum audiui, vt dicerent recentem hunc scriptorem cum Tulliani æui scriptoribus dicendi elegantia comparandum. Quid ego commemorem quam mire, & vere extollerent tres eius Epistolarum libros quondam editos? Specimen eloquentiæ, ingenij, eruditionis, suauitatis, & leporis opus illud appellabant. Quamquam hæc laus nihil est præ illa laude, quæ luculentissimis tribuebatur epistolis, quas huius scriptoris industria deinceps elaborauit. Nam, siue ad amicos officiose scribat, vel rescribat; siue eorum immaturos obitus defleat; siue ad virtutem currenti calcaria, ad vitium precipitanti frænos adhibeat; siue me-

mo-

111
morabiles actiones ad imitandum de-
scribat; siue etiam suam ipsius men-
tem grauioribus studijs defessam hoc
alleuamento reficiat; quæ, aiebant, in
verbis puritas, proprietas, concinnitas;
quod in sententijs pondus, acumen,
decus desideratur? His ego clarissimis
vocibus impulsus eas ipsas epistolas di-
ligenter vndique conquisiui, conqui-
sitas in volumen redegi, typisq; impri-
mendas curauī. Dedita autem opera
effeci, vt in tres distributæ libros tres
itidem priores libros subsequerentur;
tum vt vtrumque opus, veluti amantis-
simi fratres eodem parente prognati,
alterum alteri auxilio foret; tum vt ex
illo ineuntis adolescentiæ, hoc matu-
rioris ætatis fœtu, quid absolutum
magis in dies hic fœcundus eloquentiæ
parens pepererit, dignoscatur. Vtrum
autem sincero, subtiliq; iudicio, an se-
cus, hæc ipsa scripta perpenderint viri
illi, quamuis probata omnibus eorum
eruditio, atque integritas omnem tol-
lat

lat dubitationem ; si quisquam tamen
est , qui recte examinare possit , tu is
profecto es, ornatissime Laurenti. quid
enim animo tuo candidius ? quod ge-
nus prudentiæ est , ad quod ingenij tui
aciem non exacuerit assidua intelligen-
di exercitatio ? Noui ego te , cui pro
summo munere datum a Deo est, vt in
eodem disciplinarum curriculo vna te-
cum longo licet interuallo ad metam
contenderem. Quid dixi, ego ? nouit
vniuersa fere Ciuitas , quæ ad te Philo-
sophicas theses publice defendentem
cum accurrisset , acerrimum Achillem
cum fortissimis bellatoribus dimican-
tem spectare sibi visa est , frequenti lit-
teratorum theatro , ipsisq; Societatis
Iesu Patribus studiorum tuorum signi-
feris, plaudentibus, obstupescantibus.
Enunciata sapienter, proposita virili-
ter, confirmata acriter, responsa acu-
te, distincta dilucide suspiciebant om-
nes. O fortunatum adolescentem, qui
quo tempore præmaturi flores videri
po-

14
potuissent, cum vix quartum, & decim-
um annum attingas, eo ipso fructus
edis tam maturos. Potuisses familię tuę
splendore contentus titulis, imperijs
clarissimę, procerum amicitijs, Princi-
pum cognationibus florentissimę, re-
rum gestarum gloria, nauata vel Reip.
vel summis Regibus militari opera ce-
leberrimę, otiosam, sed tamen hone-
stam ætatem traducere. Potuisses non
dubitanter dicere proauos, atauosque
tuos domi Reip. lumina, belli hostium
terrorem, Sacra toga Romanę aulę or-
namentum, litteris omnis doctrinę
Sacrarium, vita, & moribus sanctita-
tis normam, satis tibi, vnde merito
glorieris, reliquisse. Potuisses eiusdem
familię opes ostentare, quę opulentis-
simo Hispaniarum Regi grauissimis in
bellis, maximisq; rei nummarie diffi-
cultatibus opem sæpius attulere. Po-
tuisses postremo asserere, qui Christo-
phorum Centurionem auum habeat,
Io. IACOBVM parentem, Baptistas,
Phi-

Philippos, Adamos, Vincentios, Octa-
uios patruos, meritis in patriam insi-
gnes, virtutibus claros, factis inclitos,
pia liberalitate conspicuos, publica
munificentia vix imitabiles; qui deni-
que *MAGDALENAM SAVLIAM*
prisci exempli matronam, matrem na-
ctus sit, quæ Laurentium patrem Reip.
Ducem, Antonium patruum. S. R. E.
Cardinalem amplissimum simul vide-
rit; huic non esse obscuritatis tenebras
pertimescendas. Hæc, inquam, &
nulta præterea ad otij excusationem
occurrissent. Verum enimvero perfe-
ctæ nobilitatis lucem intuens, quæ non
auita decora per otium legendo, & præ-
dicando, sed per laborem æmulando,
eademq; peragendo comparatur, per-
spexisti maxima, splendidissimaq; in-
genia haudquaquam conquiescere,
donec, quorum progenies essent, eo-
rumdem imitatores egregij virtutes, &
facta vel æquarent, vel etiam peculia-
ribus sibi adiunctis insignibus, supera-
rent.

rent. Itaque Herculis ritu arduam virtutis semitam ingressus quos diurnos, nocturnosque labores non sustines, ut quotidie longius progrediaris? nec vero ceteros solum, sed te ipsum, sed ætatem præcurris; eaque iacis fundamenta rerum per te gerendarum, ut nemo vnquam paratior, alacrior, vigilantior ad gloriam capeßendam accessisse videatur. Testis est tua in animi prauitatibus profligandis vigilantia. testis pie viuendi, quam sequeris, domestica Parentum disciplina. testis vox vniuersæ Ciuitatis, quæ te vnum admiratur, vnum celebrat, vnum liberis suis præclarissimum ingenui pudoris, singularis humanitatis, probitatis integerrimæ, inaudite modestiæ, & temperantiæ proponit. Cum igitur pulcherrimam virtutis formam dictis, factis, vita, moribus præteferas; quisquam dubitabit, quin tu ad omnia summa natus famę eternitatem sis consecuturus? eia age, clarissime adolescens, perge conficere

✱ ✱

iter,

iter, quod instituisti; auge parentes voluptate, Domum gloria, patriam praesidio, ciues spe, equales exemplo, bonos gaudio, te ipsum laude immortalis; & hos ipsos epistolarum libros, quos non aliam ob causam, nisi ut aliquod exstaret meae in te obseruantiae argumentum, tibi quolibet amplissimo munere dignissimo, litteratorum hominum amantissimo, ipsiusque Latinae linguae studiosissimo ausus sum consecrare, qua soles animi altitudine excipe, & tuere. Dat. Genuae. Sexto Nonas Quinct. Visitationi B. Mariae Virginis Sacro. CIO IO C XIX.

Perillustri Dominationi tuae

Addictissimus

Antonius Paretus.

VI

IN LAVDEM
PERILLVSTRIS
DOMINI
D. LAVRENTII
CENTVRIONIS

ADMODYM. R. P. D. MARCELLINI
SANTAGATHAE,
CLERICI REGVLARIS.

*ARTIVM centumpuer, alme LAVRENS,
Cana quem virtus teneris sub annis
Neflorem clamat, meritumq̃ seclis*

Viueret centum.

*Quod damus gazæ latialis aurum,
Sis licet diues, triplicem libellum
Iure sed munus tibi dedicatum*

Sume, precamur.

*Scilicet fuluo velut hic metallo
Gemmulis texto Ciceronis aureus
Pranitet sermo, litus ingeniq̃*



2

Lu-

Lumine crebro.

Hic Soror duplex sociata cultæ
Fundit Aglaia pluuiam leporum;
Nec deest illis patris orta quondam

Diua cerebro.

Parua sint hæc, ni pietas loquelæ
Iuncta sit flagrans Stylus intumescit
Vanus ampullis, pia corda quem non,

Linguaq; formant.

Feruet hac author, liber, ordo feruet
Hac & authoris, sibi certus unde
Trames, & vitæ patuit fruendæ

Norma Beatæ.

Hac tuum, LAURENS celebrande, pectus
Fulget, ac feruet, iuuenile quamuis.
Hac senex tandem stabili viresces

Vsque iuuenta.

Te triplex nexus fouet, ambit, arcto &
Stringit amplexu Charitum; decebat
Te triplex ergo Charitum refertus

Arte libellus.

AD-

ADMODVM. R. P. D. CONSTANTINI
DE RVBEIS CLERICI REGVLARIS
CONGREGATIONIS SOMASCHAE.

*FLAMINA non centum pauitat, non fulmina
centum*

Nescia centeno laurus ab axe peti.

*Et tua, LAVRENTI, centum cui tegmina, Virtus
Unica centenae ridet ubiq^{ue} vices.*

*I sexcenta liber victurus saecula sub umbram
Lauri. Non alibi viuere plura potes.*

EIVSDEM AD LECTOREM.

*HIC liber fauus est. Apis PARETVS
Congerens simul atticos lepores.*

SAVLIVS rosa, sugit vndemella.

Sedulus magis est tamen PARETVS

Hyblæis apibus. Volant per hortos

Ille, & multiplici sedent lygustro,

Componuntq^{ue} fauos, PARETVS vna

Ex rosa latios legit lepores,

Componitq^{ue} fauum. Potire, lector,

Et multas age gratias PARETO.

IN-

INNOMINATI.

EMICAT humana maior tibi gratia vultu ,
Dum loqueris, Diuum vernat in ore melos .
Aligeros castis, LAURENTI, moribus equas ,
Humanum pectus cœlica sensa tenent.
Nescio quis tacito e vulgo secum ore volutat :
Nihic degas, vnum quis neget e superis ?

Eiusdem .

NOBILE stemma avidus tacita sub mente re-
uoluo :
Luminibusque vrsus conspiciendus adest.
Unguibus illerosam stringit, num gaudet odore ?
Cum letus patulis naribus admoueat ?
Tu rosa verna micas septus virtutis odore
LAURENTI, inque vrsi deligis esse manu.
Ut si impura rosam contendat carpere dextra,
Ultrices vrsi sentiat illa manus.

Eiusdem.

INFINITA foret, si nescia Musa decores,
Et laudes vellet concelebrare tuas.
Aequoris immensi potius numerentur arena,
Non vastum Oceanum paruula fossa capit.
Es

Es Decus ipse tuæ, LAVRENTI, & gloria gentis,
 Ad te hominum gratus mentem, animosq; trahis
 Sunt tibi perfaciles mores, pietate renides,
 Exprimis & sacrae religionis opus.
 Præcellit niuei diuina modestia vultus,
 Diuinum vibrant lumina casta iubar.
 Angelicos castis oculis imitaris ocellos,
 Ex alto lapsus ducere esse Polo.
 Gratia te gratum facit, imperiosa verendum
 Maiestas, gratis luminibusq; micans.
 Exiguo quanta est regnat quæ in pectore virtus?
 Alter Alexander corpore paruus ades.
 Tu Sophiæ campus, cedit tibi sceptra Minerua,
 Vel certe genitum quis neget esse Dea?
 Ingeniosa audit tua qui responsa; stupore
 Carpitur, attonitus fingere verba nequit.
 Insurgit, faciles præbes, LAVRENTIVS, aures,
 Proponit, soluis, quæq; cadunt dubia.
 Ingenium celebras pugnantum, & laudibus omnes
 Te extollunt, audis quantus es ingenio.
 In circum dubius si fors accesserit; ille
 Te duce continuo certus abire potest.
 Mirantur similes ausus iuuenesq; senesq;,
 Ingens Doctores vel stupor ossa capit.
 Dum propugnator, Sophiæq; acerrimus auctor,
 Ingeniusq; artis cultor es ingenuæ.
 Qui tibi nobilium applausus spectante corona,
 Au-

Auribus & suavis personat aura tuis?
Nouimus ingenuas artes, Sophiamq; renasci
Te duce. iam Sophiæ lætaq; prata virent.
Non est, cur referant laudes monumenta tuorum,
Laus tua materies fertilis historia.
Purpuream te, Stemma, rosam virtutis odore
Non miror ludo quod super imposuit.
Fortuna varios lusus nam spernis: honores
Quotquot, LAVRE, optas & decus omne tuum
Te iuuenem matura senem prudentia fecit, (est.
Corpore qui luuenis, mente, animoq; Vires.
Purpureum diadema caput decorare luuentæ
Iam potis est; tantum natus ad imperium es.
Stemmatibus ipsa tui Rosa sertum hoc forte precatur,
Purpureumq; tibi vaticinata notat.
Maeste animo hæc regnat tenero si in pectore Virtus,
Virtus robusti quanta futura senis?

IN

IN LAVDEM
IOANNIS NICOLAI
SAVLII CARREGAE
ADMODVM REVERENDI
P. HIERONYMI PETRVCCII
E SOCIETATE IESV.

*SCRIBIT funera SAVLIVS suorum,
Scribit funera: non tamen susurros
Echrusco levis ore murmurillat;
Ore sed latio, & dolore vero,
Et docta lacrima irrigat sepulchrum,
Queis in astra reducit, & nigranti
Orco SAVLIVS invidet sepultos.
Sic vitam peperit dolor. Dolor
Quid hoc letius, aut magis beatum est?*

ADMODVM REVERENDI
P. ANDREÆ BLANCI
E SOCIETATE IESV.

*QVOD loqueris bene, quod doctæ facundia lin-
Aemula Romana dicitur esse togæ; (guæ
Magnus es, & gaudes excelsò nomine, SAVLI,
*** Et*

*Et patriæ, & sæcli gloria magna tui.
Quod verò in claustris tam sancta silentia seruas,
Arcanisque potes cultor adesse sacris.
Tullius hoc cedit, cui sic tacuisse fuisset
Utilius multo, quàm bene multa loqui.*

ANDREAE DE BENEDICTIS.

*Contigit eloquij primo cui dicier almi
Princeps Romani, Tullius antè fuit:
Cui tua voluntur nunc culta volumina, Sauli,
Diceris altiloquo, non Cicerone minor.
Ergo pares; vel ille minor, quem lingua peremit,
Dum uti felici nescijt eloquio.*

IN-

I N D E X.

ALBERTO Magno.	133.
Alexandro, & Augustino Genuensibus.	37.
Augustinus Genuensis Io. Nicolao Saulio Carre-	
gæ.	40.
Andreas de Benedictis Io. Nicolao Saulio Carre-	
gæ.	136.
Andreas de Benedictis.	137.
Ansaldo Cebà.	57.
Antonio Saulio Cardinali Amplissimo.	95.
Auberto Miræo.	13.
Aubertus Miræus Io. Nicolao Saulio Carregæ.	17.
Augustino a Sancto Gregorio.	93.
BERNARDO Castello.	140.
CAMILLO & Alexandro Pallauicinis.	118.
DOMINICO Stotio.	67.
Dominicus Stotius Io. Nicolao Saulio Carregæ.	65
69.	
FABIANO Frauegæ.	115.
Francisco Mariæ Genuensi.	73.
Fulgentio Baldano.	49.
Fulgentius Baldanus Io. Nicolao Saulio Carregæ.	51.
GREGORIUS Bertolottus Io. Nicolao Saulio	
Carregæ.	104.
Gregorio Bertolotto.	106.
IACOBO, & Ioanni Francisco Tiscornia.	21.
Iacobus Monelia Io. Nicolao Saulio Carregæ.	99.
Ioannes Dominicus Monelia Io. Nicolao Saulio	
Carregæ.	101.
Iacobo, & Ioanni Dominico Monelijs.	102.
Iacobo Lambertengo.	108.
✱ ✱ ✱ 2	Ioanni

Ioanni Baptista Caluo.	121.
Ioanni Baptista Forzano.	27.
Ioanni Baptista Ponte.	111.
Ioanni Francisco Baldo.	127.
Ioanni Mariae Brasichellensi.	6.
Iosepho Araldo.	76.
Iulio Cæsari Ioannino.	131.
LAURENTIO Raggio.	145.
Lauro Cataneo.	40.
Laurus Cataneus Io. Nicolao Saulio Carregæ.	44.
Ludouico Saulio.	31.54.
Ludouicus Saulius Io. Nicolao Saulio Carregæ.	52
MARCO Riuarolæ.	8.
PAVLO Moneliæ.	35.
SCIPIONI ex Condominis Cellæ.	23.
Stephano Spinulæ.	1.
THADÆO Riccio.	86.
Thadæus Riccius Io. Nicolao Saulio Carregæ.	91.
*. 4. *. 83.	
Lettera volgare a Gio. Battista Castello.	146.

Errata

Errata

Correcta.

XI

Pag. 5.	fanguinis	fanguinis
6.	desiderio	desiderio
25.	reprehensionem	reprehensionum
26.	esse	esse
30.	expressa	expressa
33.	amant	amant
38.	illud	illud
38.	it	at
41.	& virum	te virum
51.	arctissime	arctissime
52.	operatus	operosus
51.	tū in me meritis tuis impulsū.	tum meritis in me tuis impulsū
63.	utinam & ad eum	utinam ad eum
69.	ex longo somno	ex longo somno
73.	qui mœrore vngendi	qui mœrore vngendi
79.	doctrina	doctrina
109.	non profecto	nos profecto
114.	ut omnium fraudes	ut omnium fraudes
124.	indiligentia	indigentia
126.	utilitati	utilitati
131.	Vale.	Vale. Genuc. XVI. Kal. Feb. 1638.
131.	effigium	effigiem
138.	& non tam graue esset	at non tam graue esset
142.	in morte Clorindæ	in Clorindæ morte

Nella Volgare.

130. i sacri misteri della fede

i sacri misteri della nostra Fede.


De

DE Mandato Admodum Reuerendi Patris Inquisi-
toris Generalis Genuæ vidi has epistolas D. Ioan-
nis Nicolai Saulij Carregæ, necquidquam in eis con-
tra fidem, aut bonos mores reperi.

Iacobus Lambertengus Societatis Iesu.

Imprimatur.

Fr. Camillus Oleuanus, Vic. Sancti Offitij Genuæ.



XIII

IOANNIS NICOLAI
SAVLII CARREGAE
GENVENSIS.

EPISTOLARVM
LIBER QVARTVS.

ADMODVM ILLVSTRI,
ET REVERENDISSIMO
DOMINO,
D. STEPHANO SPINVLAE,
INTEMELIENSIVM
EPISCOPO.

INTEMELIVM.

S I TEMPVS spectetur, sero quidem tibi
gratulor de dignitate tua: si ea vero, quæ
postea consecuta sunt, opportunius certè ce-
teris omnibus, qui hoc officium iam præsti-
terunt. Siquidem illi tibi gratulabantur, quod eum te
virum futurum sperabant, qui satis huic tibi deman-
dato muneri egregie faceres: at ego, quòd omnium,
de te pridem conceptæ spei respondeas, quòdque huic
dignitati parem virtutem in te inesse ostendas. Ita-
que quanto præterita futuris certiora sunt; quanto res
ipsa spe laudabilior est; tanto mea verior, ac maior gra-
tulatio est. Neque vero, qualem nunc dignitatem ade-
ptus

plus sis, tantummodo considero; sed etiam (quæ tibi de hominibus bene merendi cupidissimo facultas conceditur) qui fructus ad Intemeliensem populum, quique ad Christianam Rempub. ex industria tua perueniant, atque adeo peruenturi sint. Nam, cum vidisses duas esse hominibus in Cælum vias; alteram in hac communitate vitæ, alteram in aliqua religiosa familia separatim degentibus; ab illa periculosa deflectens, & hanc tutiorem ingressus, in Clericorum Regularium Sodalitatem nomen dedisti. Sed, cum locus ille angustior esset, quam ut in eo te totum ad communem utilitatem posses conuertere; alium tibi ampliorem, & patientiorem dari voluit Deus ille, qui res omnes æterna administrat providentia. Mouit itaque Clementis VIII. Pontificis Optimi, ac Sapientissimi mentem, ut, cum peritissimos Viros tanquam Sacrosanctæ Operæ Vicarios undique sibi adiungat, te in Ecclesia Intemelienfi Domini vineæ cultorem destinaret; quo, ex animis hominum eradicatis vitijs, in eos virtutis semen, probitatisque spargeret, & illud ad optimas fruges in Ecclesiæ horreum importandas educeres. Cuius rei nuncius huic Ciuitati gratissimus accidit, quæ te absentem ut Patrem, Pastoremque coluit, ea manibus, & oculis deprehendere cupiens, quæ iam de virtute tua sperabat, ac ipsa sibi tacita cogitatione pollicebatur. Itaque nihil prius habuisti, quam ut ad carissimam filiam tuam te conferres, & ad Gregis tui salutem præsens incumberes. Qui dies quanto eidem Ciuitati clarior illuxit? quanta letitia exceptus es? quanta omnium expectatione? cui quidem non modo respondisti, sed etiam doctrina, & vitæ sanctitate eam superasti. Quarum altera quanta sit virtutis pulchritudo ostendit.

dis; altera vero ad eam toto pectore amplexandam homines impellis: adeo ut, non solum id, quod prudenter ais, te bene dicere indicet, sed etiam, quod pie agis, te sanctè viuere testetur. Nulla enim cura te magis sollicitat, quam ut homines à vitijis deterreas, & ad optimam frugem inuites. Idque ut assequaris, nullos labores recusas: qui sanè leues tibi videntur, quia vehemēti in omnes amore incensus es. Amore enim potius, quam metu homines tibi faciles, ac beneuolos reddis; ijsque moderatè imperas, quia iampridem te ipsum regere, & alijs parere didicisti. Multa prudenter inuenis, quæ alij non excogitarunt. ades sacras, vel nouas facis, vel veteres restituis. Et quamuis animarum cura difficilis sit, & graue Episcopi munus videatur: te tamen nihil impedit, quo minus illam egregiè sustineas, hoc verò perfectè exequaris, atque obeas. Quibus quidem bonis Diœcesis ista non ita fruitur, ut non eorum quoque vniuersa Ecclesia particeps fiat. Nam, cum te in excolendis animis tam diligentem ceteri videant, imitationis studio inflammantur: efficiturque, ut cum singulae partes præclarè se habeant, totum Ecclesiæ corpus longe firmissimum, & pulcherrimum sit. Te felicem, atque beatum, qui non modo veræ salutis iter ingressus es, sed hoc ipsum alios doces, & exemplo magnopere adiuuas. Hinc Deus Optimus Max. pietatem tuam, ac optimam mentem gratissimam habet; & egregios tuos conatus ad optatum exitum perducit. Nos certè eum precamur, ut tibi diurnam vitam concedat; nec prius suorum in numerum te recipiat, quam, omnibus & pij hominis, & Optimi Pastoris officijs impletis, commissoque Grege in Cælestia Pascua introducto, Ecclesiam ita constitutam videas, ut

unus Pastor unum regat Ouile. Vale Genua. Ex Vi-
larijs xiiij. Kal. Iulij. CIO. IO. CIIII.

*

GRATISSIMVS mihi fuit Horatij nostri ad-
uentus: litteras enim tuas, librumque attulit; dixitque
te ex isto amœnissimo secessu tantam voluptatem capere,
ut præ ea Reges, & Regum amicos contemnas. Te sa-
pientem existimo, qui ex his urbanis, molestisque nego-
tijs ad iucundissima ruris otia te contulisti. Quod ego
quoque libenter facerem, nisi eisdem negotijs eo magis
implicarer, quo me magis ex ijs studeo explicare. Sed
spero fore, ut aliquando solutus, ac liber, tibi ut arcto
amore, ita domestica consuetudine coniunctus una te-
cum suauiter viuam. Quod autem ad librum attinet,
tametsi non facile adducor, ut de aliorum scriptis iudi-
cium faciam: quia tamen id te vehementer cupere vi-
deo, quid de illo sentiam, ut soleo, liberè dicam. Dicendi
genus secutus es graue, & elegans, & quod cum rebus
ipsis valde consentiat; idque varijs facetijs condiuisti,
ut animus serijs legendis rebus defessus iocosis recreetur,
& conquiescat. Ordinem præterea tenuisti planè admi-
rabilem; quem quidem ego tanti facio, ut sine eo quem
nobis in scribendo finem proponimus, nunquam nos con-
secuturos existinem. Hæc omnia magnopere mihi pro-
bantur: argumentum nullo modo. Itaque, si tanta te
scribendi cupiditas tenet, ut nullo modo quiescere possis,
aliam materiam, ut arripas, ubi vim ingenij tui osten-
das, te magnopere hortor. Cur potius ea non colligis, quæ
in Ciuitate nostra laudabilia sunt, quæque certè, ni fal-
lor,

lor. potissima causa fuerunt cur eam Deus ab imminen-
tibus periculis sepiſſimè liberauerit & liberè loquar pro
vetere nostra neceſſitudine : huiusce libri argumento ani-
mi maleuolentiae veneno suffuſi non leue ſignum dediſti .
Quam quidem maleuolentiam quamuis charitatis ſpe-
cie celare ſtudeas : animum tamen ipſum eam prodentem
celare non potes . Iam vero quis non etiam illud repre-
hendat , quod , cum multas claras , egregiasque virtutes
libro tuo inferueris , eorum , quorum illae ſunt , nomina
ſubticere non dubitaſti , ſpatiumque inane reliquiſti ? Sa-
tius erat te utrumque tollere , ne vlla vel nominis , vel
laudationis veſtigia apparerent . Quae ad hunc librum
pertinere intelligo , liberè , ut promiſeram , omnia dixi .
Quod ſi paulo fortaffe , quam velles , breuior fui , occu-
pationes , quibus diſtineor , me facile excuſant . Venio
nunc ad extremam epiſtolae tuae partem , quae mihi dolo-
ris tantum attulit , quantum animus vix capere poteſt .
Scribis enim te Patria cedere , & parentes , atque amicos
relinquere decreuiſſe . Ergo ita ferreus eris , ut ab ijs te
rebus diſiungas , quibuſcum natura ipſa te tam valde
coniunxit ? ubi humanitas , ubi ſanguinis communio ?
an iuſta profectionis cauſa ea tibi eſſe videtur , quam in
tuis litteris mihi attuliſti ? illi enim , quos mihi narras ,
tantum abeſt , ut impedimento ſint , quominus inter tuos
promeritum locum obtineas ; ut eos non pluris facere de-
beas , quam ſi nuſquam nati eſſent . Neque , ſi alia loca
petieris , tibi hac in re benigniore fortuna uti contigerit ;
cum maxima huiusmodi hominum multitudo ubique re-
periatur . Quamobrem huius profectionis conſilium de-
pone ; & eos timere deſine , qui , dum alijs nocere ſtudent ,
illis potius prodeſſe , & ſibi obeſſe ſolent . Multa ſunt , quae
te non

te non modo in Ciuitate retinere, sed etiam consolari magnopere debent: quorum illa non in postremis, quod nobilissima familia natus sis; quod doctissimorum virorum amicitia floreas; & aeternis famæ monumentis nomen tuum ita inserueris, ut ex ijs nullo vnquam tempore auulsum iri videatur. Non enim tam mala, quæ patimur, quam bona, quæ sumus adepti, nobis considerata sunt. Quin altera alteris temperantes ita malorum acerbicatem, iucunditatemque bonorum mitigare debemus, ut in aduersis animo erecto, in prosperis vero moderato esse possimus. Quanquam nulla res esse debet, quæ nos magis consoletur, ac recreet, quam spes illa fore, ut omnibus omnia terminet mors. quæ idcirco maximè nobis expetenda est, eaque præclaris ante factis illustranda, ut si in hac peregrinatione ab hominibus vexati inter ærumnas viximus; in illa Cælesti Patria à Deo Optimo Max. amplissimis præmijs decorati, aeterna perfruamur felicitate. Vale.

AD MODVM ILLVSTRI,
ET REVERENDISSIMO
DOMINO,
D. IO. MARIAE BRASICHELLENSI
SACRI PALATII MAGISTRO,
NUNC EPISCOPO POLINIANENSI
DIGNISSIMO.

Romam.

SUMMA Dei potentia cum in alijs rebus, tum in Ecclesia sua gubernanda maximè elucet. Nam quamuis

uis illa multis, velut nauis, tempestatibus iactetur: tamen, ipso Deo Duce, nullum periculum pertimescit. qui nunc illi Rectorem dedit Paulum V. Pont. Max. cuius prudentia fore confidimus, ut non modo, quæ ab alijs rectè excogitata sunt, diligenter seruentur; sed noua etiam multa ad publicam tranquillitatem pertinentia, inueniantur. In ijs vero, quæ iam optimè constituta sunt, illud, quod ad libros retinendos, vel reijciendos spectat, tanti ponderis, & momenti esse existimo, ut eo magna ex parte Fides Catholica mihi stare videatur. Itaque cum Marci Antonij Flaminij scripta ita mihi placeant, ut citius mors vitæ meæ, quam ego mihi ea legendi, atque admirandi finem facturum sim; diligenter exquirere volui, utrum illius in Psalmos paraphrases Ecclesia probet; ut ex illo perenni fonte voluptatem nulla re conturbatam, sed puriorem in dies, sincerioresque hauriam. Admodum R. P. F. Ioannes Baptista Penna, qui sibi commissas Catholicæ Fidei habenas tanta prudentia moderatur, ut nescias, seuerior ne, an humanior sit, omnes Flaminij Paraphrases ex ijs esse, quæ legere prohibemur, affirmavit. Cui quidem Patri pietate, & doctrina præstanti, in his rebus, quæ ad Fidem nostram pertinent, fidem non habere nefas esse ducerem. Sed cum ex pijs, doctisque Viris alios esse videam, qui omnes Flaminij paraphrases libere legant, alios vero, qui eas solum interdictas existiment, quas soluta perscripsit oratione: hinc mihi scrupulus iniectus est maior, quem mihi ex animo euelli magnopere cupio. Quæ quidem in re tu me iuuare facile poteris, cum in ea maximè cura verseris, ne liber ullus, qui prauam doctrinam contineat, imprimatur. Hinc perfecta illa sacrarum litterarum, Phi-

losa-

loſophiaeque cognitio, qua maximè excellis, perfectum finem conſequitur; cum ea in vnius Dei gloriam, hominumque utilitatem redundet. In quibus omnes, qui de Catholica Religione optimè ſentiunt, ac bene de ea mereri cupiunt, plurimum ſe tibi debere, fateantur neceſſe eſt; cum operam tuam ipſi Deo gratam, hominibus vero ſalutarem eſſe perſpiciant. Ego vero, qui ex eo numero me eſſe profiteor, magno me beneficio affectum putabo; ſi, quod ad Flaminij ſcripta attinet, omni me moleſtia liberaueris. Nec enim nos ſibi quiſquam magis deuinxerit, quam ſi nobis aliqua de re dubitantibus veritatem patefecerit: nec in rebus ad noſtram ſalutem pertinentibus nimis diligentes nos quiſquam eſſe dixerit. Et hoc ſaltem nomine ſpero fore, vt hoc meum ſcribendi conſilium in optimam partem accipias; mihiſque ignoſcas, ſi à te beneficium ante petierim, quàm ullum præceſſerit meritum. Pro quo beneficium operam dabo, vt parem tibi reſeram gratiam; ſin minus id conſequar, vt illud ſaltem, quoad viuam, memoria tuear. Vale Genua. Quinto Idus Sept. CIO. ID. CV.

ADMOD. ILLVSTRI, ET REVERENDISS.
D.D. Marco Riuarolæ. I. V. D.

MAGNA vis amoris, quem peperit virtus. id ego maximè expertus ſum ex eo tempore, quo multa in te ipſo eſſe cognoui, quæ te amabilem omnibus redderent ijs enim ad te amandum, atque colendum ita impuſus ſum; meæque in te voluntatis declarandæ tanto deſiderio ſum incenſus; vt id facere tandiu cum diſtulerim; nunc me ad illud exequendum multo magis, quàm antea inflammari

mari sentiam. Itaque cum antea satis, superque habuissem, si huius meae in te voluntatis aliquam tibi tantummodo significationem dedissem; nunc eo minimè contentus eam ceteris omnibus notam esse, mirum, quantum cupio. nimirum illos animi affectus libenter sequimur, quos in nobis natura ingenerauit: in quibus maximè insunt varietates, cum alios ad alia ipsa natura finxerit propiores. ac illa mihi cum propensionem quandam dederit ad homines colendos, atque obseruandos, qui aliqua virtute præditi sunt; quo me ipsa propensio ducit, eo tam libenter sequor, ut eam mihi, quoad vixero, numquam ereptum iri confidam. cum igitur talis meus erga illos animus sit, atque sensus; qualis erga te esse debet, qui omnium virtutum ornamentis abundas? eximia vitæ probitas, singularis doctrina cum pari humanitate coniuncta, summa pietas, ac religio, & cetera omnia, quæ in homine sacris initiato maximè requiruntur; illa sunt, quibus omnium voluntates mirum in modum tibi concilias. ijs accedit illa vultus, orisque dignitas, quæ amabili quadam grauitate insignita certissimus nobilitatis index est. Sed eam lubens omitto, cum his corporis bonis instendum non sit, & animi bona undique se offerant, quæ ad maiora ultra nos vocant. etsi non ignoro pulcherrimo corporis domicilio pulcherrimam animam contineri; & pretiosam aliquam gemmam nouo auri splendore fulgentem gratiori aspectu ad se ipsam contemplandam homines allicere. ut mirum non sit, si apud quosdam Indiarum populos in summi Regis electione pulchritudo corporis, atque proceritas tantummodo valuerit. ex ijs, quæ dixi, facile conijcere possumus, à quibus parentibus natus, & educatus fueris; ab illis scilicet, quibus vnum hoc studium

B fuit

fuit ita te instituere, ut aliquando inter aequales doctrina, & pietate floreres; Familia vero, ac Patriæ decori esses, & ornamento. quippe qui probè norant educationem tanti esse, ut qualis illa fuerit, talem totam vitam futuram; & ingenuos adolescentes excellenti ingenio præditos, si benè educati, instituti quæ fuerint, optimos fieri animaduverterent. itaque maxima quæque à te expectabant; nec eorum expectationem sefellit euentus. nam crescente ætate, crescebat & virtus; & à sequentibus priora vincebantur. Cum autem ad maturiorem ætatem peruenisses, & fieri non posse perspiceres, ut quis Deum ex animo diligat, nisi hoc sæculum odio habeat; huic tu libenter renunciaſti, Sacrisque addictus te illi totum deuouisti. ac tibi primum, deinde alijs prodesse cupiens eam vitæ rationem ingressus es, qua utrique simul rei satis te melius facturum existiſtaſti. in quo te summis laudibus efferendum censuerim: quemadmodum militem strenuum illum non duxerim, qui dum alij præliantur, ipse prælio omnino se subtrahat: nec peritum nauis rectorem illum, qui, dum alij in altum prouecti tempeſtatibus iactantur, ipse salutis suæ tantummodo prospiciens in portu se contineat. verum cum sine litterarum præsidio, quod animo statueras, perfici nō posse arbitrare, in celeberrimis Italiane Gymnasijs ita optimis artibus, & studijs operam dedisti, ut singularem Vtriusque Iuris cognitionem adeptus meritis insignibus decoratus sis. cum autem illa, quæ iam didiceras, & faciebas, tempus esse tibi videretur, ut alijs imitanda proponeres, & non tam exemplo, quàm oratione nobis consuleres; ad concionandi munus alacriter accessisti. in quo ita te gerebas, ut conciones tuas non inanis hominum fama, sed peccatorum pœnitentia, & emendatio

tio consequeretur. id verum esse fidem faciunt ij, qui te
 saepe concionantem attentis animis audierunt. mihi qui-
 dem hac in re desiderium vt explerem, nunquam conti-
 git: illi tamen aliqua ex parte satisfeci, cum te saepe in Ca-
 thedrali Ecclesia, magna Cleri parte adstante, de illa
 Theologiae parte, quae ad mores pertinet, differentem audi-
 uerim. cuius quidem Ecclesiae Canonicus iam factus eras,
 & in illud Collegium cooptatus tanquam praeclarum ali-
 quod lumen ceteris omnibus praecebas. Hic honoris gra-
 dus optabilis est. sed cum in eo campus esset exercendae
 charitatis angustior, quam voluisses; Deus Optimus
 Max. qui pijs desiderijs fauet, alium animo, virtutiq;
 tuae latiore, vberioreque obtulit. Itaque D. Mariae
 Gratiarum Ecclesiae praepositus es, vt qui vitam, mores-
 que tuos virtutis regula semper direxeris, aliorum quoq;
 vitam, & mores moderandos susciperes. hac tibi cura im-
 posita alacriter suscepta, primum Ecclesiam ipsam ita in-
 staurandam, exornandamque curasti, vt illius nunc alia
 forma, aliaque facies sit; & letetur quodammodo, atque
 exultet, quod varijs picturis praefulgeat; quod verè do-
 mus Dei aliquando esse coeperit. in eam deinde curam ve-
 hementer incumbis, vt omnia ritè prouisa, comparataq;
 sint, quibus Dei cultus, & honor maximè augetur. hinc
 summa religione, ac pietate tum Sacra peragi, et Diuina
 Officia celebrari, tum Confessiones audiri, & Sacramen-
 ta administrari videmus. & in ijs exequendis cum cete-
 ros Christi fideles, tum commissum tibi Gregem praecipue
 spectas. cuius saluti procurandae cum postremo te totum
 tradideris, nullum laborem recusas, vt eum à luporum
 incurfibus, & rapinis defendas; & saluum, atque inco-
 lumem ad caelestia pascua perducas. quin etiam, si acci-

deret, ut opus esset, pro eo vel ipsam vitam libenter pro-
funderes. Sicque Optimi Pastoris munus, atque officium
perfectè cum expleas aliè exemplo excitantur, teque quo-
uis honore dignissimum iudicant. quod si fortasse ex oui-
bus tuis pestilentem peccati luem aliqua contraxerit; tan-
ta humanitate ad eam sanandam, atque demulcendam
accurris, ut illa se tibi libenter committat, & ad inte-
gram sanitatem facile reuocetur. nihil profecto quid-
quam est, quod hominem homini melius commendet,
quàm clementia, atque humanitas. non igitur mirum, si
hanc ipsam D. Mariæ Gratiarum adem homines fre-
quentant, cum & loci celebritas, & propinquitas maris
eos inuitet; cum tua singularis humanitas, & suauitas
morum vehementer alliciat; & hoc ipsum Gratiarum
nomen magnam eis spem afferat fore, ut, quod optant,
assequantur: cum hic præterea orationes suas, & preces
eo libentius fundant, quo plura videant; quibus ad om-
nem sanctitatem maximè excitentur. in hac enim Ec-
clesia per quadraginta dies, qui à partu Virginis usque
ad eiusdem Purificationem numerantur, Iesu Christi
Saluatoris nostri Natalis piè, sanctèque colitur. Hic Di-
ui Blasij, & Sanctorum Nazarij, & Celsi solemni ritu
dies Festi celebrantur. hic pia Cacorum Societas Sacel-
lum sibi statuit, in quo Diuinum Numen adoret, pre-
cibusque propitiet. Sed hic alia multa fiunt, quæ cum
oculis omnium pateant, mea, aut cuiusquam commemo-
ratione non indigent. Ego certè nemini concedo, qui hanc
Sacram Aedem frequentius adeat, maioremque ex ea
fructum percipiat. quin etiam in ipsa angulum mihi dari
exopto, in quo post multos labores, atque ærumnas, hoc
miserum iaceat corpus. nam præter meam in Deiparam
Virginem

Virginem maximè propensam voluntatem, tua singularis erga me beneuolentia me facile attrahit; cuius mihi præclaras dedisti significationes, cum meosæpè rogatu in honorem huius Beatissimæ Virginis, Deo Opt. Max. Sacrificium obtuleris; ut vel ex eo facile cognosci potuerit, hoc tibi natura insitum esse, alios ut adiuues quòd cum facias, non inani te gloria effers, aut humanas laudes, & præmia curas; cum alterum planè respuat vitæ integritas, alterum charitas christiana: cum denique tam exiguos fines haud tibi constituas, ultra quos progredi possis; sed eum finem propositum habeas, ad quem quisquis peruenierit, tanquam in itineris termino acquiescit. Deum scilicet solum spectas, solum intueris; & in eo spes omnes tuas sitas, & collocatas habes: cum existimes ceteras virtutes debiles esse, atque infirmas, nisi pietate in Deum, tanquam stabili fundamento nitantur. qui quidem, cum videat te in Vineâ sua tam sedulo laborantem, tibi in hac vita præsto semper aderit; in altera vero ea præmia dabit, quæ ijs promisit, qui talentum sibi creditum perire non siuerint, sed ea, quæ optima sunt, & fecerint, & docuerint. Vale. Genua, ex ædibus. Tertio Idus Decemb. CIO. IO. CV.

ADMOD. ILLVSTRI, ET REVERENDO DD.
AVBERTO MIRÆO CANONICO
ANTVERPIENSI.

Antuerpiam.

VETVS hæc mea fuit opinio, ut perfectam latinè scribendi laudem unam Itatorum propriam esse existimarem.

marem. Verum, postea quam Elogia tua legi, quibus Illustres Belgij scriptores meritis laudibus celebras; hanc mutavi opinionem, & in hoc ipso Romanae eloquentiae latissimo campo exterorum quoque hominum industriam feliciter excurrere animaduerti. Hunc igitur librum cum in manus identidem sumam, illius tamen lectione vix satis animum explere possum; & quo saepius lego, eo magis & argumentum, & dicendi elegantia mihi probatur: quo nullum certius in scriptis dijudicandis testimonium desidero. Ecquae, ut vere dicam, materies ingenio tuo facundiaque dignior; ecquae hominibus iucundior, ac fructuosior esse potest? ex ijs artibus, quibus ad humanitatem informamur, nos quidem historia vehementer delectat; sed illa, quae Elogijs comprehenditur, incredibile est, quanta voluptate, atque letitia animum perfundat. quippe quae circa nobiliorem, & praestantiorum partem omnino versatur; & perspicua breuitate Clarorum Virorum immortalia facta complectitur. iam ipsa illa quantum nos retinet varietas? dum Sapientissimorum hominum memorabilia dicta, & facta in ipsis Elogijs tanquam in tabula picta videmus; & quae cuiusque actae vitae principia, qui progressus, qui exitus denique fuerint, cognoscimus? nam, & si doctissimis Belgis tuis idem scopus propositus fuerit, eademque meta, virtus scilicet, atque pietas: diuersis tamen itineribus ad eam peruenerunt, varijsque viuendi rationibus vsi sunt. quas cum diligenter obseruamus, maximam inde prudentiam haurimus, & in rebus sequendis, fugiendisue multo cautiore euadimus. hinc non possum non magnopere eorum industriam improbare, qui in rebus inanibus scribendis tempus conterunt; cum illud multo melius colloca-

rent,

rent, si præclaras hominum actiones litteris mandarent,
 nobisque ad imitandum proponerent. ex quibus longè
 maior voluptas, atque utilitas perciperetur. quæ quidem
 voluptas alia voluptate cumulatur, si eorum scriptis de-
 lectemur, quorum nobis ante oculos vita proponitur: &
 ea ipsa scripta nobis magis familiaria sunt, si, quod vitæ
 institutum Scriptores sequuti sint, perspicuum habea-
 mus. id verissimum esse quotidie experior. nam etsi an-
 tea Lævini Torrentij Poemata Sacra è manibus raro de-
 ponerem, & ea nunquam legerem, quin maximè admi-
 rarer, atque suspicerem: maiori nunc tamen ea legendi
 desiderio flagro, posteaquam pulcherrimum illud Elo-
 gium legi, quo illum præcipuè decorasti. in quibus Elogijs
 eo dicendi genere usus es, quod in paucissimis nostrorum
 temporum Scriptoribus cognoui, purum, elegans, ac in
 omni parte æquabile, quodque tranquilli animi instar
 placide, ac leniter fluit. multa in perfecto Scriptore re-
 quiruntur, sed hoc è multis maximum est, ut scribendi
 elegantia excellat. quod si rei cuiusque gestæ narratio ut-
 cunque scripta nos magnopere delectat, quanto magis ea
 delectabit, quam latini Sermonis elegantia maximè
 commendat: noluiſti tam dulces epulas in vasis sordidis
 nobis apponere; nec tam pulchram virginem inculto,
 horridoque ornatu incedere passus es. in ipsis etiam Elo-
 gijs admirabilis ordo, & dispositio elucet, cum suo quæque
 loco collocata sint, & inuicem sibi respondeant; cum nec
 prætermittantur necessaria, nec superuacanea enarren-
 tur politis præterea versibus exornata apparent, ut quæ
 alijs in hoc genere desunt, omnia in te ipso perficiantur. te
 felicem, qui ijs, quæ mortua sunt, tam præclaram vitam
 reddis, ut victura perpetuo sint; cum alij multa quotidie
 pariant

pariant repente moritura . eo autem beneficio Patriam tuam, ac totam Prouinciam Belgicam tibi deuinxisti, quo nullum maius excogitari potest; cum eam non tam armorum, quam litterarum parentem, atque nutricem esse ostenderis: cum tot charissimis filiis suis, doctrina, & sanctitate præstantibus immortalem gloriam comparaueris. qui nunc cæli incolæ hoc tuum pietatis officium, ut opinor, gratissimum habent; seque in tuis scriptis reuixisse summopere latantur. ipsa quoque Latina lingua multum se tibi debere confitetur, cum prope par laus eorum sit, & qui rem aliquam ex parua magnam fecerint, & qui eam ad interitum inclinatam in pristinum gradum restituerint. Omnes denique litterati homines præcipuam ex tuis Elogijs utilitatem percipient; cum si quid tale vnquam aggrediantur, ita in illis, quod admirentur, & imitentur habeant, ut nihil melius in eo genere optare possint. ego equidem, etsi prorsus, qui inter illos adnumerer, indignus sum; cum tamen ad hoc scriptionis genus maximè propensus sim, ad illud tentandum si me voluntas vnquam adduxerit, non alium certè, quam te ipsum imitaturus sum. & quoniam hæc ipsa Elogia mihi vehementer sitim incenderunt cetera tua scripta legendi, ut ijs ad me mittendis eam sedare velis, te etiam, atque etiam rogo. nam, cum omnibus eloquentiæ copijs abundes, & in scribendo felix, & elegans sis, existimandum non est purissimos te ingenij tui fontes clausos esse velle. sed potius omnibus apertos; ut non tantum ingenia Belgica irrigent, sed in Italicos etiam animos redundant. Cum verò & natura, & voluntate in eam partem maximè inclinem, ut quod cuique debeo, re ipsa potius, quam verbis soluere cupiam; si huius meæ voluntatis, propensionisque

sionisque declarandæ mihi facultatem dederis, gratissimum feceris. nam quamuis liber, liberaque ciuitatis sim; litteratis tamen hominibus, tuique similibus operam nauare, in eorumque potestate esse volo; & hoc ipsis veluti tributum libenter pendere humanitatis, atque officij. Vale. Genua. xij. Kal. Aprilis. CIO. IO. CVI.

AVBERTVS MIRAEVS. IO. NICOLAO
Saulio Carregæ. S. P. D.

LITTERAS tuas sanè elegantes, quamquam in nostras laudes nimium effusas legi non inuitus. equidem humanitati id tue tribuo. Amplector tamē adfectū, & gaudeo nobili, ac litterato viro iuueniles etiā conatus nostros placuisse. Quod ad cetera nostra scripta attinet, in ijs perficiendis, poliendisque toti sumus. sub prælo nunc habemus Origines Monasteriorum Gallie nostræ Belgicæ. Edidimus iampridem & Illustrium Belgij Scriptorum Imagines in æs incisas. Si nondum vidiſti, curabo ut videas. meditamur & Historiam rerum Belgicarum, à Christo nato ad nostrum usque seculum. Deus modò adspiret, & amici faueant. De Liguribus vestris nostra memoria benè meritus est Vbertus Folieta ciuis vester, cuius scripta historica utinam videre nobis liceat aliquando. Vir fuit omnino egregius, cuius ego diem obitus scire aueo, ut suo loco memoretur. Miror autem ab illo tam paucos Ligures doctrina illustres celebratos. Quam partem, Si Tu, Vir Nobilissime, expleas, de patria in primis, atque Italia vniuersa mereberis quàm optimè. Quæ de. I. Lipsij. V. cl. obitu reipub. litterariæ luctuoso, in gratiam amicorum, si non aduersariorum potiùs

C (qui

(qui in suas eum partes vel obtorto collo trahere conatur) nuper scripsi, hic vides. Iudica, & litterarium hoc iter sapius tere. Vale Antuerpia. VII. Idus Aprileis. CIO. IO. CVI.

I. LIPSII. V. CL. MORS.

DE extremo I. Lipsij. V. Cl. vite actu, atque excessu, in quo sunt omnia, commemorare hæc libuit.

CVI in febrim an. CIO. IO. CVI. circa Idus Martias incidisset, fatalem lectulum conscensurus, vultu alacri cycneam hanc vocem, Ad lectum, & letum, instantem mortem animo presagiens, emisit. Morbo ingrauescente, R. P. Leonardum Lessium Soc. Iesu Theologum eximium, cuius eruditi De Iure, & Iustitia exstant commentarij, sibi persfamiliarem aduocavit, atque in procurandis ritu Christiano sacris, & animo expiando, eluendoq; totus fuit. Ceterarum itaq; rerum omnium, curis abiectis, Sacrosanctum Christi corpus. xij. Kal. Aprileis, qui dies in Dominicam Palmarum tum incidit, pie suscepit, & Sacro Oleo, more Christiano die sequenti, inunctus est. Porro ad extremum usque spiritum firma, atque integra mente constitit; tanta animi constantia, ac tranquillitate, ut nihil uxoris, aut amicorum undique adfluentium lacrymis, ac suspirijs commoveretur. Itaque nec ullam querimoniam vocem, nec ullum repugnantis, aut trepidantis animi signum edidit. utque in vita, sic & in obeunda morte constantissimus existit. Et certè non scriptis modo; sed & factis Philosophum se, eumque Christianum, mirificè comprobavit. Silere hoc loco nec possum, nec debeo, ex quo sincerum, atque eximium

mium illius in Diuam Virginem adfectum, cultumque licet agnoscere. Cum in agone, morti iam proximus, versaretur, uxori mandauit, ut reddito iam spiritu, togam optimam, pellibus suffultam, B. Virg. ad eius aram, Louanij in Basilica B. Petri Apostoli principis, cultu, miraculisque celebrem, offerret, ac poneret. Quam & ipsi oblatam spectauimus.

SUMMA itaque cum testificatione pietatis, Christi Crucifixi imaginem frequenter amplectens, & nunc IESV, mox Mariæ nomen ingeminans x. Kal. Aprileis. siue xxiij. Martij. An. 1606. paullo post noctis medium, anno ætatis nono, & quinquagesimo, placidè ac leniter expirauit. Morienti, præter domesticos, adfuere tres è Soc. Iesu Patres, & vnus è Sodalibus instituti B. Francisci; itemque V. R. & Cl. Nicolaus Oudartus, Canonicus, & Officialis Machliniensis, & V. N. Ioannes Bap. Perezus Baronius, eius olim auditor, ac contubernalis. Mediocri pompa, ut, qua erat modestia, iusserat, elatus est pridie Paschatis, viij. Kal. Aprileis, hora post meridiem quarta, humeris vniuersæ, ut sic dicam, Academia; certantibus nimirum inter se studiosis, ut extremum istud præceptori meritissimo pietatis officium impenderent; memores illius, ut arbitror, Vocis Q. Cæcilij Metelli, cognomento Macedonici. Val. Max lib. 4. cap. 1. 3. Non fore, ut in posterum id officium ab ipsis Viro maiori præstari posset. Præter Academicos, ac Ciuēs, & exteri non pauci funus deduxere; in his V. R. Aubertus Miræus, Canonicus Antuerpiensis. V. N. Io. Bapt. Baronius, & Ioannes Vuuerius vir ornatissimus, eius olim Louanij auditores, qui officij gratia Antuerpia aduolarant. Conditus iacet, ut testamento mandarant,

in Aede Sacra Franciscanorum Sodalium, ante Virginis Deiparae aram, ad quam preces fundere quotidie solitus erat. Voluit nimirum & à funere sui in Virginem cultus sempiternum apud posteros extare monumentum. Inscriptionem verè Philosophicam tumulo appendendam paucis ipse versibus est complexus. Iusta illi persoluta sunt. iij. Kal. Aprileis pompam funebrem præter incolas Louanienses, ad S. Petri Basilicam, quæ urbis primaria est, deducantibus. R. & Cl. V. Petro Pantino, Decano Bruxellensi, R. V. Nicolao Oudarto, Cl. V. Ioanne Vuouerio, utroque testamenti curatore, alijsque exteris. Defunctum pro funere laudauit. V. Cl. Gerardus Corseilius I. V. Doctor, eleganti, ac disertâ oratione. Bibliothecam, & scripta sua, atque ingenij monumenta, Sororis nepoti, annos fere. xij. nato, legauit, & apud Vuouerium, dum adolescat heres, deponi iussit. Græcos ac M. SS. Codices Louaniensi Soc. Iesu. Collegio adtribuit. Cautum autem testamenti tabulis scriptorum suorum quidquam imperfectum à morte euulgari. Flores, atque arbusculas suas, quibus mirificè solebat adfici. R. P. Thomæ Vuiringo Soc. Iesu Sacerdoti, & Thomæ Blyleuio, Vigilum urbis Louaniensis Præfecto, amico, ac vicino suo, istarum rerum curiosis, dedit; numismata verò. R. V. Dionysio Villerio, Canonico Tornacensi, & Vuouerio, antiquitatis in paucis amantibus, & peritis reliquit. Hæc de obitu breuiter. De vita scriptisque suis ipse Centuria VIII. Epistola lxxxvij. ad Io. Vuouerium copiosè descriuit.

A. M.

IACO-

IACOBO, ET IO ANNI FRANCISCO
TISCONIA.

Bononiam.

DE Studijs vestris letiora in dies nunciantur; & quæ de vobis opinio est, re ipsa egregie comprobatur. gratulor igitur vobis, parenti vestro, & Patriæ, quibus ex virtute vestra plurimum & utilitatis, & gloriæ aliquando accedet. hæc ipsa studia causam fuisse arbitror tam diuturni silentij nostri, cum vos eorum capti dulcedine ab illis animum non facile abducatis: ego vero non is sim, qui ad me omnia ita referam, ut obeam voluptatem, quam ex litteris vestris perciperem, vos ea voluptate priuari velim, quam ex ipsis studijs percipere soletis. ac nunc etiam silentio usus essem, nisi nonnulla occurrissent, quæ cum magnopere intelligere cupiam, vosque in ipsis mihi adiutores esse possitis; contineri diutius non potui, quin ad vos scripserim. ea vero eiusmodi non sunt, ut ad ipsa mihi inuestiganda, iudicandaque à studijs vestris temporis multum vobis conferendum sit. paucis enim horis partim, partim verò paucis verbis perficere poteritis. Illud in primis scire velim, an volumen Epistolarum editum sit Romuli Amasæi doctissimi, & eloquentissimi Viri, quod Iulius Signius in manibus habebat. illius enim editioni nihil aliud deerat, nisi aliquis, qui tantum impensæ facere vellet, ut ederetur. quod si nondum ab aliquo impetrari potuit, nostrorum temporum avaritia notanda est, cum homini de hominibus optime merito, quique dum vixit, ad conferendas in alios ingenij sui opes facilis, propensusque fuerit, tam male gratia

tia referatur. Camillus Paleottus vir doctrina, & pietate
 insignis complura scripta reliquit propter argumentum,
 & Latine lingue elegantiam omnibus grata, atque ac-
 cepta magnopere futura: quæ in potestate nunc habet
 Galeatius tali patre dignissimus filius. qui cum paternæ
 gloriæ cumulandæ cupidus sit, ut veterem illam Gentis
 suæ, & quasi hereditariam de hominibus benemerendi
 consuetudinem seruet, ea, ut opinor, in lucem editurus
 est. nam ut antiqua omittam, recens habet exemplum
 Gabrielis Paleotti Cardinalis amplissimi Patruī sui, qui
 gloriæ suæ, & communi utilitati egregie consulens præ-
 clara ingenij monumenta euulgavit. hæc ipse Camilli
 scripta legendi tam incredibili desiderio ardeo, ut, cum
 illi vestra in primis opera adiutum satisfacturum me
 aliquando confidam, vos magnopere rogem, quo in statu
 illa sint, quidque de ijs sperare possim, ad me perscribere
 ne grauemini. Ex recentibus Poetis latinis Franciscus
 Maria Molsa ita mihi placet, ut ad antiquos illos Va-
 tes, eum tanto proprius accessisse existimem, quanto ma-
 gis ab illis ceteros procul abesse animaduertimus. hoc
 unum maxime doleo, quod ex illius scriptis multo pau-
 ciora exstant, quam velim, quamque ut ex ijs sitim
 meam explere possim. Itaque cum intellexissem nonnul-
 los ipsius Gentiles Ciuitatem istam, tanquam patriam
 sedem sibi elegisse, inter quos eminebat Tarquinia illa
 Molsa, quæ Maiorum suorum vestigijs insistentis tantos
 in litteris processus fecit, ut ad summum Poesis fastigium
 peruenerit, laureaque corona tempora exornauerit; ad
 amicum scripsi, ut illos conueniret, ac diligenter sciscita-
 retur, num præter illa, quæ iam publicata sunt, alia scri-
 pta in manibus haberent. qui responderunt plura epi-
 gramma-

grammata apud se esse, multasque Elegias; omnia se intra biennium diuulgaturos. id an perfecerint, an longius producturi sint, cum tempus iam illud abierit, velim diligenter inuestigetur, meque tota de re certiore faciat. Sed nondum molestijs finem impono, ut verear, ne vos hanc epistolam conscidentes ipsas molestias silentio ulciscamini. Superioribus diebus multi ad me libri Florentia missi sunt, in quibus erat volumen tertium Epistolarum Paulli Sacraei Viri de litteris optime meriti istuc impressum. ultra quod nescio, an alia volumina conscripserit. cum igitur primum volumen iam pridem habeam, velim, ut diligenter secundum inquiratis, inuentumque ad me quam primum perferendum alicui detis cum ceteris simul libris, quorum supra mentionem feci; si modo iam absoluti, perfectique sunt. quidquid enim a vobis expensum erit, non patiar, ut in muneris loco ponatis; sed sine ulla cunctatione, cui volueritis, fideliter numerabo. quibus quidem libris si capsulam unam addideritis earum plenam pilarum, quas istuc varijs succis, atque odoribus permistas artifices egregie conficiunt, quibus faciem, manusque lauamus; ad vestra in me officia, atque merita. quæ prædicare nunquam desinam, aliquid accedet; nihil vero ad amorem meum erga vos, cum fraterno se iam æquauerit, & ad summum perfectionis gradum peruenerit. Valete. Genua. XIII. Kal. Maij. CIO. IO. CVI.

SCIPIONI EX CONDOMINIS CELLAE.

QVOD ad amicos scribam, quos conuenire, & alloqui possem; & ad homines laudandos, qui doctrina excellent, propensior sim; vereor, ne illi mihi vitio vertant, qui
aliena

aliena magis, quam propria curant. nam scribendi rationem ad hunc usum inuentam esse dicent, ut absentes de rebus publicis, vel priuatis certiores faciamus: ad eos autem, qui in eadem Ciuitate, atque in eadem pane vicinia sunt, quid litteris opus est? an non cum ijs, quoties volumus, quacunque de re coram commodius agere possumus? ipsas enim litteras prater proprium munus, officiumque usurpari minime conuenit. in eo autem argumento semper versari, quo aliorum laudes contineantur, hominis imprudentis est: ipsas vero laudes in maius extollere, quod interdum me fecisse arguent, adulantis. his reprehensionibus, etsi doctissimorum virorum exempla opponere possem, tamen ne earum auctores quasi signum victorie canant, ita occurram. Epistola non tam absentibus, ut rerum nuncia mittitur, quam presentibus ut munus gratissimum datur. datur etiam, ut inuolati amoris pignus, aut reconciliatae gratiae testis. nec in his rebus tantum ponderis habet oratio, quantum epistola: si quidem illa negligentius prolata cito auolat; haec vero diligentius scripta perpetuo, aut diu certe manet. quod autem ad laudandi argumentum attinet, me sponte ad illud inclinatum esse fateor: sed mihi dici velim, an aliud utilius, atque fructuosius reperiri possit. plures vel primae notae scriptorum epistolae leguntur ita leui argumento, ut eas vix semel quisquam attingere possit sine stomacho. nihil habent prater verba, ac utinam ea ipsa luculentiora essent. Clarorum Virorum laudes sunt quasi quaedam gloriae faeces, quae ad eos imitandos animum vehementer inflamment. quod si ipsas laudes aliquando verbis exaggeramus, id huiusmodi peccatum non est, ut non cuiusdam amoris abundantiae debeat condonari. Sed si talium reprehensionum

hensonem securus unquam fui, nunc, cum ad te scribam, Scipio, maxime sum. nam & occupationes utriusque nostrum colloquendi facultatem nobis eripiunt; & cum tua me virtus ita ceperit, ut, nisi meam erga te ebseruantiam tibi, atque adeo cunctis declarassem, nunquam quiescere potuissem; id ut efficerem, nihil in praesentia magis idoneum, quam epistolam inuenire potui. nec vereor, ne me tibi assentari, aut aliquid auribus tuis dedisse videar, cum ab eo vitio, & ego valde remotus sim; & tu tantis rerum excellentium dotibus instructus; ut mihi potius metuendum sit, ne ingenij culpa eas imminuam, quam cogitandum, quomodo eas augeam, atque amplificem. Summo enim loco si te natum esse dixero; si in litterarum studijs ita versari, ut poetica facultate, & Iurisprudencia excellas; si haec omnia amabiliora in te esse cum mira sermonis, morumque suauitate coniuncta; quis vera me dixisse non fateatur? haec enim illustriora sunt, quam ut is tenebras offundere, aut insuper lucem addere quisquam possit. Magna inter homines nobilitatis vis, magnaue in ea felicitatis pars constituta videtur. hinc virtuti nouum decus accedit; hinc ipsa fit virtus acrior, & admirabilior. itaque gloriari maxime potes, quod claro genere ortus sis, sed multo magis, quod generis claritatem virtute superaueris. noti sunt Maiores tui; tu vero notior es. nec id eorum gloriam minuit, sed potius auget; quemadmodum geminae facies sibi inuicem vires acquirunt. in ea autem re excellere, quae maximi sudoris, maximaque gloriae sit, excellentis, ac planè diuini ingenij est. id verum esse res ipsa fateri cogit, & bonarum Poetarum paucitas maxime comprobatur. omnibus quidem patet Poeticae laudis, & gloriae campus.

D. sed

sed multi in eo vires inani cursu exercent suas. tu vero an ipsam metam contigeris, tua scripta testantur. quæ cum legimus, admiramur in verbis puritatem, gravitatem in sententijs, in mouendis affectibus artificium, iudicium in seruando vniuscuiusque decoro. quodque magis egregium est, in ijs præstantiores quosdam Spiritus animaduertimus, quam quos humana natura afferre soleat, aut in aliorum scriptis hac tempestate cernamus. Verum laudatione mea quid opus est? an non satis Poemata tua laudata sunt, cum præter communem omnium consensum Torquatus Tassius, qualis, & quantus Vir? ea probauerit, plurimique fecerit? nam ea ipsa legens quæ verba protulerit, quoque diuinæ vocis suæ testimonio te ornauerit, per omnium, credo, ora iam vulgatum est. cuius iudicium, atque auctoritas apud te non minoris ponderis esse debet, quam apud Antimachum Poetam, Platonis iudicium, atque auctoritas fuerit. Cum Poesi Iurisprudentiam coniuxisti, sed cum Iurisprudentia quæstus studium haud coniungere voluisti. in hac enim scientia tantummodo versaris, ut reconditum aliquid habeas, quod ad res maioris momenti depromas. quod aliquando egregie te præstitisse, & Iurisperitissimum tum voce, tum scripto te ostendisse perspeximus. quæ quidem scientia ceteris omnibus, mirum, quantum præstat. homines in officio continet; quid in vita sit optimum, edocet: ijsque ducem se præbet, ut, unde ipsa delapsa est, in cælum perueniant. hæc bona, quæ dixi, ad animos conciliandos optima instrumenta sunt; sed ea suauissimis moribus condita ad ipsos alliciendos maiorem vim habent. hinc euenit, ut omnibus acceptior, & carior sis; nullusque fere reperitur qui te semel viderit, aut loquentem

tem audierit, quin amicitiam tuam magnopere expetat. non igitur mirum si ego illis ita captus sum ut ad singularem meam erga te voluntatem significandam maxime semper spectauerim; & quando nulla alia dabatur occasio hac uti epistola voluerim. erit illa igitur tanquam pignus obseruantiae in te meae, vel grati animi, memorisque munus. paruum quidem, fateor, & meritis tuis impar; sed voluntatem velim spectes, non muneris tenuitatem. et si illud paruum videri non debeat, quod ab eo profisciscatur, qui tui amantiſſimus sit, quique nil maius cum dare possit, quidquid potest, & valet, tibi libenter polliceatur & deferat. Vale. Genua, ex aedibus. VIII. Kal. Iunij. CIO. IO. CVI.

IOANNI BAPTISTAE FORZANO.

MAGNA latinae linguae laus, difficilisque cognitio est. utrumque vel ijs temporibus cognitum, quibus ipsa lingua florebat, & à priscis illis Romanis simul cum lacte hauriebatur. nam & plurimum studij in eo ponebant, ut emendate loquerentur, & scriberent; & tanto magis ceteros quisque potentia superabat, quanto magis eloquentia anteibat. hinc ipsa lingua ad tantam dignitatem, & gloriam creuit, ut, quasi haud satis sibi existimaret simul cum Romano Imperio cuncto terrarum Orbi imperasse, ad Consulatum, quod Summum Romana Respublica Imperium habuit, aditum sibi facile aperuerit. Sed in rebus humanis quid stabile, & perpetuum datur? illae infortunae rota versantur, & fatali quadam vicissitudine, quae modo ad summum peruenerant, mox eadem in imo fundo voluntur. quam quidem conditionem latina

D 2 lingua

lingua haud euitare potuit. illa enim dies, quæ Iulio Cæsari vitam ademit, illa ipsa & Romano Imperio, & ipsæ latinæ linguæ interitum attulisse visa est. nam Rempub. Romanam exceperunt deinceps monstra quedam hominum, atque portenta; quæ, tantum abest, ut linguarum studia, & bonas artes iuuerint, ut ea potius funditus euerterint. itaque sub eorum Imperio, ac dominatu, ut aliquod veræ, germanæque eloquentiæ vestigium diligenter requiras; nullum tamen planè reperias. quid enim agerent homines, ubi sublatis legibus, propria cuiusque cupiditas dominabatur: ubi debita virtutibus premia vitijs persoluebantur: ubi denique cædes, & rapina omnibus imminabant? itaque Reip. forma prorsus mutata, magna quoque in latina lingua mutatio facta est. hinc tanta Scriptorum varietas; hinc illa aucta difficultas, quàm paullo ante dicebam; hinc laus etiam maior, si quis in illa barbarie ad antiquam illam puritatem propius accederet. Verum non hic malorum terminus fuit; sed alia ex alijs consecuta sunt. nam barbaræ nationes torrentis instar Italiam ita inundarunt, ut & ipsa latina lingua, & præclara litterarum studia naufragium fecerint. quin etiam Italia ipsa, quæ una inter ceteras Regiones Imperio eminebat, barbaricis fluctibus obruta iacuit. è tanto naufragio, veluti tabula, libri, & per pauci quidem supererant: ex quibus cum omnes latinam linguam petendam esse consentirent, non tamen omnium in ratione imitandi sensus idem erat. nam suo quisque consilio in scribendo utebatur, & sua quisque scripta magis laudabat, quam aliorum iudicio comprobarentur. multosque per annos res ita processerat; paulloque supra Atauorum memoriam mentes hominum tanta caligo occupauerat,

cupauerat, ut ille perfectæ scribendi metæ propior videretur, qui longior ab illa ferebatur. in tantis tamen tenebris non defuere, qui clarissimum eloquentiæ lumen extolentes ad veram latinitatem assequendam viam certissimam ostenderint, simul & muniuerint. quos quidem antesignanos complures laboris socij secuti sunt; nonnulli etiam gloriæ æmuli illos videntur praterijse. hinc quinquaginta ab hinc annis factum est, ut præclara ingenia exstiterint que ipsam barbariem prorsus fugauerint, & suum latinis litteris splendorem omnino reddiderint. quorum scripta ad tantam elegantiam perpolita sunt, ut communi omnium consensu cum antiquorum scriptis incerta, ac dubia palma contendant. itaque latina lingua nunc maxime viget: nunc ab omnibus colitur, & ceteris linguis præfertur; cum illa doctissimis scriptis contineatur, & ab imperita plebe seiuncta in ore doctissimorum virorum versejtur. quod illi nobis concedant, necesse est, qui Ethruscam linguam in delicijs habent; cum inter tot varias de ipsa Ethrusca lingua sententias hoc inter illos conueniat, ut eam à libris perdiscendam esse affirmant. alioquin à se ipsis dissentirent, & pugnantia loquerentur. Sed qui in latina lingua nunc se exercent, eandem rei difficultatem experiuntur: quæ tamen difficultas ea præmiorum spe subleuatur, quæ illis proposita sunt. nonnullos enim, qui in ea excelluerunt, ad eam dignitatem, quæ summæ proxima est, peruenisse constat. auget hanc difficultatem varia, & multiplex imitandi ratio, cum alij alios sibi imitandos proponant, alij alia dicendi genera sectentur. hinc euenit, ut ex recentibus Scriptoribus hic nobis mirifice placeat, ille vero nullo modo probeatur. hinc etiam, ut sæpe vnus idemque scriptor ab alijs

in

in Cælo positus, ad inferos usque ab alijs deprimatur. hæc varia hominum iudicia, & eorum præsertim, qui in peiorem partem omnia rapiunt statim ut epistolæ meæ in lucem editæ sunt, haud effugere potui. nec mirum aut novum quippiam mihi accidisse arbitror. cum proprium id illis vitium sit, ut nullos quiescere sinant, & molestiam omnibus afferant. has epistolas alij probant, easdem improbant alij. illos etsi in rebus æstimandis errore duci non arbitror, in suam tamen sententiam me nunquam adducent; eos rogo, ut hac in re fidem mihi potius memetipsum optime cognoscenti. quam ipsi sibi nimium fortasse amoris tribuentibus habeant. hos vero si absque malevolentia, & invidia iudicant, & amo, & laudo; facileque patior, ut me sua itidem scripta iudicantem pari conditione accipiant. verum in ipsis scriptis quid in hanc partem eorum ingenia possint, facile perspicimus. tantum abest, ut in illis veræ germanæque eloquentiæ solida, & expressa effigies sit, ut ne illius quidem umbra, atque imago in ipsis appareat. Sed tam atra ignorantie nubes omnem illis prudentiæ lucem ademit, ut sibi solos per se sapere, omniumque primos omnibus in rebus se esse existiment. huiusmodi vero hominibus non modo placere non studeo, sed ne ab ijs quidem scripta mea legi volo. quod si ea fortasse improbant, ut mihi stomachum moveant, in hac quidem re eos omni cura, atque molestia libero. equidem, ut verum ingenue fatear, latina lingua mirum in modum delector: hæc una me tenet, hæc una heret animo voluptas; herebitque, quandiu viuam. At quod in hoc genere tentavi, non successit; & non modo labori, atque industriæ fructus non respondit, sed etiam laborem, atque industriam incassum cecidisse video, & magnopere doleo.

quid

quid faciam? an non tentanda via est, etiam si, quo constitueris, te peruenturum non putes? an non laudanda voluntas, si minus res ipsa procedit? facio, quantum queo, quando nequeo, quantum velim. nec deterreo, quod epistolæ meæ, quarum adolescens maiorem partem scripsi, haud mihi prorsus satisfaciant; nec item ceteris satisfacere existimem; sed potius ad scribendum excitor. idque libenter facio, ut, quando ea, quæ iam edita sunt, fieri non potest, quin edita sint, alijs paullo tolerabilioribus scriptis adiuncta ipsa quoque tolerabiliora efficiantur. ignorantiam fatenti facilior venia est. adolescentiæ vero plus æquo sibi arroganti facilior est excusatio. amanti vero litteras, & non proficenti nihil prorsus largiri seueritatis esset, in re præsertim omnium difficillima, in qua cum Patrum memoria plures desudauerint, multorum tamen consensu, vix unus, & alter palmam obtinuit. nostra vero ætate cum in ea multi se exerceant, meo quidem iudicio uix unus, & alter excellit. uerum in hoc genere, nimis ego fortasse delicati, & fastidiosi stomachi sum, cum ea, quæ alijs melle dulciora sunt, eadem mihi felle amariora uideantur. etsi in aliorum scriptis diiudicandis, Ioannes Baptista, nullius iudicium, quam tuum libentius sequeretur, nec ullius, quam tua sententia, libentius starem. atque utinam te ipsum plus operæ in legendo, quam in scribendo ponentem imitatus essem, omnes profecto contentiones, à quibus cum uoluntate, tum natura quoque abhorreo, facile uitassem. nam quamuis doctrina, atque ingenio ita excellas, ut ad scribendum si te conferres, omnibus quidem abunde satisfaceres: à scribendo tamen te contines, mauisque, ut ita dicam, inglorius uiuere, quam inuidorum, atque obtrectatorum maleuolentiam

leuolentiam subire. quod quidem consilium his praesertim temporibus tutissimum, maximeque laudandum existimo. Verumtamen illas hominum pestes semper extimescere quae tandem miseria est? an curandum est hominum genus, quoniam nil dici peius, vel fingi iniquius potest? hoc tibi potius curae esse debet, quomodo huius vitae nostrae breue spatium scribendo longius efficias. non enim tot animi, ingenijque dotes in te contulit Deus, ut eas tantum intra domesticos parietes contineas; sed ut potius cum alijs libenter communices. & equum sanè est, ut quarum ille rerum tam munificus largitor in te fuit, harum tu quoque alios participes facias liberaliter. te igitur pro amicitia nostra magnopere rogo, ut, quantum valeas, tantum scribas; & diuturnam sitim nostram purissimis ingenij tui fontibus expleas. hoc si feceris, plurimum ipsi Latinae linguae ornamenti afferes, posteris maximam utilitatem, tibi vero immortalem gloriam paries. Vale. Genua vij. Kal. Iulij. CIO. IO. CVI.

LVDOVICO SAVLIO. ANTONII FILIO.

ET EPISTOLAS meas legis, & eas etiam laudas. utrumque maius, quam aut ego promeritus sim, aut ullo unquam tempore optare debuerim. maximum tu quidem scrupulum mihi iniecasti; quem non ita facile ex animo meo quisquam euellet. nam te non recte iudicare, qui acumine ingenij vales, vel te fingere, qui totus purus, & apertus es, mihi persuaderi non potest. ea vero me agnoscere, quae in me tam plena manu contulisti, mediocritas haec, vel tenuitas potius mea non finit. itaque animi dubius, quid consilij capiam, nescio. Sed, ut laudibus

bus assensum non praebeam; amorem tamen erga me-
 tuum, ex quo, tanquam ex fonte, laudes emanarunt,
 pari amore rependo. Ceterum, si quis est in hac vita, his
 praesertim temporibus, litterarum fructus; is, mea qui-
 dem sententia, est amari, ac probari abs te, tuique si-
 millimis. nam, & litterarum amantiissimus es, & linguae
 Latinae in primis cupidissimus: nec praeclara illa dona de-
 litescere pateris, quae diuina munificentia tibi concessit.
 quod si quisquam est, cui magis omnia suppetant, quae ad
 famam immortalem parandam adiumento sunt, eum te
 esse certe fateri cogimur. Parentes optimi, excellens in-
 genium, aetas opportuna, firma valetudo, ingentes diui-
 tiae, amplae affinitates. quibus egregia animi adiuncta,
 voluntate, quid de te sperandum non erit? qui quidem
 Parentes, cum te filium unicum habeant, vnice ament,
 & cum virtutibus omnibus, ac pietate in Deum prae-
 pue floreat; quid tibi sequendum, fugiendumue sit, re,
 & exemplo suo quotidie edocent. iam vero te ex Nobilif-
 sima Gente Saulia natum esse, quantum ad omnem lau-
 dem, & gloriam momenti affert? est enim Gens Saulia
 Clarorum Virorum perpetuum quoddam seminarium:
 est aurea illa Arbor, quae flores, ac fructus perpetuos
 profert; ita ut, dum maturescunt alij, alij succrescant, &
 alij alijs grata vice succedant. attente contemplare,
 Maiores tuos, quorum imagines egregie pictas in tuo
 Museo ex ordine positas habere debes. vide alios bello,
 alios pace claros; hos purpura inclitos, illos sanctitate,
 conspicuos. qui quamuis luce varia luceant, omnes ta-
 men immortalitatis luce fruuntur. in hunc tantum splen-
 dorem si oculos defixeris, non dubito, quin animus tuus
 admirabiles radios accepturus; & aetatis tuae quasi sur-

E gentem

gentem Auroram splendidior virtutis Sol consecuturus sit. ita enim a natura institutus es, ut ad quamcunque rem animum adiungas, non verear, ne non eam egregie sustineas, eaque tibi feliciter cedat. quanta Dei Opt. Max. erga te benignitas fuit? qui tibi hanc mentem dederit, ut velles & voluntati vires adiunxerit, ut, quod velles, perficere posses? maximas te illi gratias agere, & tanti beneficii nunquam immemorem esse decet. Non idem, quod tibi, omnibus contigit. quam multi ex aequalibus tuis a recto virtutis tramite aberrantes in vitia, precipites ruunt? acerbissimi casus, qui nostris accidere temporibus, id nimio plus verum esse declarant. miseram eorum conditionem? quid est homo, si ei rationem, quae una praestat feris, sustuleris? quam turpe est, cum omnia nobis seruiant, nos appetitus imperio premi? tu vero in ipso aetatis flore virtutis viam ingressus curre per eam celeri gradu. impressa vestigia cernis Maiorum tuorum: quo ipsi peruenerint, vides. eo tu quoque peruenies, celesti fauore gressus tuos prosequente. quin etiam laudabili emulatione tibi enitendum est, ut ab ipsis relicta tibi gloria ad posteros per te maioribus aucta incrementis transferatur. eia auge Patriam ornamentis, Parentes latitia, Maiores gloria. has cogitationes suscipiat velox mens tua, & tanquam pennas, quibus ad excelsa, & sublimia euolet, sibi induat. non aliam viam tenet, cum prolem suam ad Solis radios explorat regia illa Aquila Paternae Gentis Sauliae, & Maternae Auriæ Insigne; ex qua nata est Maria mater tua, singulare Muliebris virtutis exemplum. Interim ego propter humum volitans, vel potius repens, utcumque potero, longo te sequar intervallo. quamuis onus mihi grauius impositum esse sentiam,

tiam, quam ut vllomodo ferre queam. quanti ponderis putas mihi esse verba illa tua, cum dixeris Gentem Sauliam sibi gloriae ducere posse, quod ego in eam adscitus sim? tanti profecto, ut, nisi Deus opem tulerit, eo me oppressum iri dubitem. Sed si mihi pennis alas munierit, cantumque meum ipse extulerit; ita ut ex studijs meis aliquid non prorsus huiusmodi indignum expectatione depromere possim; spero fore, ut illud aliqua ex parte sustineam, Nomenque tuum, ipsamque Gentem Sauliam usque ad Sidera summis, meritisque laudibus extollam. Vale. Genua ex adibus.

PAVLO MONELIAE. I. C.

ROMAM versus Patria discedo: ut à re omnium iucundissima non libenter; ut ab ea Ciuitate, quae paullo attentior negotijs est, non inuitus; ut à te, cuius consuetudo maximam mihi utilitatem afferebat, inuitissimus. quod quidem nomine magnum dolorem sustineo, quem nulla re magis, quam litteris mittendis, accipiendisque minui posse arbitror. tu igitur litterarum bono vteris, & ego itidem utar: eoque magis, quod spero fore, ut Romanum illud Caelum eloquentiae luminibus distinctum mihi ad scribendum adiumento sit; cum hoc nostrum nonnihil caliginosum mihi semper maximè obsuerit. hanc ob causam in praesentia elegantissimis litteris tuis nihil respondeo. Sed non minus ob illam, quod cum tu in amoenissimis

I. Lipsi hortulis te saepe oblectes, vereor, ne mea dumeta asperneris, atque abhorreas. ne tu egregius illius imitator, vel emulus es, cum dubium relinquas, utrum eum imiteris, an aequas, an potius vincas. itaque illud cla-

E 2 rissimum

rissimum litterarum lumen non prorsus morte extin-
 ctum, sed in te ipso planè exortum, ac renatum videtur.
 Sed, ut omnia in me essent, quæ in perfecto Scriptore re-
 quiruntur, qui breui epistolæ ambitu tot egregias tuas
 uirtutes amplecti possem? non mearum uirium onus esset
 eum laudare, qui nobiliss. Familia natus sit, opibus abun-
 det, Ius ciuile, & Philosophiam optimè calleat. & in stu-
 dijs humanitatis excellat: quique domum suam libris,
 picturisquæ ornatam litteratis hominibus patere velit.
 id verum esse re ipsa experiuntur exteri homines, &
 præcipuè Flandri, qui aduersæ fortunæ tempestatibus
 iactati, se in eam, tanquam in portum recipiunt. illi igi-
 tur te vnice amant, & merito, qui omnium amore dignif-
 simus sis. quibus quidem ego in eruditione plurimum, in
 te vero amando ne minimum quidem concedo. idque tibi,
 ceterisquæ omnibus ita testari cupio, ut nihil supra. nec
 despero fore, ut, quod maxime cupio, aliquando id con-
 sequar; & cum amicitia nostræ, tum officio meo aliqua
 ex parte satisfaciam. interim vehementer te rogo, ut
 (quo nihil mihi gratius facere poteris) amorem in me-
 tuum perpetuo mihi conserues. ego mei potius obliuiscar,
 quam te amare, atque colere, & egregias tuas uirtutes,
 atque ingentia merita grata memoria prosequi desinam.
 Vale. Genua. V. nonas Iulij. CIO. D. CVI.

F I N I S.

IOAN-

IOANNIS NICOLAI
SAVLII CARREGAE
GENVENSIS.

EPISTOLARVM
LIBER QVINTVS.

ADMODVM RR. PATRIBVS
DD. ALEXANDRO,
ET AVGVSTINO
GENVENSIBVS,

MONACHIS CONGREGATIONIS
CASSINENSIS.

BVSCHETVM.

NON immerito de me queremini, quod ad elegantissimas litteras vestras ethrusce conscriptas, quas una cum inscriptionibus ad me misistis, hucusque respondere distulerim. Verumtamen, si, qua de causa id a me factum sit, intellexeritis, spero fore, ut queri desinatis, & consilium probetis meum. Nam occupationum, quibus nos, nostri-
que Ordinis homines pene obruimur, rationem habendam esse duxi; nec illis alias occupationes addere æquum esse existimaui. vos ipsi scitis, quantum temporis horarijs precibus, ceterisque ecclesiasticis munijs ad diuinum
cultum

cultum pertinentibus impendendum, sit, quamque saepe illud ipsum vel ipsi necessariae quieti subtrahendum. accedit illud, quod ego maiorem diei partem, vel etiam noctis in ea Theologiae parte, quae ad mores pertinet, pono: & qui antea per mollia Prata flores perpetuos carpens solebam spatari, ipse nunc per loca spinis obsita illis implicatus compellor inambulare. sed duae me res maxime subleuant; altera, quod duobus doctissimis viris Familiae vestrae Sayro, & Graphio inquit; altera vero, quod animarum saluti, quantum in me est, utilitatiq; consulo. quamvis, si meta spectetur Religioso viro pra oculis semper habenda, & inceptus a me iam cursus; nihil plane progressus esse facile inueniar. it longe melior vestra conditio; cum vos tanto me velociori cursu antecedatis, quanto omnibus rebus superiores estis. vel hac ipsa epistola vestra in summis occupationibus scripta, quam elegans, quam brevis, quam acuta est? ut haud sciam, an quisquam alius in summo otio elegantior, breuiorem, acutioremue scribere potuisset. itaque, quamvis atrato habitu induti incedatis, vos tamen inter eloquentiae Candidatos vere numerauerim. Sed haec laus propria vestra est, litteris excellere, & litteras minime profiteri. Non possum paria paribus: & quamvis palma in medio omnibus posita sit, eam me tamen non laturum satis scio. itaque satius existimo manus dare, & me victum libenter fateri. Hanc quidem epistolam libenter legi, saepiusque legam, diligenterque seruabo, amicitiae nostrae, vestrique in me amoris pignus testemque futuram. Inscriptiones vero tanto mihi iucundiores acciderunt, quanto citius eas, atque promptius ad me perferendas curastis. quo monumentorum genere ita delector, ut,

cum

cum in seculo degerem, in his colligendis nimio plus fortasse studij, curæque adhibuerim. nã vos duplici laude laudabiles estis, qui amicorum animis, corporibusque, ita consulitis, ut istius loci, vestrique ingenij præstantissimis fructibus, tanquam suauissimo pabulo, & animi, & corpora recreentur. quorum alterum expertus sum, cum me ad vos venientem tot amoris signis ita exceperitis, ut ea mihi semper imo infixæ corde futura sint: alterum vero quotidie experior, cum scripta vestra legens, & vos mihi adesse, & me vobiscum una colloqui considero. quamquam ob alias causas non modo in ore, sed etiam amore, atque admiratione omnibus estis; ob illam præcipue, quod cum Religiosæ Familiæ pæne omnes in peius ruerint, & retro relapsæ sint: vos tamen Religioni vestræ pristinum suum tenorem, suamque observationem tueamini: & Sanctissimi Patris vestri Benedicti seueræ disciplinæ non adumbratam, atque inanem imaginem sed veram, solidamque effigiem referatis. cum autem hæ causæ, aliæque multæ in unum concurrant, quantum in amorem omnium vestrum me rapiant, atque inflamment, alijs cogitandum relinquo. cuius quidem amoris erga vos singularis occasionem declarandi ut mihi detis vos magnopere rogo. quicquid enim valeo, quicquid ego sum, quamquam nihil sum, id totum ad voluntatis vestræ nutum promptum, paratumque esse perspicietis. Admodum Reuerendo Patri Abbati vestro, qui vel primo congressu, singulari humanitate, & grauitate præditus mihi visus est, ceterisque RR. Patribus, ad quos me etiam scribere intelligo, cum ad vos scribo, plurimam salutem dico. Deus. Opt. Max. ad gloriam suam, hominumque utilitatem, vos diu omnes sospites, incolu-

40 IO. NICOLAI SAVLII CARREGAE

*incolumesque seruet. Valete. Genuae in Conuentu Sancti
Nicolai Tolentinatis VII. Kalend. Decembris Ann.
CIO. D. CXII.*

IOANNI NICOLAO SAVLIO
CARREGAE.

D. Augustinus Genuensis Casinas. S. D.

SAEPE numero tibi rescribere proposui: sed quia
exlectione Epistolae tuae summa elegantia referta, om-
nique lepore, ac venustate affluentis, visus meus cali-
gavit, & intellectus hebuit, haud secus, quam qui lippis
oculis solem intueri, vel Maiestatem Diuinam scrutari
conatur, hucusque calamum attingere non sum ausus, ne
rudibus, atque impolitis meis nugis Attico sermoni tuo
ex diametro oppositis, intellectus visusque tui perspicui-
tatem sicilizando obnubilarem. Tandem urbanitate
compulsus; vel potius omni Iure coactus, has ad te dare
decreui, apertoque ore fateri quod si olim eo modo erga
te affectus eram, quo erga me ipsum, nunc audeo dicere,
ac toto corde asserere & protestari, posthac me arden-
tiori amore Fr. Franciscum Mariam Augustinianum,
quam. D. Augustinum Benedictinum totis animi viri-
bus prosecuturum, idque ob eius singulares virtutes,
Diuiasque dotes, quibus eum affluere & polleere exper-
tus sum. Vale. Buscheti nonis Februarij. M DCXIII.

LAVRO CATANEO.

Novo vitae genere instituto, humanis litteris vale
dixe-

dixeram; nec illas ut repeterem, fore unquam credidif-
sem. Sed tua me virtus ita commouit, ut sententiam
mutauerim, & ad scribendum, meumque erga te amo-
rem tibi declarandum adduci, ac impelli potuerim. Sti-
lum igitur, quem, tribus epistolarum editis libris, depo-
sueram, & quo melius deinceps vsurus forsitan fuisset,
in manus iterum sumo: quamuis ille sex annorum spa-
tio, quibus non mea, cui propter Deum nuncium remisit,
sed aliena voluntate ad alia studia incubui, ac etiam
nunc incumbo, rubiginem pene obduxerit. Nullus exi-
stimet, eo quod multa legerit, multaue viderit, atque
expertus sit, nihil sibi amplius experiundum esse; cum
in rebus humanis aliquid ultra semper sit, quo quoti-
diana experientia progredi possit. de me ipso loquor. mi-
hi per omnem aetatem multorum consuetudine frui, mul-
ta, ac varia ingenia pertractare contigit: senem tamen
prope octogenarium, tot, & tantis naturae, ingenijque
dotibus ornatum, praeter te, videre nunquam contigit.
Ignotus antea mihi eras, nihil de te intellexeram, nihil
compertum habebam. verum ad D. Nicolai templum
inuisendum cum te contulisses, quod Religionis causa ita
saepè, & alacriter facis, ut te non labor itineris, non lon-
ginitas loci deterreat; tunc mihi primum innotuisti, &
nescio quid admirationis, venerationisque animo meo
instillaisti. Venerabar canitiem illam magnopere vene-
randam, senilem grauitatem cū auctoritate coniunctam:
admirabar corporis vigorem, vires integras, formae di-
gnitatem. idque tacitus faciebam silentio contentus, ex-
terna significatione abstinens, donec ineunda tecum
amicitiae opportunior mihi daretur occasio. Interim mihi
de te sciscitanti nunciatum est & virum doctissimum
F esse,

F

esse,

esse, egregiarumque rerum studio teneri, agriculturæ
 præsertim, ita ut exercitationis gratia te in agello no-
 stro vel repurgare arbores, vel religare vites, vel sere-
 re oleas sæpe perspexerint. iam tum magnam de te con-
 ceperam opinionem, verumque philosophum te existima-
 bam, qui honores, & diuitias contemneres, & rusticum
 laborem urbano otio anteponeres. Post paucos dies, meo
 quidem fato contigit, ut cum lectissimo è Familia nostra
 adolescente Laurentij filij tui paternarum virtutum
 imitatoris egregij amantissimo domum tuam venerim.
 tunc mihi ad amicitiam tuam aditus patefactus est; &
 quam sitim ex quibusdam quasi riuulis magis antea
 incitaueram, eam ex ipso fonte, si non omnino extingue-
 re, magna saltem ex parte sedare licuit. multa inter
 nos vario, dulciq; sermone contulimus, cum tibi grauio-
 ra studia, quæ feliciter tractas; mihi vero pane inanes
 in ijsdem studijs conatus olim mei materia loquendi fue-
 rint. tua insuper scripta tam carmine, quam soluta
 oratione mihi ostendisti, quæ cum maximam utilitatem
 hominibus allatura sint, ea omnino legenda, nullo vero
 modo supprimenda esse censeo. ut paucis multa comple-
 ctar, rem ipsam maiorem inueni, quam aut ego fama
 acceperam, aut animo, & cogitatione antea conceperam.
 Epistolam scribo, non laudationem. itaque omitto, quod
 Brixia nobili urbe; nobiliq; Gente Catanea natus sis;
 quod in celeberrimis Italiae Gymnasijs publicum docendi
 munus magna cum laude sustinueris; quod denique
 Clarorum Virorum, amplissimorumq; Cardinalium
 amicitia, & gratia floreas; taceo quam sis in moribus
 affabilis, amabilis in congressu, in sermone iucundus,
 modestus in vultu; ut, cum in ceteris hominibus aliud
 alij

*alij desit, tibi, ut numeris omnibus absolutus esses, omnia
 plena manu natura contulisse videatur. De Religione
 tamen, & pietate in Deum qua quidem virtute nullam
 in tuis virtutibus admirabiliorem esse existimo, tacere
 nullo modo possum. Hinc ille frequens Sacramentorum
 usus, hinc illa singulis diebus Horariarum precum in-
 tenta recitatio, hinc illa denique admirabilis animi sub-
 missio, qua muneribus spiritualibus, & corporalibus
 obeundis una nobiscum id aetatis homo saepe solitus es te,
 te ipse exercere. iecisti tu quidem a puero alta omnium
 virtutum fundamenta: progrediente postea adolescentia
 huiusmodi quid superaedificasti humanam conditionem
 excedens: in hac denique prouecta aetate, viridique se-
 necta perfectionis fastigium operi imposuisti. nos qui-
 dem, qui Deo consecrati in illius amorem ardentissimi
 esse deberemus eo utcunque incensi, tuo exemplo mirum
 in modum inflammari consueuimus. merito igitur ami-
 citia tua magnopere lator; nihilque malim, quam tecum
 quotidie versari, & conspectu tuo, colloquioque frui ac
 ego equidem, si modo liceret, rationem inirem, qua desi-
 derio meo aliqua saltem ex parte satisfacerem, cum ali-
 quando optimi artificis manu expressa, non minus quam
 viua, & naturalis delectet imago. quanquam eas ipse
 Imagines relinquere, ut video, cogitas, quae virtutis tuae
 potius, quam corporis monumenta futura sint. restat igi-
 tur, ut tuam ad nos veniendi consuetudinem serues, &
 nobiscum quam sapissime esse velis. omnes te in oculis
 gestant, maxime charum omnes habent. qua quidem in
 re, tantum abest, ut ego alicui cedam, ut omnibus me
 superiorem profitear. quin etiam ita tibi addictus sum,
 ut nihil magis hoc tempore cupiam, quam occasionem*

F 2 mibi

44 IO. NICOLAI SAVLII CARREGAE

mibi dari, qua meam erga te voluntatem testificari queam. verum, quando vix aliud nunc possum, in precibus, & sacrificijs meis licet indignis, nunquam tui obliuiscar, omnia tibi fausta, feliciaque deprecabor. faxit Deus, ut ad annos centum, & ultra viuas, & sicut mortalis genitus cum sis, tamen immortalem nominis tui memoriam relicturus es, sic vita hac mortali defunctus illa immortali perfruaris. Vale. Genuæ in Conuentu S. Nicolai de Tolentino. III. Kalend. Ianuarij. Ann. CIO. D. CXII.

IOANNI NICOLAO SAVLIO
CARREGAE.

Laurus Cataneus Brixianus. S. P. D.

DE viris doctis, & probis, ferre sententiam non nisi ijs licet, qui ab eruditione, & vitæ integritate optime audiunt. Quantum enim illis credendum sit, qui in alienas laudes impudenter magis, quam imprudenter ruunt, nec solida innixi virtute, nec multa præditi doctrina, illi viderint, qui se ab istis laudatoribus fucatis decipi myopes patiuntur. Exordij huius causam tuæ litteræ præter spem, atque opinionem meam, addo etiam præter meritum, a te, eruditissime atque optime Franciscæ Maria, mibi nuper data, attulerunt; quibus ego, licet plus beneuolentiæ, quam veritatis, præseferant, respondendum tamen esse duxi, tuis insistens uestigijs, sed multò certioribus illis causis, quæ te ad scribendum impulerunt. Ego, ubicumque locorum, ac gentium, quas plurimas peragraui, docere, & uiuere contigit, non multorum consuetudine, & amicitia,

amicitia, (nam vix tertium recipit) delectabar; paucioribus, potioribusque, & ijs præsertim, quorum studia, & mores (hæc enim duo potissimū cōciliare amicitias & solent, & possunt) a meis non abhorreere perspexissem, familiariter utebar; eosque maiore mihi esse ornamento, quàm præsidio, arbitrabar, & volebam. Hoc vitæ institutum cum semper mihi probatum alibi esset, in hac quoque præclarissima urbe multo constantius retinendum putavi. Etenim quamvis & innocentis vitæ, & bonæ eruditionis testimonio non paucos alijs in urbibus ornandos viderim; hic tamen & plura, & maiora. utriusque exempla sum expertus non modo, sed etiam admiratus. Nam, qui Flaccum arte, qui Maronem gravitate, qui Tullium copia, qui Nasonem ingenio referant, si recensere omnes conarer, nã ad libri molem potius, quam epistolæ modum accederem. Verum ex omnibus; quorum mihi familiaritas esse iucundissima consueverit, illos aut deligere si datur, aut forte oblatos, cupide complecti soleo, qui non diuitias, & opes, ut quidam, sed pietatem, & meliorum artium cognitionem profiteri maxime videantur. eorum in numero principem illi apud me locum obtinent, qui non inopia, aut periculis coacti, sed sponte in sodalitates probatissimas, arctioresque nomina dederint. His me libentissime adiungo: horum consuetudinem plurimi facio: cum his iustos dies suauissime transigo: ab his me non nisi propter grauissimas occupationes distraho. Quid quæris? me tum demum hilariter viuere, & hac vitâ iucunde, ac vere frui videor, quamdiu aut ego cum illis mea studia, aut mecum illi sua communicant. Aliquam igitur ineundæ familiaritatis, & amicitie occasionem optanti mihi, ac sedulo quærenti, a domesticis significatum

tum est; nonnullas extra urbis huius muros locis montosis sodalitates esse, pauperimis quidem, sed inculpatae vitae, & optimæ doctrinæ hominibus refertas, quos sanctos verius, quam bonos, existimarent ij, quibus in familiaritatem eorum intimam peruenire concessum esset. verum præter Capucinos, ut vulgato utar verbo, duas esse in primis, quæ à paupertate, à sapientia, & sanctitate egregiam ab omnibus laudem referrent; alteram Carmelitanam a D. Anna, Augustinianam alteram a D. Nicolao cognominatam. Harum itaque cognoscendarum percupidus, simulque exercendi corporis studio, ut vetus mihi mos est, primo forte ad D. Nicolai ascendo; admisus non grauatus, ibi iuniores in diruendo aggere, & complanando loco, occupatos offendo, ea omnium alacritate, ut in exercendis ludis, & voluptatibus capiendis, nullos viderim alacriores; tantaque contentione, & silentio, (Pythagoræ discipulos diceres) & quod caput est præcipuumque dicendum, nudis media, atque aspera hieme pedibus, unde etiam ex calceatorum nomen duxistis, ut me quoque vel libentissimum in operis, & laboris partem traherent. Ex illis adolescentulis unus forte erat, Tiburtius nomine, optimæ indolis, & spei iuuenis, quo cum antea longa filio meo familiaritas intercesserat. Hic, post aduentum Genuam meum, ventitare ad nos cœpit cum sodalium suorum comite uno, aut altero. Tu quoque aliquando, illo comite assumpto, alloquendi, & cognoscendi penitus mei cupidus, cum ad me venisses, sermone, doctrina, prudentia, grauitate, modestiaque incredibili tua facile, quanti esses faciendus, mihi declarasti; cum ex ipso pingui, & crasso vestitu, nedum ex tot virtutibus, ipsam redoleres probitatem, quæ mihi una semper fuit,

fuit, eritque omnium, quæcumque in hac vita plurimi
fiant, antiquissima. Quid opus est pluribus? uno illo con-
gressu ita confociati, ita coagmentati sunt genij nostri,
ut iam diuinem, nihil duobus nobis fieri posse amantius,
coniunctiusque nihil: Iterum venisti, & singulares ani-
mi tui dotes mihi denuo cumulatus patefecisti. cum au-
tem illo temporis interuallo non paruus epistolarum tua-
rum liber, typis iam editus, in manus meas incidisset,
eum ita auide totum perlegi, ut neque Ciceronem ipsum,
neque maximum eius imitatore meæ ætate Paulum
Manutium desiderarem. Hic tu mihi etiam queri vide-
ris te in isto scribendi curriculo non diu esse versatum;
sed abstractum ab eo tum fuisse, cum urgendus maxime
esset stylus; idque si tibi contigisset, te non multis postha-
bendum fuisse. Vereor, ne me deludas potius, & cornicum
oculos tentes configere, quàm excusationem afferas, cur
in scribendi elegantia parum sis progressus; sed ipse de
tua scriptione longe aliter sentias. Nam docti labores
tui propter grauitatem, & copiam adeo mihi, si quid ta-
men iudicare possum, probantur, ut a summis parum,
vel nihil verius, abesse serio putem: quandoquidem, qui
tibi in latina oratione præstent, ferè nullos; qui vero te
æquent, paucissimos, mihi crede, viderim, aut legerim.
Vnde maximam tibi laudem merito peperisti; quod ex
primaria apud Genuenses ortus familia, non delitijs, ut
poteras, & voluptatibus, ut ditiorum plerique, sed opti-
mis te exercendum artibus a pueritia dedideris. quas ea
semper fama sequitur, quæ fluxis fortunæ rebus ut præ-
ferenda, ita & meritissimo immortalitati est comparan-
da. Quocumque enim rerum statu, & longo temporum
decurfu, velint nolint stulti, & inuidi, aliquid potius
accessionis

*accessionis accipiet, quàm sentiet decessionis. Sed consi-
 lium tuum, quo te alienæ potestati liberrimus, & volun-
 taria paupertati prædiues subiecisti, quis reprehendat?
 quis non potius unice probet? quis non summis efferat
 præconijs? O te prudentem ne dicam, an felicem? illud,
 quia, quaecumque in terris sunt, caduca, atque inania,
 esse cognovisti; hoc, quia tanta animi tranquillitate, &
 mentis serenitate frueris; quam mortalium plurimi
 non vident, vel potius invident; sed ambitionis, auari-
 tiæ, & voluptatis nube obcæcati, qua consequi possint,
 non intelligunt. Hinc factum est, ut ad vos semel cog-
 nitos crebro ascendam, non modò ut vegetæ senectutis meæ
 in agro vestro, ut ipse pluribus & venuste describis, do-
 na labore tuear; sed magis etiam multo, ut vestrum om-
 nium, & potissimum tuo, tamquam conuictu honestissi-
 mo, & suavisimo fruar. Videor enim mihi, cum in sum-
 mum collem euado, & subiectas pedibus terras, & cam-
 pos maris despicio, liberius, & quasi propius cælum in-
 tueri, atque illius contemplatione ab his infimis abstrahi,
 & cum cælitibus de cœlesti colloqui immortalitate. Ve-
 rum, ut clausula exordio congruat, & principio finis re-
 spondeat, æquo animo patior tuas laudatissimi viri lau-
 des ab integra, & sincera profectas voluntate, sed hac
 conditione, ut ostenderes, non quid ego mererer (non
 enim postulare, aut agnoscere tantum istud de me iudi-
 cium auderem) sed quid tu in rhetoricis non mediocriter
 exercitatus, persuadere alijs de me posses, atque efficere;
 Ceterum, qua tu mente, quæ benevolentia, ad quam
 tua omnia refero, ad me, & de me scripsisti; eodem tibi
 studio, & eadem charitate, observantiaque a me respon-
 sum esse existimato. Quod si in tuis ad superos precibus
 mei*

mei memoria tibi non exciderit, mihi gratum ita erit, ut
gratius esse possit nihil. Vale. ex nostris ædibus. Id. Feb.

AD MODVM REVERENDO PATRI
Fratri Fulgentio Baldano Eremitæ
Augustiniano.

AD arctissima amoris vincula, quibus antea ob-
stringebamur, indissolubilem Religionis nodum accessis-
se magnopere gaudeo. Nam Sanctissimi Patris nostri
Augustini ambo institutum sequimur, & ad æternam
Beatitudinem, quamvis aliqua fortasse itineris varie-
tate, adspiramus. Maximum quidem beneficium a Deo
Opt. Max. accepimus: cuius si immemores, minusque
grati fuerimus, gravissimas sanè pœnas daturi sumus.
permagni quidem momenti est a periculis procul abesse,
nulla rerum perturbatione commoueri, & dum alij in
sæculo, tanquam in mari tempestatibus agitato, fluctibus
iactantur, in tuto, & tranquillo portu se continere, &
summa perfrui tranquillitate. quamvis ex altera parte
magnum sit onus, quod sustinemus: cum propria non
modo, sed alienæ etiam salutis prospicere debeamus; nihil
prætermittere, quod ad profectum spiritualem perti-
neat; nihil vero committere, quod alijs exemplo noceat;
homines in primis propter peccata æternæ felicitatis he-
reditate priuatos per pœnitentiam in firmam illius, ac
stabilem possessionem reuocare. quæ quidem omnia ipse
facillime præstas, singulari doctrina, & vitæ integritate
præditus. quibus ego destitutus, tantum abest, ut illa
præstare valeam, ut omnia potius ferè contra, ac debeo,
omnino agam; ut Religiosi nihil, nisi habitum me reti-

G nere

nere vere, & ex animo dicere possim. inter cetera vero
 mala, quibus opprimor, torpor quidam, atque languor
 ita me saepe affligit, atque debilitat, ut, nisi aliunde re-
 medium aliquod petam, quod me recreet, atque confir-
 met, non perinde, ac debeo, in studio Summi Boni versa-
 ri soleam. at nullum efficacius remedium experior,
 quam Pij vatis de rebus caelestibus egregium carmen. &
 nulla materies magis me afficit, quam infinitus ille
 amor, quo Deus Opt. Max. homines prosequutus est,
 ut pro ijs vel acerbissimam necem perpeti voluerit. quid
 Sacrorum Poetarum lectio voluptatis, & utilitatis non
 affert. & suavi me carmine demulcet Pius, nobilisque Poe-
 ta. sequor quocunque vocat. delicta iuventutis fleo, si
 flere iubet; optata, sperataque venia gaudeo, ad gau-
 dium illectus. itaque, cum in poetica facultate ipse tan-
 tum profeceris, ut inter claros aetatis nostrae Poetas meri-
 to adscribi possis; & in ea ita verseris, ut Poemata tua,
 non tam ingenij, quam pietatis monumenta esse velis;
 ut, quae tecum meditaris, mecum quoque libenter com-
 munes, & hoc meum desiderium, quod diu celare non
 potui, aliquando expleas, te etiam, atque etiam rogo. vir-
 tutis naturam hanc esse scis, ut, quanto amplius com-
 municatur, tanto illustrior fiat; & eum, qui ingenij
 thesauros alijs suppeditat, nullam non modo inde penu-
 riam pati, verum etiam ceteris largiendo ditiores fieri.
 quod igitur a te peto, me facile impetraturum spero;
 cum id etiam te tua sponte innata tibi adductum beni-
 gnitate concessurum fuisse mihi persuadeam. quod cum
 feceris, non ideo eveniet, ut ad amorem in te meum aliqua
 fiat accessio, cum eo iam progressus sit, quod ultra pro-
 gredi non possit; at illud certe, ut me tibi magis devin-
 ctum

etum fatear; & hoc tuum beneficium mihi vtile, atque salutare futurum, quantum in me erit, commemorando tuear; alijs vero prædicando, notum, manifestumque efficiam. Vale. Genuæ in Conuentu Sancti Nicolai Tolentinatis. XII. Kal. Maij. Ann. CIO. D. C. XIII.

IOANNI NICOLAO SAVLIO
CARREGAE.

Frater Fulgentius Baldanus. S. P. D.

QVAs ad me dedisti litteras, ea tot vinculis ad te redamandum obstringunt, quot selectis, elegantissimisque verbis, atque sententijs a te fuerunt conscriptæ. in omnibus propè sillabis tuam in me singularem humanitatem declaras: maximis quoque præconijs meam indignitatem extollis: carmina denique petis. Ego amori tuo amorem actissime rependo, nemini vnquam in te diligendo secundus. In laudibus autem sileo; nam, quæ de me prædicas, de ijs eò magis tibi debeo, quò minus à me ipso agnoscuntur. sed facis tu quidem amabilius: si quem diligere instituiſti, eum dignum esse ostendis, qui diligatur. Petitioni vero tuæ, quamquam honestissimæ, haud satisfacere possum: primum, ita mihi iratæ sunt Musæ, ut se à me desertas putent: deinde, licet ex earundem Heliconio refertissimo ærario diues redirem, quid tibi conspiciendum proponerem nisi scoriam, vel cœnum? Infelix, qui, etsi à prima ætate mundo salutem dixi, attamen in ipsius illecebris, inania meditando, futile garriendo, amatoriaque carmina, & rudia quidem, effringendo, me totum consumpsi. Quamobrem quotidie meis in auri-

G 2 bus

bus illud Apostoli resonat: *Quem fructum habuisti, in quibus nunc erubescis?* Postremò licet mea Clio sacro calceata cothurno incederet, nec ubi quidem tu spectator adesses, ipsa edere modos auderet; nam & fulgentiora sidera è conspectu solis omnem splendorem amittunt. Quare te etiam, atque etiam rogo, ut ames, quod tibi præsto. *sic potius officiosus, quam operatus poeta.* Interim me excusatum habeas, quousque te frui mihi liceat visu, sicut animo fruor. Vale. Genuæ. In Monasterio. S. P. N. Augustini Septimo. Kal. Maij. MDCXIII.

IOANNI NICOLAO SAVLIO
CARREGAE.

Ludouicus Saulius Antonij Fil. Sal.

QVAs in me contulisti laudes, optime, atq; Aman-
tissime Sauli, litteris ad me missis, ut ingenue fatear,
quod res est, gaudens, mærensque perlegi. Mærens, quod
ijs me carere animi, corporisque bonis, ac virtutibus op-
time sciam, quibus me cumulatam prædicas, & insigni-
tum: gaudens vero, quod, quanta me benevolentia com-
plectaris, aperte perspexerim. Ea enim in me posita arbi-
traris ornamenta, quorum nisi te tuus in me amor singu-
laris idipsum sentire suaderet, mirum in modum
egentem, constanti forte animo iudicares. Bone Deus,
quibus me laudibus extulisti? quibus me bonis cumu-
lasti? utinam, mi optime Sauli, vera te promere,
ac recensere, quam amico pectore, firmo potius aliquo ar-
gumento comprobares; vel ipse, ut comprobare posses,
effecissem. Ego, si quid sentiam, in medium proferre li-
cet,

cet, sic statuo; hisce tuis litteris te non tam amici tui di-
 uina, ut perhibes, bona retulisse, quam praeclarum
 animi tui exemplar, & absolutam quandam imaginem
 expressisse. Veras iam diu, ac solidas animi diuitias,
 quae multis non possunt fortune casibus eripi, expetisti, &
 assequutus es, non minus tuo studio, cura, & labore,
 quam benigno naturae munere. Te enim singulari inge-
 nio, mira eruditione, & maximo latinae linguae usu (quae
 abs te mihi perhumaniter, utinam etiam vere, tributa
 sunt) quis ignorat? adde virtutis eximia ornamenta,
 quibus non minus, quam generis claritate resulges. Tu
 enim Sauliam familiam tibi, mihiq̃ue communem, tua
 excellenti doctrina, & virtute, quantum augeas, & am-
 plifies, quis non videt? Nec illud omittendum, quo te
 ipsum, Gentemque nostram non parum illustrare volui-
 sti. Vt diuinæ gloriae, tuaeque saluti diligentius consule-
 res, nomen dedisti nobili non minus, quam religiose fa-
 miliae, in qua tanta vitae integritate, morumque probita-
 te versaris, ut & Ordinis tui gentilibus praeclaram spe-
 ciem, & formam exhibeas; & honori diuino, ac tuae de-
 mum Pietati, existimatione maior in dies fiat accessio;
 dum te ipsum, & fallaces hominum spes, & inanes, ac
 breui perituros honores, ac voluptates diuina pene ma-
 gnitudine animi, atque constantia contemnis, ac refugis.
 Perge mi amantissime, ac optime Sauli, & qua te
 cœpta via ducit, tam pia, tam laudabilis, tam honorifi-
 ca, tam certa, & expedita, gressus fige, ac dirige. me
 autem fac, ut diligas, ut hactenus pro tua humanitate
 fecisti; ac tuis ad Deum precibus habeas commendatum.
 Ego vero tui nunquam obliuiscar. si quid aliquando
 me posse existimabis, id totum tibi posse, ac velle certo
 scias.

54 IO. NICOLAI SAVLII CARREGAE
scias. Vale. Genuæ. Nonis Maij. MDCXIII.

L V D O V I C O S A V L I O A N T O N I I
Filio Ioannes Nicolaus Saulius Carrega
S. P. D.

QVAMVIS in ceteris rebus errare possim, in dignoscendis tamen uniuscuiusque meritis nunquam erravi. attente inspicienti ubi sit virtus facile apparet; quæ non ita celari potest, quin aliquo splendore præfulgeat. nam vel ex primo congressu nota mihi fuit modestia tua, nota comitas, elegantia morum, ingenij præstantia, & ad litterarum studia incredibilis pæne propensio. quibus præsentibus non modo, sed etiam absentes, longeque disunctos ad te amandum, atque laudandum impellis. me vero tum virtutibus, tum in me meritis tuis impulsus, quid facere par est? nisi enim tui amore incendar, teque laudibus ornare coner, profecto ingrati animi vitio, vel malevolentia suffusus, laborare videar. ac utinam amor in te meo responderet ingenium: profecto, quemadmodum multis nominibus laudabilis es, ita meritis à me laudibus ornatus iam esses. quod secus factum est in ea ad te iam pridem scripta epistola; cum ex ipsis virtutibus tuis paucas tantummodo selegerim easque ut malus artifex adumbraverim potius, quam verius expresse-
rim. Quod si, ubi desit ingenium, amoris abundantia non suppleat; nemo est hominum, qui me uno inferior sit. hoc me tamen consolatur, quod mendacij non arguar, cum eorum, quæ de te dixi, ipsa mihi veritas testis futura sit; nec tam multa dixerim, ut non multo plura per eam mihi licuissent. neque enim corporis bonis, aut externis
com-

commoueor, quæ veluti flosculi celerrime deficiunt, & tibi cum multis communia sunt; sed bonis animi, quæ aterna sunt, & verè tua propria dici possunt. ijs enim homines metiri soleo, cetera, ut multis & vitæ, & animæ periculis obnoxia, paruipendo. hæ vero animi dotes, quæ in homine vere bona dicuntur, cum in me nullæ prope sint, miror, cur eas in me laudes contuleris, quas si agnoscerem, & despere, & me prorsus ignorare viderer. Scilicet ego Familiæ Sauliæ, & huic Augustinianæ, quam profiteor, splendorem affero. quis, & quibus rebus? illæ quidem, ut apparet, claræ, atque illustres; ipse autem obscurus, atque ignotus. Sed non sine causa id te fecisse arbitror. nam cum tui amantem non redamare haud æquum esse existimes; nec vllum ames, qui amore tuo dignissimus non sit; me excitas, & acuis, ut in dies meliorem me reddam, ut in eorum numero esse possim, quos merito amas. profecto efficiam, ne me frustra admonuisse videaris, cum quiduis potius mihi perpeti certum sit, quam ut amore, & amicitia tua excludar. Sed de his hactenus. Superioribus diebus, cum desiderium consuetudinis tuæ diutius ferre non possem, ad Albanam Villam, ubi tu rusticari solitus es, me conferre cogitabam; sed varijs religiosæ vitæ occupationibus ita impeditus fui, ut, ubi mente adfui, corpore præsens esse non potuerim. Et nunc cum iisdem urgear impedimentis; nec tui videndi, & alloquendi facultatem habeam; peterem a te, ut vel amicorum vicissitudini aliquid dandum existimans, vel legendi labore fessus, animi relaxandi causa ad D. Nicolai te conferres; sed petere non audeo, quod me assequuturum non spero, non voluntatis tuæ vitio, sed temporis, cum tristissima desæuiat. hiems,

&

& omnia gelu, ac niue obtegantur. nihil igitur superest,
 nisi bonum epistolæ, quæ nos corporibus disunctos, ani-
 mis coniungat: etsi illius suauitas tanta non est, ut
 cum ea suauitate comparari possit, quam ex vultu, &
 oculis amici percipimus, varios animi motus præseferen-
 tibus. Sed quanto diutius a te absum, tanto sæpius de te
 percunctor; gaudeoque, cum ab omnibus omnia bona
 de te intelligam. Familiaris enim tuus mihi nuper affir-
 mauit te in Germanica lingua tantos progressus facere,
 ut Germanice iam perfecte loquaris, & scribas; idque
 ipsi præceptori tuo planè admirationi esse. multas scire
 linguas laudabile est; sed cum tanto studio hanc tam fe-
 ram, nobisque Italis nimio plus asperam didiceris, nescio
 quæ mihi suspicio incidit, quæ me angit vehementer, at-
 que cruciat. nam quantum ego intelligere possum, tibi in
 animo est vestigia sequi Ioannis Ambrosij Aurie Viri
 plane heroici Auunculi tui, & in Germaniam proficisci.
 quorum alterum laudo, alterum vero nec laudo, nec pro-
 bo. in altero tua mihi gloria optabilis est, in altero inco-
 lunitas tua charior est. nam illius cæli grauitatem, quæ
 huius nostri temperies est, nullo modo ferre poteris. Sed
 fac, ut possis. omnis ergo humanitatis oblitus amicos, &
 Patriam aspectu tuo priuabis? aliam probanda virtutis
 tue occasionem haud datum iri fortasse suspicaris? hæc
 mihi dictat meus in te amor, qui te Patriam relinquere,
 & procul abesse nollet. ceterum absit, ut, quod tibi ad
 gloriam natura iter patefecit, illud ego velim interclu-
 dere. utere sorte tua; & Auunculum tuum aut præce-
 dentem sequere, aut præuius antecede. Interim ego
 Deum precabor, ut quidquid incæperis, ex voto tibi
 procedat; nihil vero incipias, quod non ad Dei ipsius
 gloriam,

gloriam, & animæ salutem referri omnino possit. Vale.
Genue. XVIII. Kal. Ianuarij. MDCXIII.

ANSALDO CEB A.

EX QVO tempore tua mihi virtus cognita fuit, dilexi te vehementer, & colui. creuere postea cum ipsa virtute meus in te amor, & obseruantia: ad summum denique perducta sunt, cum te multo libentius honores, & dignitates contemnere vidi, quam alij expetant; & sacris addictum illud vitæ genus sequi, quod est totum in Dei gloria augenda, animæque salute procuranda constitutum. cum vero Romam e Patria discessissem eo consilio, ut uni mihi & Deo viuerem; & septimus ferè sit annus, cum in hanc D. Augustini Discalceatorum Familiam nomen dedi, loci, atque vitæ mutatio facta est, non amoris in te mei, & obseruantia. reuersusque in Patriam quatuor ferè post annos, nihil antiquius habui, quam ut ex amicis de te, rerumque tuarum statu diligenter exquirerem. ex quibus cum ea intellexissem, quæ multo ante cognoueram, aut euentura prædixeram, voluptate potius, quam admiratione affectus sum. ea vero ut ipse sine molestia audires, a modestia tua haudquaquam me impetraturum sperarem. illud in primis auditu gratissimum fuit, te scriptis tuis iam editis ita manus admouisse, ut ex eis quædam detraxeris, multaque addideris, & ea non parum aucta iterum imprimenda curaueris. quæ cum antea eximio Poesis amore flagrans sæpe legissem, mox tamen ea iterum legendi tanto desiderio sum incensus, ut haud quiescere potuerim. donec eorum mihi copiam feceris. Itaque nunc quidquid

H otij

otij à studijs sacris mihi conceditur, id totum in tuis scriptis peruolutandis libenter pono; cum & varietate rerum, sententiarum grauitate, suauitate carminis me mirificè capias; & siue Clarorum Virorum laudes persequeris, siue amicorum funera defles, siue de rebus superis, ac cœlestibus loqueris, mirifica iucunditate persundas. quin etiam in animum meum bona quædam semina spargis, quæ æternæ vitæ fructus deinceps allatura sunt. quantum ex tuis scriptis ad clarum Poesis decus splendoris accefferit, res ipsa indicat, indicabitque magis, cum illud maiorum vigiliarum opus, Poema scilicet tuum, in lucem prodierit. certe si laurea corona summo Poetæ danda sit eam tibi omnino deberi nemo infitias ierit. quamquam hanc lauream in extremis habeas, quæ caducis frondibus ornata hic comam vatibus cingit breui tempore peritura; illa vero tibi prima sit, quæ magnis meritis parta, huius mundi victoribus in altera vita imponitur, nunquam viriditatem amissura. sed ab instituto meo paululum recessi, cum de tuis ipse laudibus nihil in præsentia attingere decreuerim. in ipsis tuis scriptis vidi, ut in tabula picta, statum nostræ Ciuitatis, de qua cum mihi absenti tristitia quædam nunciarentur. ea magna quidem, & acerba audienti erant, sed multo maiora, & acerbiora fuisse videnti velim existimes. incredibile est quam mihi in Patriam redeunti omnia conuersa, immutataque visa sint. noua ornatum rerum facies oculis meis obiecta est: miratusque sum novos mores, noua instituta, nouamque viuendi consuetudinem. ut, hinc noscere possimus, quàm facile terrena omnia fluant, atque labantur, nec diutius vno eodemque statu consistent. quæ cum sibi mutuo ruinæ materiam præbeant, multas
secum

secum miseras, atque erumnas afferunt, quæ prius nos sæpe opprimunt, quam eas omnino venturas animaduertamus. iam amicorum qui euentus, quam vari, quam inopinati? cum alij Patres familias appellari pulchrum existimantes uxorem duxerint, alij vitam cælibem. Matrimonio præferentes in aliquam Religiosam Familiam nomen dederint, nonnulli vero, vitam hanc breuem, illa æterna commutantes, diem suum extremum obierint. inter quos fuit Paulus ille Monelia, vir florenti ætate, nobilitate, opibus, Iurisprudentia, & eloquentia clarus. cuius ego mortem ita dolui, ut neminem charissimi fratris mortem magis doluisse crediderim. Eo enim amoris vinculo inter nos coniuncti eramus, ut alter alterum in germani fratris loco diligeret. complures erant in eo viro eximia, præclaræque virtutes, quibus omnium amorem sibi conciliabat; sed pietas in Deum, qua tanquam fundamento omnes virtutes innituntur, longe ceteris antecellebat; eamque ipse magis adamabat quippe qui probe norat doctrinam sine innocentia haud magni faciendam esse; nec vllum litteris probum esse posse, nisi probis etiam moribus præditus sit. Et hanc ipsam virtutem, non tam verbis, quam ope, & opera probabat, loca sacra libenter inuisens, eaque multis muneribus ornans, oblata occasione auide amplectens, in qua ea augere, & tueri posset, quæ ad Dei gloriam pertinebant, cui ut omnino placeret, & illius voluntatem exequeretur, illi præcipua semper, ac summa cura fuit. quid verbis opus est? non ne Moneliæ gentis pietatem, religionem satis testatur nouum illud, atque præclarum Diui Nicolai Tolentinatis Templum ab ipsa tam magnifice conditum? illius quidem memoria nulla vnquam vetustate delebitur,

H 2 tur,

tur, in animis hominum perpetuo viuet. de quibus, & litteratis praesertim tanto benemerendi studio incensus fuit, ut eorum commoda priuatis commodis semper habuerit potiora. fuerat in Belgio per aliquot annos, & cum doctissimis viris, quorum illa Prouincia feracissima est, amicitiam contraxerat. hos postea in Italiam venientes domum benigne recipiebat, consilio iuuabat, opibus fovebat, idque tam prompte, atque alacriter, ut illius non tam domum, quam animum sibi patere facile intelligerent. sed ex ijs nullus erat, quicum arctiori amoris, & amicitiae vinculo astrictus esset, quam cum Iusto Lipsio aetate nostra litteratorum facile Principe. hunc praeter ceteris amabat, illiusque libros de manibus ponere nunquam solebat. quod summa inter illos animi, & voluntatis consensus fuerit, utriusque scripta declarant; quod alter alterum animo pene insculptum gestauerit; effigies, quam alter alterius in tabula domi habebat, aperte ostendit. Omnino fuit Paulus noster erga litteras, & litteratos homines egregie animatus, cum ipse quoque litteris maxime excelleret. quae quidem iam inde a prima adolescentia ita illum delectarunt, ut una cum aetate delectatio adoleuerit, & huic delectationi ceteras ipse voluptates antetulerit. bibliothecam habebat varia, magnaque librorum copia refertam: in quam se se abdens a lectione, & scriptione nunquam cessabat; adeo ut, in litteris prorsus viueret; immo nulla ei esset vitae iucunditas sine litteris, quin etiam ipsa litterarum studia, sibi vitam esse fatetur. Iurisprudentiam, atque eloquentiam simul coniunxerat, non ut Dominam, & Ancillulam, sed ut vnanimis sorores, quae sibi mutuo auxiliarentur, & administrae, comitesque essent immortalitatis, & gloriae. erant in eo,

in eo, ut ornamenta pacis, non instrumenta litigij, cum in ijs non quæstus, sed animi causa se exerceret, & ut amicis, & Reip. quam vnice amabat, si occasio tulisset, præsidio esset, atque adiumento. a qua cum multis honoribus decoratus esset, nihil magis in votis habebat, quam ut ei optime de se merenti aliquam gratiam referret. idque nulla re facilius, quam præclaris illis artibus Iurisprudentia inquam, & eloquentia, effici posse existimabat. in quibus cum pariter excelleret, & utriusque studio vehementer teneretur, nescio quo pacto magis eum eloquentia delectabat, eamque ipse pluris quotidie faciebat. credo, quod pluris apud eum erat ea eleganter scribere, quæ alij admirarentur, quam ea admirari, quæ alij tam barbare scripserint. habebat tamen sua quæque tempora ad omnia constituta; adeo ut eloquentiæ non ita operam impenderet, quin his quoque rebus inuestigandis, quas natura tenebris inuoluit, cogitationis aliquid impertiret. quæ vero ingenij monumenta reliquit, cum omnium iudicio, & assensu comprobata sint, nec mea, nec cuiusquam indigent laudatione. ac utinam diuturnior ei vitæ usura contigisset; egregiam profecto hystoriam, quam scribere meditabatur, nobis daturus fuisset. & tantis tamen animi, ingenijque bonis ornatus, acerba mortis violentia, veluti flos turbine ictus, nobis repente sublatus est. nimirum mors nemini parcit, siue seni ingrauescente, siue iuueni florente ætate. non eloquentia, valet, non opes sufficiunt, nec generis claritudo, aut vlla potentia, aduersus illius vim, potestatemque, quidquam possunt. ut ille magnopere laudandus sit, qui ita sibi tempestiue consulit, ut ab illa imparatus haud possit offendi. infaustum, atque infelicem plane dixerim illum diem,

diem, qui omnem mihi voluptatem in dolorem conuertit. cui quidem tantum abest, ut ipsa dies medeatur, ut eum potius acerba sane recordatione identidem renouet. itaque, quo magis eum conor recondere, eo maius illius indicium foris præbeo. quippe tantum vulnus omnino dissimulare, vel obliuisci, in mea potestate haud esse sentio, cum ad illud sufferendum debilior sim, quam alius quisquam sit. quod quidem cum sex annorum spatio, iam plane obductum esse oportuerit, recens tamen illud ita experior, ut prope vulnus in vulnere mihi infligi videatur. & sanè, quamquam multis illius quidem interitus luctuosus fuit, nulli tamen luctuosior accidit quam mihi, Ansalde, qui ex illius doctrina maximam utilitatem, ex consuetudine vero non mediocrem voluptatem percipiebam. mihi venit in mentem illius temporis, cum sermonem in multam diem producentes de litteris colloqueremur; orireturque inter nos suavis quædam contentio, cum ille in latina lingua me sibi anteponendum diceret, ego contra ne comparari quidem posse me affirmarem. scribebat enim ipse luculenter, & egregie, ut omnes norunt, pæne lipsiano stilo, & alijs ad scribendum animos faciebat. mihi vero huius linguæ desiderio iam multum flagranti ita veluti faces addiderat, ut illius pulchritudine magis deinceps inflammatus fuerim. sed tantum abest, ut, opinioni, quam de me conceperat, quamque aliorum animis imprimi optabat, unquam responderim, ut ea potius me indignum præstiterim, eamque omnino sefellerim. itaque cum inter illius amicos essent etiam præstantissimi viri Abbas Tritonius, & Pater Castellus, Amplissimi Cardinalis Montalti alter a secretis, alter vero theologus; & ad eos magis amice,

quam

quam vere multa de me scripsisset, verendum erat, ne, si veritas ipsa cognita esset, illius iudicio in discrimen adducto mihi quiduis potius, quam decus pareretur. Sed quantulacunque in me est dicendi facultas, & copia, quam ego prope nullam esse fateor, utinam & ad eum viuum laudandum, non mortuum lugendum nunc uti possem. id ego equidem libenter facerem ut, illius in me amoris quo ipse adductus, eum me esse existimabat, qui re uera non sum, ipso viuentem, atque cernente, aliquam gratiam referrem. & certe si tempus spectemus, quo ille in vitam introiuit, & viuendi cursum a natura circumscriptum, non illi tam cito mortis limen subeundum, atque de vita exeundum fuerat. animus quidem nescio quid mali presagire mihi visus est bibliothecam meam, libros inquam, amores, & delicias meas illius fidei commendanti cum de alterutrius morte mentio facta est, ac equidem fore sperabam, ut, quemadmodum illi meum de nouo vitæ statu eligendo consilium patefeceram, ita in hoc ipso statu illius, ut antea, consuetudine fruerer, & ambo in ipsius villulis, siue in Carbonaria ad D. Nicolai siue in Castelletta ad D. Annuntiatæ una iucundissime viueremus. Sedeam me ipsem nunc fefellisse video & dulcissimos illius sermones frustra requiro. de quibus quidem nihil mihi aliud restat, quam amantissima illa verba, quæ paulo ante interitum protulit. meus inquit & me nomine appellabat in suscepto vitæ genere perseuerabit; noui eum sed eum amplius in terris visurus non sum. quæ quidem verba ita mihi hærent, ut prius immemor mei futurus sim quam illa unquam ex animo meo excidere patiar. Sed nimio plus dolori forsitan indulgeo, & quenam vera sit tanti mali medicina, non
dispi-

dispicio. ille mortalis cum esset, mortalem sortem subire debebat; satis diu vixit, quia recte, & laudabiliter vixit. non ille exstinctus, sed meliorem in locum commutatus, aeterna Beatitudine fruitur. itaque illius casus lætandus magis, quam dolendus videtur. illius mens spirat in scriptis; viuit in fratris, sororisque filiis, illis summa exspectatione adolescentulis, istis vero summa iam virtute adolescentibus. inter quos Paris Fossa, præter nobilitatem, tantis animi, ingenijque dotibus excellit, ut eas ab Auunculo, quasi hereditario iure creuisse videatur. qui quemadmodum illius perpetuus, & indiuiduus comes fuit, ita nunc ipsum in conspectu meo adeo ponit, ut eum quasi præsentem videar intueri. hæc & alia occurrunt, quæ me quidem consolantur, quo ad illam hominis partem, quæ in ratione posita facile acquiescit; sed quo ad illam alteram, quæ sensui subiecta est, in luctum, mœroremque sæpissime recido. te igitur rogo, ut me afflictum carmine recrees, iacentem excites; & simul ad propagandam Pauli Moneliæ memoriam aliquid temporis conferas. est animi ingenui, ut suis, alienis calamitatibus commoueri, & virtutem non modo in se ipso colere, sed etiam in alijs, meritis laudibus celebrare. nec aliud ferè studes in tuis scriptis, quam Clarorum Virorum res gestas immortalitati commendare, & hominibus aliquo casu oppressis alleuamentum aliquod afferre. hinc eueniet, ut Deo Opt. Max. rem gratissimam facias, optimum charissimumque amicum hac foris petita gloria augeas, ac me tibi in perpetuum summo beneficio obstringas. Vale. Genuæ. XIII. Kalend. Augusti. Ann. MDCXIII.

IO AN.

IOANNI NICOLAO SAVLIO
CARREGAE.

Dominicus Stotius. S. P. D.

QVAE in rudi ingenio mei officina lucubrationcula
 Oratione ligata, pedibusque deuincta ex tempore prope-
 modum fuere exarata, ea ultima cum non sint lima li-
 mata, atque perpolita, adeo ut sibi egregij ingenij tui
 Heraclius lapis non sit pertimescendus; verecundo suf-
 fusa rubore, manibus, & pedibus, ut aiunt, detrecta-
 bant tuum iucundissimum adire conspectum. Haud
 enim poteram ex earum mentibus diuellere, se non esse
 in Critici manus casuras, qui docto nimis perstringeret
 ungue. At pro meis tandem viribus, humanitatis, ac
 beneuolentiae tuae plana admodum facta via, earum, ut
 addito gradu ad te properent, animum allexi. Si modo
 eas suis examinaueris ponderibus, & quas non equa-
 fueris lance nactus, in disquisitionem vocaueris, vulgare
 apud me non pones beneficium. Vehementer enim aueo,
 ut peracuto ingenij tui singularis scilicet al pello refeces ad-
 imum quod refecandum, ultimaque lima limes, quod
 limandum, atque perpolias, quod est perpoliendum, ut
 lucernam oleant. Quae enim chartae mando, cum innu-
 meris ferè occupationum fluctibus obruar, demorsos non
 sapiunt ungues. Vale. Genuae. decimo. Kal. Iulij. Ann.
 Christi Natiuit. MDCXIII.

I AD

AD DEIPARAM VIRG. EP.

ex Cant. IV. Tota pulchra es.

PULCRVM aurum legit extremis Arimaspus
in oris,

Pulcher, & irriguus nobilis hortus aquis.
Pulchræ florescunt Arabum per littora gemmæ,
Pulchra nitent puro sidera clara polo.
Pulchra per herbosas sublucent lilia valles,
Pulchra damascenis & rosa lucet agris.
Pulchrrior at Virgo es multo, & formosior omni
Auro, horto, gemma, Sidere, luce, rosa.

AD VIRG. PEREXIGVVS

laudum panegyris.

VIRGO puellares inter pulcherrima turbas
Aspice nos; miseris si datur inde locus.

Stella maris, regina poli, pietatis alumna,
Angelici princeps virgo beata chori.
Virgo Dei benedicta parens, speciosa puella,
Vnica tu nostræ causâ salutis aue.
Arca Dei, diuina domus, formosa columba,
Albaque purpureis lilia mixta rosis.
Palma virens, cœlestis odor, viridisque smaragdus,
Thura, faui, violæ, florida vitis aue.
Cedrus odora, quies tutissima, sponsa Tonantis,
Cœlestique madens rore columba Dei.
Flos sine labe nitens, campi prædulcis oliua,
Cinnama, mirrha, rosæ, balsama, nardus aue.
Tu conclusus ager, viuæ tu riuulus vndæ,
Inque

Inque domos superas fons salientis aquæ.
 Clara dies, aurora micans, rutilansque piropus,
 Virgo primæuæ nescia fordis aue.

ADMODVM REVERENDO

Dominico Stotio.

Ioannes Nicolaus Saulius Carrega. S. D.

ET AD scribendum me prouocas, & triplici armorum genere utesis, epistola, carmine, amore. qui tibi belligerando par esse possum? cum ea ipsa arma ex Palladis officina deprompta, selectaque sint, tuque ita strenuus, ut non tibi quisquam alius huiusmodi bello se conferat; ego contra ita ignauus, ut non alius ipsius belli artes ineptius teneat? quid inermi, ac plane nudo cum egregie armato? quid tironi cum robustissimo? victus igitur tibi cedo, manumque porrigo. tu prostrato, ac supplici ni parceres, nimis durus, ac ferreus esses. quæ quidem nomina haud tibi conueniunt, cum quantus quantus sis, nihil nisi humanitas sis. Sed quamuis alijs rebus me vincas, amore tamen nunquam vinces: nec patiar, ut tu me magis ames, quam ego te; aut plus in te, quam in me amoris resideat. Sed in his domesticis pugnis, in quibus pulchrum est vincere, & non turpe vinci, nullus occumbit. alia pugna instat acris, & periculosa cum illo humani generis immanissimo hoste, qui omnes insidias, conatusque omnes in nostram perniciem parat. nos miseros, quot homines ab ipso illaqueantur? quot in ima tartara misere detruduntur? nos, qui in munitissimam Religionis arcem nos contulimus, vix tuti sumus ab illius odio, atque crudelitate. cum eo litteris,

I 2 aut

aut artibus certandum non est, sed contemplatione, ieiunij, carnis maceratione. ad hanc pugnam me instruas velim, Dominice; quo facilius acerrimi bellatoris insidias declinare, conatusque reddere inanes possim. quid mihi profuit tantis me laboribus in latina lingua exercuisse? quam mercedem accepi? cum praesertim, ut omnia fecerim, propositum haud assequi potuerim. & nunc quid mihi prodesset, commendationem non a litteris, aut vulgi opinione, sed à pietate, & religione, ut par est, ducere cupienti? iam tempus est, ut ego ex longo somno surgam, meque colligam; & quod religiosi viri officium sit, diligenter considerem. ita ut nihil aliud, quam quod ad Dei gloriam pertinet, & propriae, aliorumque salutis conducit, cogitatione, & mente complectar. Spero fore, ut hoc meum consilium non modo laudes, sed etiam probes; mihique auctor sis, ut in eo, dum vixero, constans, stabilisque permaneam. quod si ad Ansaldum Cebà, in funere Pauli Monelia, quam legisti, epistolam scripsi; id ut facerem, urgebat amor, pietas suadebat, quibus ipsum Moneliam, & viuum observaui, & mortuum colo. quamobrem ut mihi ignoscas, rogo, si diutius fortasse, quam voluisses, ad litteras tuas responderim, cum id non obliuione tui, nec amoris, aut officij neglecti culpa contigisse videas. ignoscat etiam mihi velim Ioseph Araldus adolescens singulari virtute, & probitate praeditus, qui, cum epistolam mihi tuam, & carmina attulerit; & instituendae inter nos amicitiae auctor exstiterit, aliquam fortasse ex diuturno silentio meo molestiam percepit. ceterum & epistolae, & carminum mihi iucundissima lectio fuit; in quibus tot ingenij, & eloquentiae lumina elucent, ut ea facilius admirari, quam iudicare possim.

possim . quamuis nulla re magis commendari debeant ,
 quam splendore argumenti circa Deiparæ Virginis lau-
 des versantis . De hac poetica , atque oratoria facultate
 magnopere tibi gratulor , cum in ijs pariter excellas , &
 ex utraque maximam tibi gloriam compares . quam
 paucis vero contingat , ut oratione soluta , & carmine
 præsent , nemo ignorat . Et quando tantam virtutis præ-
 stantiam consecutus es , æquum est , ut impertias eam
 alijs , communiquesque cum amicis . in quorum numero
 cum ego sim , & esse me vehementer gaudeam , expoli-
 tionem tuorum scriptorum auide exspecto ; ut quam mi-
 hi sit ipsa tua scripta incenderunt , ex ipso fonte sedare
 valeam . Sed nolo esse longior , laconismum tuum aliqua
 ex parte imitaturus . quanquam qui possum , cum in epi-
 stola tua , verborum prope numero sententiarum nume-
 rus respondeat ? ut cohæreant extrema cum primis ;
 quando hunc amoris , & amicitiae campum ingressi su-
 mus , amore inter nos certare velimus , alter alterum ,
 quandiu vixerimus , constanter amaturi . ego quemad-
 modum de amore ne tantillum quidem tibi concedo , ita
 spero fore , ut amor in te meo , & vita mea , unus idem-
 que sit finis . Vale . Genuæ XV . Kal . Sept . MDCXIII .

IOANNI NICOLAO SAVLIO
 C A R R E G A E .

Dominicus Stotius . S . P . D .

QV I D caperata fronte cudis in officina ingenij tui,
 mi Dominice ? Hem non subolet aliud armorum genus
 tibi cudendum , si cum Francisco in arenam descenden-
 dum ?

dum? Aliam queso capeſſe pugnam; nam Lydum in planiciem prouocas, ictu primo ictus cades, dabis manum maximo cum tuo dedecore. Heu noſce primum, quibus digladiandum gladijs, ne tuo te gladio inſtigas. Nonne quo primum die cum eo collocutus, ex fronte, ex oculis, ex vultu toto, tanquam in picta tabella eius animi patuit effigies? firmiora alia oportet arma condas, maioresque admoueas arietes. validiſſimam enim eius modeſtiae, ſummiſſionis, urbanitatis, eximiaeque humanitatis arcem quaterere, ac ſubruere, perdifficile eſt. Fateri enim uero cogor, me hactenus nocturnos herbeosque oculos attuliſſe ad intuen- dum, quod praelium erat ineundum. Imparatum me offendiſſes, ni me lyncei oculi admonuiſſent. exploratum ſane quidem habes, mi Francisce, quam parata, & expedita ſit via ad egregiam, inuſitatam, & eximiam virtutem; & ad victoriam omnium victoriarum clariſſimam, & preſtantiſſimam. Quid enim laborioſius, quam mentis faſtus edomare, attollentes ſe ſpiritus, inſlatumque ſui admiratione, animum comprimere? Nam in preſtantibus ingenijs gloriae appetitus innas- citur facillime; quod haud obſcure innuit aureus ille eloquentiae fluuius, cum off. 1. teſtatur eſt; In maximis animis, ſplendi- diſſimisque ingenijs plerumque exiſtunt honoris, imperij, potentiae, gloriae cupiditates. Nulla igitur virtus bene literato, ac potiſſimum Chriſtiano homini aeque neceſſaria, nulla commodior, nulla pulchrior, & ad nominis celebritatem concilian- dam accommodatior, quam modeſtia, animusque de ſe ſummiſſe exiſtimans. Multo eſt melior, Deoque, & hominibus gratior modeſta inſcitia, quam ſuperba ſcientia. Si vera fateri volo; cum ad animi Francisce
ſingu-

singulares dotes contemplandas oculos conuerto, totus sum in stupore. Quid supercilium ponit, qui tanquam lucifer quidam nostra ætate exortus, sua luce barbariei caliginem ex oculis nostris discussit, scribendique perfectione ad priscorum præstantiam quàm proximè accessit, cuius libri ab omnibus, & humanitatis, & latinitatis studiosis accuratissime sunt legendi? Etenim in illis domicilium habet cum dignitate gravitas, cum subtilitate elegantia, cum varietate iucunditas, cum ubertate fructus. Apparet liquidò in illis variarum doctrinarum recondita eruditio: fulgent graues, maximique ponderis sententiæ: enitescit mira orationis festiuitas, quæ legentium mentes allicit, & sine ulla satietate, tædioque permulcet. Quid mirum? ex priscorum illorum aureis fluminibus in agrum suum uberes deduxit riuos. Omnia enim, quæ in eius continentur libris, plena sunt succi, plena sanitatis, plena cultus, æquabiliter fluentia, aptis illigata numeris, multisque distincta luminibus. Nihil inest abiectum, nihil obsoletum, nihil asperum, nihil improprium, nihil longius ductum, nihil obscurum. gratulando enim est sincerus, petendo verecundus, iocando urbanus, Gratias agendo nullius meriti oblitus, commendando sollicitus, narrando apertus, monendo non fictus, non simulatus. Quid plura? Quæ ex ore eius fluunt, ex Gratiarum hortulis sunt excerpta, atque, ut rem paucis expediam, quoties primoribus (ut aiunt) labris eius lucubrationes attingo, nectaris florem, mellis medullam, attica bellaria, mihi videor delibare. At orationis meæ filum abrumpit mirifica, eximiaque eius modestia. quæ de suis laudibus prædicantibus vacuas aures denegat, aliorum tanquam suis fauet, honores non sitit, immò

immò iure meritò delatos reuult. Idque re ipsa experior, quò magis omnes animi, ingenijque mei vires in eius prædicationem effundo, eo magis inopem copia fieri. Accedam igitur ad acerrimam pugnam, quæ nobis impendet cum inimico, ac vexatore hominum iniquissimo. Quid secessu aptius? Quid solitudine accommodatius ad virtutis, & sapientiæ capeffendam contemplationem, in qua, ut doctrina auctiores, ita meliores euadere quimus? Hanc igitur existimo sic medullis omnibus adamasse qui apud priscos mortales insignem celebremque eruditionis, & apud Christicolas immensam, eximiamque sanctimoniam famam ad posteros affatim propagarunt. Nota tibi fuit anachoresis Paulli, Antonij, Arsenij, aliorumque præterea centum millium, in terris cœlestem vitam degentium, qui ad hæc diurna, nocturna que proelia satis, superque ab armis instructi erant. Tunicas induerant admantinas, arcum gestabant venenosissimis sagittis tinctum, fulgentibus, micantibusque gladijs accincti incedebant, caputque insigni galea cooperatum gerebant. Quisnam inficiari potest, quin optimum tibi vitæ genus elegeris, qui in eorum vestigijs pedem ponis? Heu quot, quantisque petitionum periculis hominum vita exposita sit; quotusquisque magno suo malo experiri cogitur. Quis non his lacefsitur stimulis? quis hos non sentit aculeos? quis subiectis non vritur ardentibus flammis? Et tam varij sunt incursus, & tam diuersæ sunt aggressiones, ut difficillimum sit grauem aliquam plagam non accipere. In singula enim queque temporis momenta expugnare nos nititur colluctor ille noster, malorumque omnium seminator Satan. Siquidem nouit optime, cui sunt faces cupiditatis admouende,

cui

eui gula fræna remittenda, cui libidinis feruores, atque æstus excitandi, cui liuoris virus infundendum, qui mærore ungendi, qui gaudio contaminandi qui metu transgendi: cuiusque animi affectiones, atque commotiones ad unguem consequitur. Si, quæ hisce ictibus sunt applicanda remedia, tibi traderem, non aliter, ac Sus Minneruam, docere viderer. Ineptus adeo ne sim? ut aquam in mare? in siluas ligna? Athenas noctuas? Obarma, tu me, mi Francisce, præbe scutum, suffice tela, & quo pacto stygium illum Leonem rugientem, qui circuit, quem deglutiatur, ferire, eiusque neruos eneruare, atque immanissimas fauces retundere queam, edoce. Etenim precum, laborum, vigiliarum, abstinentiæ, continentia, castitatisque præsidia, quibus potissimum vos suffulti estis, mirum in modum perfectè vos erudiunt. De meo in te singulari amore litteras dabo; cum aliquid vacui temporis mihi relictum erit. Vale.

AD MODVM REVERENDO PATRI
Fratri Francisco Mariæ Genuensi
Capuccino Alexandriam.

Mihi dubium relinquatur, plus ne voluptatis afferat, quod aliquo bono nobis frui contingat, an doloris, quod eo ipso paulo post nobis carendum sit idque cum sepe in alijs rebus, tum in amicitia tua maxime experior; cum maximam letitiam, quam ex tua consuetudine capiebam, maxima illico tristitia ex discessu consecuta sit, & utra utri præponderet ignorem. at illud certum, quod pium consilium, tuum, & memoriam tuæ consuetudinis iucundiores, & discessum tuum, qui me val-

K de

de afflixit, leuiorem facit. Illa tacita viuebat sub pectore cura, quomodo a Mundo longissime disunctus, D.O. M. arctius te coniungeres, & illius amore ardens, ac saucius ad istam Religiosissimam Familiam, quasi ceruus sitibundus ad fontem accurreres. nec in cursu p*y* consilij cunctatus es, eo quod nobilissima Auria Familia natus sis; aut quod Maiores tui cum imperio populis prae fuerint, ac Frater natu maior nunc etiam praesit; aut denique quod Eques Hierosolymitanus factus, ad eam gloriam viam tibi munires, quae illius amplissimi Ordinis propria est; sed haec omnia tanquam impedimenta reiecisti, ut nudus Christum nudum expeditius sequereris. quo quidem facto declarasti te non ita candida illa Cruce pectus foris adornasse ut non multo magis eandem ipse intra praecordia condidisses. & eo ipso die fructum cepisti maximum pietatis tuae erga Deum, quo ista noua lux oculis tuis effulsit, ut in tantis humanae vitae tenebris, in quibus plerique offundunt, quid sit optimum, plane videres, & ad illud exequendum animum, cogitationemque conuerteres. nec in delectu Familiae peccasti, cum eam inter omnes elegeris, quae a tenuibus initijs, doctrina, & sanctitate eo magnitudinis excreuit, ut ubicunque terra maris fluctibus alluitur; aut etiam solis radijs illustratur, nomen extenderit, & innumeraibili prole facta sit parens. in hac autem Familia spero fore, ut usque ad extremum ipse permanear, hic Domum, hic Patriam inuenias; efficiasque ne minus illa tibi, quam tu illi debeas. qua laetitia perfrui, quibus te gaudijs exultare credendum est, cum sub vexillo Beatissimi illius Patris Francisci spiritualia stipendia mereas? fuit ille Dux in Christi militia, & Antesignanus egregius,

gius, eoq̃ue sanctitatis peruenit, quò ne cogitatione quidem adspirare possumus. inaudito, ac stupendo Sacrorum Stigmatum dono in primis insignis. quamuis nobis quoque non minus gloriari liceat, qui sub auspicijs Magni Patris Augustini Deo seruimus, & ne ingrati, ac degeneres Filij simus, quantum possumus, operam damus. Sed de tanto Patre parcius loquor, ne ambitione potius quadam, quam veritate impulsus eum laudare videar. quamuis nihil opus sit laudatore, cum præconium nullum, nulla laus, nulla gloria tanta sit, quæ non illi cum merito debeat, tum ultro deferatur. Sed quid nobis proderit, si de laudibus Sanctorum disseramus, de illis vero imitandis nihil cogitemus? si illos sanctitate floruisse memoremus, nos vero illis omnino dissimillimi simus? tanto maiora meremur supplicia, quanto meliores in via Dei Duces habemus, si eos nobis exemplo præeuntes non sequamur, sed de eorum curriculo declinantes alium cursum teneamus. hæc mihi intus cano, qui a perfectione Religiosa tam longe absum, quam tu eam prope contingis. nam, quamuis vitæ tuæ habenas mihi tradidisses, ut eam in rebus spiritualibus arbitrato meo moderarer, ac regerem, æquius tamen erat, ut me potius discendi discipulum, quam docendi magistrum haberes, & ego ad imitationem tui nouum genus, cursumque viuendi dirigerem; ne cum ego semitam ignorarem, tibi recto cursu eunti viam viderer demonstrare. Sed quid ego sum quidquid valeo, quamuis utrunque nihil plane sit. id totum tibi fuisse, & præsto futurum affirmare possum. eoq̃ue magis, quod ad voluntates nostras arctius copulandas, maximum vinculum attulit religiosæ vitæ similitudo. Religiosæ enim Familiæ quamuis ex-

K 2 ternis

ternis quibusdam ceremonijs inter se differant, eas tamen re vera copulatas esse nemo ignorat. unum hoc doleo, quod saepe tecum, ut antea, loqui non possim. sed si mihi coram id non licebit, per litteras absens tecum loquar, quo nihil mihi iucundius esse poterit. quamobrem te, ut ad has litteras rescribere velis, superiores tuos, ut tibi rescribendi facultatem concedant, valde rogo. & quamvis hoc tibi natura largita sit, ut utraque lingua egregie scribas, quippe qui in litterarum studijs ita versatus sis, ut Iurisprudentiae laurea donari potuisses: tamen si latina id feceris; nescio quo pacto gratius erit. quamquam litterarum officium ut intermittatur, spero tamen fore, ut vel in maxima disunctione locorum, amore, & amicitia coniuncti maneamus: ita ut quocunque in loco fuerimus, idem amor, eadem semper amicitia futura sit. Vale. Genuæ. in Conuentu. S. Nicolai de Tolentino. V. Kal. Octob. MDCXIII.

ADMODVM REVERENDO
D. P. Iosepho Araldo.

NIHIL virtute amabilius, nullusque dignior amari, quam qui ea preditus sit. itaque quo primum die tecum locutus sum, eo ipso die te vnice amaui; meque a te aliqua fortasse opinione virtutis de me adducto redamari intellexi. postea saepe vna fuimus, ac etiam nunc sumus; nec studia tua, aut occupationes meae impediunt, quominus uterque viriusque consuetudine perfruamur. conueniunt mores, officia intercedunt, & creuit amor ita, ut fraterno ferè iam se equare videatur. cum igitur ipse tam arcto amicitiae vinculo nos coniunxerit, quid mirum,

mirum, si nullos coniunctiores esse, quam nosmetipsi inter nos sumus, & ipsam amicitiam in perpetuum duraturam existimem? libet hoc mihi de ea augurari, cum virtute conglutinata sit, & illius quasi nutrimento alatur, & confirmetur. ea enim amicitia, quae semel diffusi potuit, optime suta certe non erat; & quae vix exorta statim exstinguitur, virtutis alimentum profecto non habuit. Plurimum quidem momenti affert ad amicitias conciliandas vitae similitudo. nam & sacris tu te ipsum addixisti, & ego sacris initiatus sum. pari uterque studio, parique conatu Deo seruimus: etsi in hoc non sit par utriusque vitae conditio, cum tu liber, & solutus id facias; ego autem solemni religionis voto obstrictus: tu Domino fructus tantummodo afferas; ego & fructuum, & fundi simul illi totam, & perfectam possessionem tradiderim. Sed si sensus tuos optime teneo, in via Dei longius procedere cupis, & ex huius saeculi periculis in portum te te recipere. faxit Deus, ut secundis ventis utaris, et, quod maxime cupis, id ipsū assequi possis. iam vero eademmet studia, quam facile amorem concilient, & amicos inter se coniungant, quis ignorat? nam in litterarum studiis ita versaris, ut latinam linguam in delicijs habeas, & ad eam perdiscendam omne studium conferas. cuius quidem professio quamuis meam numquam fuerit, ac multo minus deinceps futura sit: me tamen ad eam valde propensum esse, & hanc ipsam propensionem longinquitate temporis non modo non minui, sed magis magisque augeri, negare haud possum. Diuinū hoc est beneficiū, quod vitam tuam ita institueris, ut ineuntis aetatis laudem non ab inanibus rebus, noxijsq; voluptatibus, sed ab honestis cogitationibus, ac studiis ducen-

ducendam existimes. huiusmodi beneficium non omnibus contigit. vides alios ita quæstui, & lucro deditos esse, ut in diuitijs accumulandis tempus consumant; alios vero ita voluptatibus indulgentes, ut in ijs perquirendis prorsus insaniant. Tu quidem sapienter facis, quod a vulgo, quantum possis, te separe, & ad paucorum numerum te adiungas, qui vulgum, & vulgaria contemnunt. his initijs positis, ac fundamentis iactis quale ædificium excitatum iri existimabimus? quantam firmitudinem habiturum? nam illud certe ædificium facile concidet, cuius fundamenta vitium fecerint. Flos præcedit fructum. Agricola cum flores in arboribus videt. fructus quoque se visurum putat. cum te igitur tot ingenij floribus ornatum videam, cur suauissimos fructus consecuturos non sperem? cur hanc spem felicem exitum non habituram existimem? quod autem in latina lingua tam libenter industriam ponas, id ex prudenti iudicio facis. quod vero eum me esse putes, qui studijs tuis consulere possim, in eo magnopere erras. cum ad hanc rem nec ingenium mihi, nec doctrina etiam suppetat; & in hoc vitæ genere aliud mihi cogitandum sit, ne ea repetere videar, quæ iam pridem omisi, & ea mihi gloriæ ducere, quæ ut a professione mea prorsus aliena, iure reprehendi fortasse possunt. quamobrem te rogo, ut hanc opinionem deponas, & de me ipso, mihi metipsi potius, quam tibi credas. quamquam nihil sciam, quod tibi libenter non traderem; & nihil tam difficile, arduum ve sit, quod non tua causa libenter quoque præstarem. quod si rem ipsam tam facile, quam voluntatem tibi emetiri possem, id verissimum esse perspiceres. Sed aquam e pumice postulas. quidenim tibi deesse potest ad hanc latinæ linguæ

filium

sitim explendam, cum Sinibaldi Ferrarij, qui omnibus
 doctrina, & eloquentiæ copijs abundat, consuetudine
 fruaris & is reconditos huius linguæ fontes tibi patefaciet,
 ex quibus non tam bene dicendi, quam recte viuendi præ-
 cepta hauries. Ego quid sim, nescio; at illud certo scio,
 quod, quidquid ego sum, de ijsdem fontibus fluxi. id-
 que cum libenter fateor, tum etiam maxime glorior. ex
 eo intelliges, tibi in primis studendum esse, ut summo la-
 tinæ linguæ desiderio tibi insito, vel potius innato sum-
 mum quoque studium addas, efficiasque exercitatione,
 ac stilo in dies magis ut alatur, & crescat. Et cum elo-
 quentia ex verbis, & sententijs constet, tibi operam
 dandam, ut illis optimis, & lectissimis, his vero acutis,
 & grauihus utaris; in illis luculentus, in his vero copio-
 sus existas; ut oratio tua pura, & emendata, ac vere
 latina sit, & cogitationes, quæ animo inciderint, ornatæ,
 ac decenter eloquaris intelliges præterea latinam lin-
 guam imitatione vniuersam contineri, eamque non ex
 vno, aut altero scriptore, sed ex optimis quibusque, &
 probatissimis petendam esse. itaque summo iudicio eos eli-
 gendos esse, quos imiteris, & multos etiam legendos,
 quamuis non imitandos, ut inter varia, diuersaque scri-
 bendi genera, illud eligere possis, quod ceteris omnino
 præferendum sit, & omnium laude, atque plausu com-
 probatum iri existimaueris. eam tibi exercitationem
 magnopere laudabit, qua nonnullas antiquorum senten-
 tias mediteris, & tecum voluas, easque alijs verbis ex-
 primas, ac studio æmulationis, & gloriæ splendidiore
 etiam reddas. illud quoque tibi vtilissimum futurum af-
 firmabit, si aliqua ex Cicerone hetrusce versa, ea latine
 rursus reddideris, & cum perfecto ipsius Ciceronis exem-
 plari

plari contuleris, ut quae in tuis scriptis bona inueneris, meliora efficias, & quae non optima, facile corrigas. hac, & alia multa disces a Sinibaldo Ferrario nostro. quae tibi maxime utilia esse senties. quamobrem his non immorabor, sed nonnulla tantummodo ad te cohortandum colligam, quae etsi tibi necessaria futura non arbitror, eo tamen modo proderunt, quo calcar currenti equo, qui quamuis sua sponte satis incitatus sit, vehementius tamen adoptatam metam contingendam adhuc etiam inflammatur. Eloquentiae iter ingressus es, fac igitur ut illud conficias, & eorum tibi gloria incitamentum sit, qui ad summam eloquentiae laudem peruenerunt. quod si aliquantulum progressu paullo asperior via tibi videretur, pedemque referres, tum valde reprehendendus esses, tum nullum ex laboribus tuis posteritatis fructum perciperes. quos quidem labores, dum aetas, & vires sinunt, libenter ferre debes, eosque instar suauissimi cibi habere, quo nutriaris. aetate quidem viges, & viribus polles, sed illa praeteruolat, haec vero debilitantur. Et quamuis hiemi succedat ver, nulla tamen senectuti succedit iuuentus. Verumtamen non auctor tibi sum, ut in libris euoluendis totos dies sine ulla intermissione consumas, sed ut legendi laborem quadam quasi pausa modereris. Suum quaque res & locum, & tempus habet. nimio studio frangitur animus, vegetior post otia, & acrior fit. itaque a libris aliquando disunctus ad amicos libenter te referes. non tamen tibi curandum est, ut tua scripta legantur ab omnibus, vel probentur, sed a paucis tantummodo, quorum erga te beneuolentiam perspectam habeas, & consilium tuto sequaris. Sunt enim nonnulli ita iudicio deprauato, ut in rebus veritatem non per-

perspiciant; nonnulli ita natura improbi, ut alienæ industriæ viuere partus nollent. ex his non deerunt fortasse aliqui, qui te reprehendant, quod in latina lingua tantum studiij, ac temporis ponas. sed habes, quod ijs respondeas, te scilicet antiquos illos potius, quam hos recentes imitari velle, cum ex illis, quanta sit latine linguae pulchritudo, ex his vero quanta sit eiusdem difficultas, facile intelligas. & sanè dolendum est plerosque adolescentes memoria, & ingenio præstantes, latina lingua contempta, huius hetruscæ studio totam vitam impendere, & crudeles in matrem filie tantummodo patrociniū suscipere. Tu vero perge in hoc laudabili cursu, & latinam linguam a veteribus illis Romanis, veluti picturam nobis relictam, a nonnullis vero Auorum memoria pene deformatam, & a paucis doctissimis Viris in antiquum statum postea restitutam, tuere, atque defende. quod cum ego conatus sim, tantum abest, ut aliqua ex parte id perfecerim, ut potius hanc ipsam linguam lutosi maculis adsperserim, atque sœdauerim. Nunc ego ad alia me conuertam, & peccata mea, quorum pondere grauis incedo, & pœnitentiam nondum egi, lacrimis delere conabor. habeo quid faciam, dum viuam, sacrificijs scilicet Deum placare, ne pro ipsis peccatis a me digna supplicia sumat. quæ quidem peccata cum mihi ante oculos propono, maxima illico tristitiæ nubes animo officit. Sed cum Deum mente specto, maxima illi effulget latitiæ lux. Ad hanc tristitiam accedit dolor, quem maximum tuli ex acerbissima morte Hieronymi à Sancta Maria, summa indole præditi adolescentis, cuius dulcem recordationem, nisi mors, mihi adimet nemo. Antonij Mariæ Bezani nomine in seculo

L appella-

appellabatur, & cum honestis parentibus ortus esset, &
 annum ageret decimum octauum, in societatem nostram
 tanto Dei amore incensus se contulit, ut nihil quicquam
 deinceps de eo remiserit, sed in dies magis, magisque in-
 flammatus fuerit. Non enim ille quidem bene incēpit,
 sed in eo non perseuerauit; aut perseuerauit quidem,
 sed in maiorum institutis aliquando hāsit; quinimo eo-
 dem semper vitæ tenore annum ferè integrum nobiscum
 simul vixit, & quotidiana Religionis officia vultu sem-
 per tranquillo, & sereno promptissimus obiit. Pauci ei
 supererant dies ad professionem emittendam, & eam
 quidem emissurus erat, sed Deo aliter visum, qui illius
 quidem emittendæ maximum illi in terris desiderium in-
 iecerat; illud tamen perficiendi in cœlis potestatem fecit.
 incidit in febrim, quæ postea adeo creuit, ut amplius
 medicinae locum non reliquerit, eaquæ exstinctus sit, &
 cum eo simul plures quoque virtutes, quibus ipse floruit,
 exstinctæ videantur. toto eo tempore, quo æger lectulo
 decubuit, quod sanè exiguum fuit, se moriturum affir-
 mauit, nec id negantibus vlllo modo assentiebat, quasi
 aduentantis mortis præsciū esset. non sine fletu ei mor-
 tuo honorem præstitimus, quem viuū amauimus nec
 adhuc lachrymas tenemus, quibus eum nobis ademptum
 frustra requirimus. Hieronymus, ut dixi, illi nomen
 erat, & Diuum Hieronymum intimo affectu veneraba-
 tur, eumque nocte ipsa, quæ mortem antecessit, in som-
 nis vidit; & Pridie Kal. Octobris, qui dies ipsi D. Hie-
 ronymo sacer est, è vita decessit. quæ quidem omnia,
 non tam diligenter videntur consideranda, quam ma-
 gnopere admiranda. felicem eum appello, qui tam cito
 longum iter confecerit, & in Patriam peruenerit: nos
 miseros,

miseros, qui ab ea procul aberrantes, in hoc exilio viui-
 mus, ubi priuatis, publicisque calamitatibus quotidie,
 vexamur. Quis sine lachrymis acerbum illum casum,
 spectare potuit, qui tertio Idus Nouembris, quo die Diui
 Martini memoria recolitur, hic accidit? maxima vi
 ventorum, ita mare concitatum esse, ut extra fines suos
 pene egressum videretur. Et quinquagiuta nauigia onu-
 sta mercibus, inter quæ maiora viginti fuere, in ipso
 portu naufragium fecisse, ac plures homines, cum ex
 nauticis, tum ex ciuibus, qui cupide ad visendum pro-
 gressi erant, undis misere obrutos esse, ita ut necesse fue-
 rit precibus, & votis iram Dei lenire, quæ maiorem
 vindictam minabatur? Vrbs quidem Genua dum stabit,
 memor semper futura est; non immemor vero nullum
 tutiorem esse portum, quam se, suaque omnia Deo com-
 mittere. quem quidem precor, ut quemadmodum nos in
 hac vita fraterno amore inter nos amamus, ita in altera
 vita nobis concedat, ut perfecta charitate coniuncti Deo
 ipso, qui verus amor est, & quo nihil melius desiderari
 potest, perfruamur. Vale. Genuæ. Tertio Kal. Decemb.
 MDCXIII.

*

EGO verò illius temporis memoriam sæpe usurpare
 soleo, cum totos ferè dies una eramus, alter cum altero
 consilia nostra ita communicantes, ut fraterne neces-
 situdinis potius, quàm affinitatis coniunctio inter nos esse
 videretur. Verum affinitas a Maioribus nostris orta
 est, amicitia à nobis, eaque in dies non solum confirma-
 ta, sed etiam aucta vehementer, nam quamuis diuersa

L 2 vita

vita ratio ab illa penè quotidiana familiaritate ad varia studia nos abduxerit; amoris tamen, qui idem manet, cursum interrumpere nunquam potuit. tu enim a studio liberalitatis exercendæ ad rem augendam impulsus te totum negotijs dedisti; ego ad litterarum studia natura propensus litterato otio nihil anteposui. & quemadmodum ipse aliquandiu ijsdem ingressus itineribus ire cœperas, ijsque postea mutatis, à litteris ad res agendas te contulisti; ita ego cum aliquando negotiorum fluctibus me commissem, certiori postea cursu ad litteras, tanquam ad tranquillissimum portum confugi. Tu ex animi tui sententia uxorem postea duxisti, ego vitam celibem delegi, & nulla in re delectum æquè bene unquam me adhibuisse existimo. Tu denique singulari industria, consilio, & prudentia præditus, quod tibi in animo proposuisti, assequutus es; ego quidem conatus sum, sed tantum abest, ut propositi campos fuerim, ut mihi conanti nihil planè successerit. nonnulla prætereo, quæ nobis fortuito acciderunt ex ijs, quibus hominum vita turbatur, & fluctuat, parentum præsertim, amicorumque mortem: nam ad ea perferenda iampridem animum præparauimus, ut potè qui per aduersa, & leta ad Cælum tendere sacris litteris edocemur. bene est, quod rebus aduersis recensendis supersuerimus, & earum memoria ita nobis iucunda sit, ut eas nos subijsse magnopere delectet. verum, ut dixi, præterita omittamus. res eò adducta est loci, ut tu diuitijs affluens splendide viuas, & in liberis rectè educandis, Christianæque pietatis operibus exercendis totus sis; ego mea paupertate contentus sim, Tirones instruam, & Deo meo vota persoluam. Et quamuis uterque suo studio delectetur, amamus tamen
inter

inter nos non tam veteri, quam vero amore; nihilque
tam arduum, difficile ve esset, quod non alter alteri præ-
staremus. Sed in hoc etiam diuersa utriusque nostrum
ratio est. tibi enim cum voluntate vires adsunt, ut quid-
quid velis, facile perficias; mihi autem præter volunta-
tem quid superest? quid enim possum aliud, quam à D.
O. M. precari, ut res tuas meliores, amplioresque faciat,
& eas perpetuò seruet incolumes? quod diligenter adhuc
feci, nec ullum deinceps intermittam tempus id diligen-
tius faciendi. ut si à me tibi, ut meritus es de me, gratia
referri non possit, eam saltem haberi intelligas. Ac sanè
magnopere gaudeo, quod preces meæ apud Deum inanes
non videntur, tua potius, ut arbitror, delectatum fide,
quam mea offensum indignitate. nam apud omnes quo lo-
co sis, qua existimatione, quibus fortunis auctus, notum
cum sit, pluribus à me verbis referri necesse non est. Sed
illa haud paullò præstantiora in te sunt, quod ita viuas,
ut Parentum tuorum spectatæ integritatis, & innocen-
tiæ in dies similiorem te præbeas; & Familiam tuam
quamuis per Italiam satis illustrem, nouo tamen splen-
dore multò illustriorem reddas. cui quidem Familiæ
splendoris non minus afferunt Sorores tuæ, Moniales or-
dinis Diui Dominici in Cænobio Sancti Siluestri de Pi-
sis, quæ cum totas se Deo dicauerint, ita piè, sancteque
illi seruiunt, ut, quamuis angustis loci terminis includan-
tur, pietatis tamen, ac Sanctitatis earum lumen nescio
quo pacto erumpat. Nec verò vnquam deerunt eidem-
met Familiæ splendoris incrementa, cum liberi tui, vel in
ipsa pueritia futuræ virtutis, clarissima signa præsefe-
rant. præclara illa ornamenta, quæ dixi, tibi diuinitus
concessa, mecum sæpe animo contemplor, & in amicitia
nostra

nostra cum summa affinitate coniuncta hoc tempore plane conquiesco. quæ quidem amicitia, cum tuis in me meritis, meoque in te singulari amore ita diligenter sit culta, ut, quamdiu utrique nostrum vita contigerit, duratura sit; eorundem in me meritorum, meaque in te obsequantia hanc epistolam extare volui perpetuum quasi pignus, & monumentum. Vale. Genuæ. VIII. Kal. April. MDCXVI.

ADMODVM REVERENDO
D. P. Thadæo Riccio.

COGNOVERAM iampridem ex multorum sermonibus de tua singulari doctrina, & eloquentia, necnon de præclara admodum, atque laudabili in ijs communicandis consuetudine; tuique amore ita incensus eram, ut nihil mallet, quam occasionem mihi dari, qua eum tibi patefacerem. Sed opportunè eam mihi querenti ecce tibi mea cum ad Urbem profectio, tum noua viuendi instituta ratio omnem prorsus occasionem eripuit: quamuis animum in te meum non immutauerit, nec ulla res immutatura sit unquam. Nã ut ipse in virtute colenda tui similis semper es, ita ego in te amando mei dissimilis esse non possum; cum in te habeas, quod amabilem te omnibus reddat. Sed meum hac de re consilium nihil iam mihi differendum esse duxi, ne forte illud, quod antea factum est, aliquid impediret, aut certe retardaret. itaque has ad te litteras dare volui mei erga te amoris testes futuras, donec mihi coram, quantum te amem, quantumque faciam, ostendere liceat. Sed æquum esset, ut aliquo simul iucundiori argumento vterer, vel ex tuis laudibus.

dibus, quod facile possem, argumentum aliquod arripere. Sed alterum facere nequeo, cum omnem iucunditatem prorsus amiserim; alterum libens omitto, cum te summa modestia preditum ne offendam, valde timeam. Quod si in amplissimo laudum tuarum campo spatium vellem, quanta mihi dicendi materies daretur? quam preclara? quam luculenta? perfectam multarum artium cognitionem, atque scientiam tibi comparasti, iisque eloquentiam adiunxisti, instar nobilissimi artificis, qui ad maius naturae decus praefulgidas gemmas fulgenti auro inclusit. Et cum multi doctrinam ita occultent, ut ad eam velut interiori Sacratio reconditam nulli pateat aditus; tu tamen eam amicis libenter impertis, communicasque cum multis; quibus, siue Ciceroniano ore tonas, siue Virgiliana tuba suauissime canis, aures imple, animumque demulces. hinc maxima Reip. nostrae à te oritur utilitas, cum alumni disciplinae tuae, quos non tam doctiores, quam meliores reddis, ad illius gubernacula accedant, eandemque optime gubernent. quam quidem communem utilitatem ita tibi proponis, ut eam priuata anteponas, & preclaram tuorum laborum mercedem existimes, longe maiorem à Deo olim accepturus. Quanta autem constantia illud naturae incommodum perfers, quo in perpetuum oculorum lumine priuatus es? quibus commodis id ipsum compensas? hunc solem non vides; at illius, qui sol iustitiae est, tanto magis lumen animo percipis, quanto magis ab omni rerum terrenarum interiectu liber existis; ut nihil damni tibi cecitas attulisse, sed potius admirabiliorem te fecisse videatur. tempus deficeret potius, quam materies, si tuas laudes dicere aggrederer, nec tam diligenter id facerem, ut

non

non longe maiora dictis superessent. Sed, ut annueram, tristitia sic afficior, ut quemadmodum ad letitiam haud ita facile traducor, ita in lugubri argumento versari perpetuo velim. Et vere ut dicam, quae nobis letitia esse potest in tantis humanae vitae miserijs, nostrorum temporum calamitatibus, amicorum morte, charissimorumque amissione? quae quidem omnia ad me nunc magis pertinere arbitror; ijsque magis commoueri soleo, posteaquam, relicto saeculo, in hanc societatem nomen dedi; cum viri religiosi officium id etiam postulet, ut ipse per sacrificia, & preces, à Deo Opt. Max. ijs, qui nunc viuunt, veniam impetret; ijs vero, qui mortui sunt, eternam beatitudinem deprecetur. Et ecce nunc me magnopere urget memoria Scipionis ex Condominis Cella, qui ita mortuus non est, ut non apud me viuat, victurusque sit semper. Versatur mihi ante oculos illius animi altitudo cum summa humanitate coniuncta, suauitas morum, sermoris elegantia, in rebus gerendis dexteritas, & apud omnes denique, qui eum nouerant, gratia singularis. quae animi dotes tanto magis in eo laudabiles erant, quanto maior huiusmodi Virorum, qui ijs praediti sint, nobis penuria est. in eo autem numero, qui eum nouerant, & diligebant, te quoque fuisse non dubitauerim, cum illius tanta virtus esset, ut perquam paucos reperis- ses, qui non eum cognoscerent, maximeque diligerent. Ego equidem eum vel mortuum ita amo, ut meus in illum amor vltimum diem, nisi quem & vita, habiturus non sit. Et hunc ipsum amorem, quam difficile sit scriptis non prodere, ij, qui sciunt, quid sit amor, non ignorant. Illius praetermitto nobilitatem, quam a Maioribus magnam quidem, & amplam accepisse non conten-
tus,

tus, tanta accessione cumulauit, ut maius & ipse posteris
 accūs, & gloria futurus sit. prætermitto etiam Iuris Ci-
 uilis scientiam, in qua ipse ita excelluit, ut non magis ut
 optimus Poeta homines pœsi delectaret, quam ut optimus
 Iureconsultus eisdem Iurisprudētia caueret. De poetica
 autem facultate, ad quam natura propensior fuit, &
 ex qua maiorem sibi gloriam comparauit, facere non
 possum, quin aliquid dicam. Pœsis quidem diuina res
 est, ita ut homines in sui admirationem facile adducat.
 Sed eadem quam difficilis sit, ex multorum numero, qui
 maiori conatu, quam feliciore successu in ea se exercent,
 intelligi potest. nam quantumuis licet ceteris rebus quis
 excellat, nisi adiutricem naturam habeat, quidquid in
 hoc genere tentauerit, parum ei ex sententia cedit: sed si
 non tam arte, quam natura ualuerit, & illa duo, pro-
 pter quæ Poeta præcipue laudatur, ut scilicet profit, &
 delectet, consecutus fuerit; omne tulisse punctum, nomen-
 quæ Poeta, atque honorem mereri censebitur. sed utrum
 Scipio noster in ijs scriptis, quæ nobis reliquit, talem se
 præbuerit, nec ne, optimis huius facultatis aestimatoribus
 iudicandum relinquo. qui de hac re quid sentiant, cum
 omnibus notum sit, nihil uerbis opus esse existimo. quæ
 quidem scripta, si cum aliorum scriptis comparentur, non
 aliter, quam pulchra aliqua res rei admota contrariæ,
 multo pulchriora apparent. ac utinam, cui tam diues
 pœsis uena contigerat, diuturnior quoque uita contigisset:
 ne ille ingenij sui thesauros, reconditas quæ diuitias mul-
 to uberius nobis patefecisset. Quot uirtutes multorum
 annorum laboribus collectæ mortis vi puncto temporis
 intereunt? quomodo uno die cadit arbor, quæ multis an-
 nis radices egit? hinc nobis exemplum sumendum est,

M cum

cum illi nihil acciderit, quod etiam nobis euenturum non sit. hinc etiam illi felices existimandi, qui huius tam rapidi torrentis, quæ vita dicitur, & tantopere delectat, & placet, vadum repererint, ut hic quiete, ac tranquille uiuant, in æterna illa quiete, atque tranquillitate in cælo postea victuri. qua quidem nunc frui amicum nostrum, quæ illius vitæ probitas erat, ac pietas in Deum, pie credere possumus. Et nihilominus tali amico priuatus, magno in dolore versor, qui identidem multo vehementius renouatur, cum ea loca pertranseo, in quibus, dum ipse in vita, ego vero in seculo manerem, vel quiescentes, vel inambulantes de litteris sæpe collocuti sumus. cui quidem dolori si quid opis afferre potes, ut certe plurimum potes, id ut afferas, te etiam, atque etiam rogo. nam & animo agrotanti optima est medicina, qua ipse leuetur, consolatoria amici oratio; & ceteras virtutes, ut scis, misericordia maxime commendat; adeo ut hominis perfecti maximum argumentum sit dolere dolentibus, alienisque miseris commoueri: immo tanto quisque perfectior sit, quanto id absolutius, atque perfectius præstiterit. quod si ipsius Scipionis vitam scribendam susciperes, esset materies digna eloquentia tua; & ei, qui præclaris scriptis, dum vixit, multorum memoriam immortalē reddidit, par quoque gratia referretur. cum ipsa virtus, quamuis propria luce conspicua sit, non parum tamen illustretur excellentis scriptoris industria. quod quidem onus mihi prius ab amore impositum libenter subirem, nisi illud viribus meis longe impar existimarem. te vero nihil impediet, quominus illud egregie sustineas, cum ea tibi leuia sint, quæ alijs pergrauia videantur. neque hac in re multis precibus utar, cum ea ipsa res facilius,

cilius, quod a te peto, impetratura videatur, quæ tanquam amplissimum præmium hoc tibi pollicetur fore, ut Scipionis nomen scriptis, ac laudibus non celebres, quin tuum quoque cum æternitate coniungas, Vale. Genuæ. IX. Kal. Martij MDCXIV.

IOANNI NICOLA OSAVLIO
CARREGAE.

Thadæus Riccius. S. P. D.

ACCEPTIS tuis litteris, quibus tum eximia tua humanitas, tum admirabilis, mihiq; iam antea perspecta dicendi facultas facile perspicitur, diu animi pependi, quæ nam respondendi ratio adhibenda esset. etenim, partim omnibus mihi neruis contendendum arbitrabar, ne quid vir adeo egregius à me frustra petiisse videretur; partim vero habita virium mearum ratione illis longe impar onus impositum dolebam. itaque iam constitueram a respondendi munere penitus abstinere: sed obiebat statim se se ingrati animi nota, quam ullo procul dubio subijssem, nisi, quam mihi tuæ iucundæ fuerint, saltem pro viribus significassem. verum unde initium sumam, non video. cerno enim tuam hanc epistolam in duas potissimum diuisam esse partes, in quarum altera ubi mihi tantum tribuis, quantum ego nec agnosco, nec postulo, facis tu quidem amicè, sed rationem mihi potius patefacis, qua me gerere debeam, normamque præscribis, ad quam cogitationes meæ dirigantur; quam, ut vel minimam eius partem consequi possim. altera autem non mediocri me molestia affecit; non quod

M 2 is,

is, cuius obitum deploras, mihi aut usu, aut etiam nomine notus esset, sed quod te, quem summopere colo, atque obseruo, eius causa mœrore grauatum conspexerim; neque me huiusmodi esse agnoscam, qui dictis dolorem tuum mitigare possim. quamquam si ij sumus, qui profecto esse debemus, ut hanc vitam, ut pote quæ fluxa est, ac fragilis, nullius esse ponderis, humanamque felicitatem totam in animi bonis collocandam esse censeamus, nihil est quod angamur. si enim ijs virtutibus præditus fuit, quas ipse commemoras, quid non est adeptus, quod homini fas esset optare? ut ex adeo excelso loco, quem inter mortales obtinuit, ex ergastulo, vinculisque corporis solutus ad cœlestem patriam protinus euolasse videatur. præclare vero etiam in morte cum illo actum est, quod te superstitem reliquit, in cuius memoria, ac beneuolentia, conquiescat. quod si hæc tuo in illum amoris minora videantur, pluraque illi præstare optes pietatis officia; habes unde eum à mortuis excitare possis. nam monumentis tuis, ac litteris illustratus non diutius modo, sed longe etiam melius, atque excellentius, quam in se ipso viuet; neque, si hanc tu prouinciam non suscipias, qui pro rei dignitate eam obeat, inueniri poterit. nam licet rudi, atque humili occultatus veste deliteas, prodit tamen in apertum, seque omnibus patefacit stili puritas, atque elegantia, cui, si quæ eloquentia Principi Marco Tullio olim tributa est, conferatur, ni tibi uni concedat, superior saltem non sit. sed plura fortasse, quam par erat, mihi que proposueram, rudibus verbis enuncio. finem itaque dicendi faciens utar ea clausula qua apud amicos semper solco, meq; tibi omnibus in rebus, in quibus opera mea uti poteris, præsto futurum polliceor. Vale. Genue Sexto Kalend. Martij. MDCXIV.

RE.

R E V E R E N D O F R A T R I
Augustino à Sancto Gregorio Neapolim.

QVANTA me latitia affecerint litteræ tuæ, quas superioribus diebus accepi, cum de tuo statu ea, quæ vellem, mihi nunciauerint, ac de tuo in me amore, quamuis antea mihi satis cognito, certiolem tamen dederint significationem, non facile dixerim. nam cum amicorum bonis, æque ac proprijs lætamur; tum multo magis eorum, quos eiusdem vitæ, societatisque vinculo coniunctos habemus: & cum ab ijs, quos ipsi amamus, nos redamari cupimus, tum multo magis ab ijs, qui & natura amabiles, & sua nobis virtute charissimi sunt. ac ego equidem magnopere dolebam, cum te Romæ parum firma valetudine uti, & ideo fertile ingenium tuum, quod semper amavi, & incultum esse non fui, eos non ferre fructus, quos inde sperabamus, intelligerem. cum autem per tot menses nullas a te litteras acciperem etsi id accidere, quod me non amares, ne suspicabar quidem: tamen, quia amor facile se prodit, eum tamdiu latere moleste ferebam. Nunc vero cum sis Neapoli tam nobili urbe, & amœnitate, salubritate, rerumque omnium copia maxime insigni; cumque præterea Cœnobium, & sodales tibi contingerint, qualia optabas; non modo, ut vires breui recipias, verum etiam intermissa litterarum studia ita repetas, ut, si quid in ipsis iacturæ feceris, id totum resarcias, futurum valde spero. in hanc rem omnes ingenij nervos intendere debes, dum opportunitas temporis, & occasio est; ne utramque simul amittas, & amisisse magnopere doleas. rem difficilem esse fortasse inquires, atque laboris plenam. fateor. sed ut è spinis colligitur rosa, ita

ex

ex laboribus suauissimi capiuntur fructus. propone tibi ante oculos hanc nostram Augustinianam Familiam, quæ cum veluti generosa vitis non tam se alte extollat, quam longe, lateque diffundat, adminiculis indiget, ut Admodum R. P. F. Iacobo à S. Felice Vicario Generali nostro Viro summa humanitate, prudentia, ac vitæ integritate prædito, optatos afferat fructus, & Ecclesiæ Dei utilitati sit, atque ornamento. hoc tribue optimis parentibus tuis, quibus nihil gratius facere potes: tribue mihi tui amantiſſimo, qui te istud magnopere rogo, ut quod nobis discedens pollicitus es, id optabili exitu comprobes. æquum enim est, ut illis obsequaris, mihi vero in amore respondeas. nec utrumque facilius præstes, quam si te totum litteris tradas. mihi quidem tanto quisque charior est, quanto magis virtute præditus est. quamquam non paruum, & veri amoris, & optimi amici indicium sit, quod ad fruendum tecum ea animi tranquillitate, qua nunc ipse frueris, Neapolim me inuites. cum verè, & ex animo nullus alterum amet, quin illius aspectum, præsentiamque desideret; nec vere, & ex animo quisquam alterum desideret, quin eorum bonorum, quibus ipse fruitur, velit amicum esse participem. Ego equidem tibi non concedo, ut mei tu magis, quam ego tui videndi, & alloquendi cupidior sim; nec me querentem solitudinem, ac maris aspectum, nouum istud Cœnobium tam delectaret, quam in alijs amantem modestissimos, ac optimos mores, magna voluptate afficeret tua iucunda consuetudo. Et hoc nomine potissimum nauigationis incommoda libentius ferrem, quippe qui haud valde strenue nauigare soleam. Sed id totum, ut scis, ex superiorum voluntate pendet. cui nos, qui viuimus in Claustris, omnino

omnino acquiescere debemus; ne, si ex voluntate nostra omnia fecerimus, obedientiae claustra refringere videamur. Et certe si ulla res est, in qua arbitrato meo omnino carere velim, locorum quidem mutatio est, cum sciam nullum esse locum tam fertilem, in quo utilibus herbis durus aliquis rubus, & asper ferè mixtus non sit. Sed si loco, aut tempore diuidemur, coniungemur animis. nec loci longinquitas, aut longitudo temporis ita oculis meis te eripient, ut non eundem te animo meo memoria tui redditura sit, & quamuis absentes, aliquo modo praesentes futuri simus. Quod autem in his rebus, quibus. istic mihi forte opus esset, operam tuam tam libenter polliceris, ac defers, quamuis in praesentia nihil sit, cur ea utar, maximas tamen tibi gratias ago. tu si quid hic sit, quod velis, ad me scripseris, efficiam profecto, ne curam in eo, ac diligentiam meam desideres. res quidem ipsa voluntatem aequabit; sin aliter, haud mea tamen culpa euenerit. spero fore, ut, quae tua est humanitas, ipsa voluntate contentus rem ipsam minime requiras. Vale. Genuae. XII. Kal. Aprilis. MDCXIV.

ILLVSTRISS. ET REVERENDISS.
D. D. ANTONIO SAVLIO
CARDINALI AMPLISS.
ROMAM.

EGO et quidem vehementer letor, Cardinalis Amplissime, quod in hac Augustiniana Discalearum Familia viuam, quodque in Sauliam iam ante admissus
illius.

illius nunc tutela, ac praesidio magis innitar. quod vero ab humanitate tua impetrauerim, ut me in tuorum numerum exceperis, qui alteram ex ijs Familijs grauissima auctoritate defendis, alteram praclaris actionibus maxime illustras; hanc ipsam letitiam usque adeo cumulari sentio, ut nullo modo explicare queam. nam si erga nobilissimam Familiam Sauliam tantopere affectus sum, ut eam cum in omni sermone, tum scriptis pro virili celebrare non desinam; quo me studio affici, qua erga te obseruantia esse par est, a quo tanquam ex fonte omnis illius amplitudo, & gloria emanat? clarior ille mihi dies illuxit, quo die seculi tempestates effugi, & caelesti aura prosequente, in hunc salutis portum me contuli, ubi patrocinio tuo, veluti firmissima anchora tutus, nullo modo commoueri possum. hinc & beneuolentiae tuae colligenda, & meae erga te obseruantiae declaranda principium natum est: quarum altera, spero fore, ut in suo cursu nunquam interrumpatur, altera vero eodem fine, quo vita mea, terminetur. Ac Nicolao quidem auo meo magnas habeo gratias, qui Anno vigesimo octauo supra Millesimum quingentesimum, cum ex Senatus Consulto, in quamcumque familiam cooptari libuisset, eligendi potestatem haberet, omissis ceteris omnibus, Sauliam praecipue delegerit, tantique boni auctor mihi primus extiterit. Septuaginta ferè sunt anni, cum ille mortuus est, fuitque peracri ingenio, optimo iudicio, summaque prudentia praeditus, ut ex multis audiui, qui eum nouerunt, utque ex ipso Familiae delectu facile potest animaduerti. cui quidem ita addictus erat, ut, cum duplici cognomine uteretur, nulla ipsi Familiae vel splendoris, vel gloriae accessio fieret, quin incredibili quadam letitia afficeretur.

fieretur . cuius tam propensam voluntatem , quasi here-
 ditariam posteri ita libenter exceperunt , ut , cum ipsi
 Auo in deligenda Familia optimi iudicii laudem omnes
 tribuant , suum quoque iudicium cum illius iudicio ma-
 xime congruere una voce fateantur . nam quamuis Ge-
 nuæ complures Familiae sint , omnes nobilissimæ , omnes
 claræ , atque illustres , tamen cum Deus omnia dona sua
 uni , & soli minime concedat ; in aliqua re altera ab al-
 tera ita differt , ut cum generatim omnes laudabiles ap-
 pareant , sigillatim tamen sua cuique laus tribuenda vi-
 deatur . Proprium est enim Familiae Sauliæ homines pro-
 gignere , qui virtute magis , quam opibus alios antecire
 malunt ; & , cum eorum virtutem opes etiam comitentur ,
 quo magis opibus valent , eo magis & legibus , & rationi
 obtemperant , Patriæ in primis amantes , nulla ostenta-
 tione utentes , magis boni esse , quam videri sedulo stu-
 dentes . Historias euoluenti innumerabiles viri occur-
 rent , quos ijs dotibus ornatos , & armis , litteris , ac san-
 ctitate illustres ipsa Familia Virorum illustrium pro-
 creatrix , ac parens continua tulit , atque perpetua fœ-
 cunditate . quorum virtutem , & multorum scriptis , &
 præclaris monumentis Patriæ relictis claram , atque te-
 statam nec præsentis obliuiscuntur , nec posteri unquam
 reticebunt . Sed nihil historia opus est , cum ob oculos posi-
 ta eorum , qui nunc viuunt , habeamus exempla , quæ ma-
 gis efficacia , ac magis nobis utilia sunt . Quis tuam vi-
 deat , ut ceteros missos faciam , Cardinalis præstantissi-
 me , in Deum pietatem , sedulitatem in illius Ecclesia
 tuenda , atque amplificanda , in Patria ornanda munifi-
 centiam , beneficentiam in subleuanda multorum inopia ,
 in dictis denique , & factis ad exemplum veteris disci-
 plinae ,

N. plinae,

plina, & sanctitatis perfectissimam normam; quis hæc
 inquam, & alia pæne innumerabilia videat, qui vera
 me dixisse, non modo non affirmet, sed etiam multo plu-
 ra, quam quæ dixerim, me tacuisse non fateatur? sed
 quemadmodum de ipsa Familia Saulia pauca quædam
 breuiter attigi, ita de te ipso multa lubens omitto, cum
 præsertim sciam te humanis laudibus non delectari, &
 virtutis tuæ famam proprijs innixam meritis ita per Or-
 bem alas expandere, ut scriptorum auxilio non indi-
 geat, à quibus nulla ijs immortalitas contingere potest,
 qui eam rebus præclare ante gestis non demeruerint. il-
 lud unum certe non tacebo eo dignitatis gradu ornatus
 es, qui a supremo secundum obtinet locum, & supremo
 dignum te esse omnes affirmant. Utinam quemadmodum
 Serenissimus Laurentius Frater tuus Dux Reip. nostræ
 creatus, nouum in Familiam Sauliam intulit decus; ita
 tu quoque ad summam dignitatem euectus, in hanc ipsam
 illam inferas amplitudinem, qua nulla maior in terris
 potest inueniri. Aquila quidem illa ingens, sublimis, no-
 bilissimum Familiæ Sauliæ insigne in altum ferri natura
 ipsa consuevit. quod si, quod maxime cupio, nec minus
 spero, unquam accideret; nulla res me impediret, quo-
 minus Romam aduolare, & pedibus tuis obuolutus tibi
 præsens præsentem lætitiā meam patefacere. nam
 quamuis Romanum istud cælum, per quadriennium,
 quo illud hausi, me annua, & periculossima febris af-
 flixerit: tamen quia tui videndi, & alloquendi facultas
 mihi data aliquando est, omnia valetudinis incommo-
 da, quæ pertuli, leuia fuisse arbitror; ac eo ipso nomine
 mihi deinceps futura videntur leuiora. Interim D. O.
 M. precor, ut illud euenire sinat, quod ad maiorem ip-
 sius

*sius gloriam, Ecclesiae utilitatem, animaeque tuae salutem
 redundare debeat. Et quando nunc Genuae in Patria vi-
 uo, cuius Caelum longe benignius experior, nec diuinas
 virtutes tuas, coram, ut vellem ita contemplari possum,
 ut in ijs, quemadmodum nunc toto animo, ita & oculis
 defixus haeream; hanc iniui rationem, qua desiderio meo
 aliqua saltem ex parte satisfacerem. ipsarum virtutum
 imaginem in Octauio Fratris filio assidue contem-
 plor, qui eas ita in dies exprimit, ut, se totum ad tuum ipsius,
 ac Serenissimi Patris exemplum fingere videatur. quan-
 ta letitiae tibi esse debet talis Iuuenis, non tam sanguine
 tibi coniunctus, quam virtutum tuarum imitator egre-
 gius? Nobilitati vero Genuensi quam praeclarum, atque
 illustre ad imitandum proponitur exemplum? mihi ipsi
 quam iucundum, & honorificum est, quod mea erga te,
 erga illum, totamque nobilissimam Familiam Sauliam
 obseruantia tibi ingrata non exstitit? quam quidem, et-
 si, dum Romae essem, semel, & iterum tibi patefecerim;
 hoc tamen contentus non eram, nisi quantum ingenio, at-
 que industria consequi possem, eam apud posteros no-
 tam, atque in omne tempus testatam relinquerem. Vale.
 Genuae. XIX. Kal. Iulij MDCXIV.*

IOANNI NICOLA OSAVLIO
 CARREGAE.

Iacobus Monelia. S. P. D.

*QVAM pie, prudenterque fecerint maiores mei,
 cum istam D. Nicolai adem a fundamentis exstructam,
 varijsque muneribus locupletatam Augustiniana fami-*

N 2 lie

lia vestra tradiderunt; vel hinc maxime cernitur; quod eam rem non minus ex vestro, quam ex totius Civitatis usu accidisse in diem experimur. Quid ego vestram, commemorem vigilantiam in animarum salute procuranda? quid diurnas nocturnasque preces in diuini numinis indignatione auertenda? quid sacros concionatores, qui veluti è purissimo fonte istinc prodire ad hominum animos verae pietatis rore irrigandos? una omnium vox est, vestram istam familiam afflictorum esse solatium, charitatis domicilium, veteris disciplinae exemplar, virtutum omnium sacrarium. Ego quidem pias, religiosasque actiones vestras sic admiror, ut ipse quoque, ne a parentum institutis videar degenerasse, in pectoris mei penetralia amoris, atque obseruantiae templum vobis exstruxerim. Verum, quemadmodum in ipsis templis, tametsi coelites cunctos venerandos certo scimus, in unum aliquem tamen vel sanctitate, vel meritis insigniorem magis propendimus; sic à Patribus hanc veniam peto, ut in te, in te, inquam, totius familiae precipuum lumen, & columnen ardentius, & significantius meam tester pietatem. Hoc munus quis non iure debitum fateatur? Praetereo ingenij tui monumenta, quae extant: castimoniam, integritatem omnibus perspectam non attingo: Sileo incredibilem in rebus pertractandis prudentiam: Vitae monita, salutaria praecepta, atque adeo oracula praetermitto: taceo quam sis in consuetudine iucundus, quam suavis, quam amabilis: haec inquam, multaque praeterea animi tui decora missa facio: Illud unum dico, & vere dico nullas viri religiosi partes in te omnino desiderari. En ego igitur hanc tibi epistolam, veluti primam faciem offero, tenuem fateor, tuisque meritis

*ritis longe imparem, sed puram, sed vera beneuolentiae
flammis incensam. Tu animum spectans, non muneris
exiguitatem, hilari vultu illam accipe; tibi que persua-
de me in singularibus virtutibus tuis amandis, suspicien-
dis, praedicandis nemini unquam concessurum. Vale, ex
suburbano nostro. Sexto Nonas Octobris.*

IOANNI NICOLAO SAVLIO
CARREGAE.

Ioannes Dominicus Monelia. S. P. D.

PAVLI Moneliae patruī mei imaginem intuenti
mibi, mirum dictu est, quantopere animus ad virtutem,
solidamque gloriam accendatur. quae sane flamma in-
tenero adhuc pectore meo usque adeo crescit in dies, ut
nec ea prius sedari, nec ego mente possim conuiescere,
quam ad eximiam tanti viri eruditionem, facundiam,
probitatem, ceterasque animi dotes, propter quas in ore,
atque in amore bonis omnibus fuit, vel proxime, vel cer-
te non ita longo interuallo appropinquauerim. non enim
mibi probantur ij, qui, propinquis vita functis, unam
ineunt fortunarum possessionem, virtutum hereditatem
multo praestabiliorem non cernunt. Cum itaque inter ce-
tera, quibus maxime spectabilis fuit patruus meus, con-
fessione omnium in primis eluceat erga animos vera do-
ctrina, ac religione imbutos mira quaedam propensio, at-
que obseruantia; dum ad alia praecleara eius bona per ip-
sius vestigia ingressus, quo per aetatem licet gradu, conui-
tor; hoc unum interim iam nunc exprimere, & pro viri-
bus praestare in animum induxi, ut huiusmodi scilicet
viro.

viros non amem solum; sed colam, suspiciam veneret; eosque potissimum, quos illi intelligo fuisse probatissimos. In quibus, cum, quem ipse locum obtinueris, Religiosissime Pater, compertum habeam, præcipuo quodam cultu te mihi amandum, atque observandum decreui. quam in mentem si me non compelleret tam maturi, excellentisque ingenij de te iudicium, si vitæ tuæ sanctitas, si morum suavitas, si interiorum litterarum scientia, si tua in domum nostram benevolentia non alliceret; moveret saltem commodi mei ratio. Qui enim unquam ad patrum decus adspiraverim sine prudentissimis monitis, sine salutaribus consilijs, sine amantissimis adhortationibus tuis? quapropter tum meam in te egregie propensam voluntatem, tum animi consilium per has tibi litteras significandum duxi; ut, quantum te admirer intelligeres; mihiq; incitamento, & adiumento esses ad patrum ornamenta, quæ tibi vni omnium notissima sunt, assequenda. cui quidem voto meo si annueris, ut tua mihi pollicetur benignitas, ac inueterata iam de omnibus benemerendi consuetudo, tantum tibi obstringar; ut quantacunque mihi fient, & pietatis, & laudis accessiones, eas omnes vni tibi, secundum Deum, sim acceptas relaturus. Vale. ex suburbano nostro Sexto Nonas Octobris.

IACOBO, ET IOANNI DOMINICO
Monclijs Fratribus.

QUAM dulcis orationis vestræ concentus? quam suavis? quam iucundus? expectabam à vobis quamdam quasi præcentrationem, teneriorisque ætatis vestræ rationem

nem habebam ; sed vicistis expectationem meam , legitimoque cantu mihi probastis in vobis virtutem præcurrere , ætatem non expectare . ex litteris enim vestris apta verborum , & sententiarum varietate concinnis tantum sum perfusus voluptate , quanta ex multiplici vocis , vel musici instrumenti harmonia nunquam me affectum esse velim existimetis . quamquam haud sciam , an ulla suauior harmonia esse possit , quam ea , quæ in vobis oritur ex conuenientia nobilitatis cum probitate morum , & corporis formæ cum animi pulchritudine . præclara virtutis semina iecistis , ex quibus gloriæ fructum , quin aliquando relaturi sitis , minime dubito . Sed vobis maxime curandum est , ut , quod optime cœpistis , illud nauiter perficiatis , quo debitam perpetuo recte agentibus coronam reportetis . id autem facillime consequemini , si de vestra in Deum flagrantissima pietate nihil unquam remiseritis , Paulique Moneliæ Patruī vestri memoriam in animo infixam semper habueritis . quis illo humanior ? quis litterarum amantior ? quis in doctos viros propensior ? merito a vobis summis laudibus ornatur , quibus ille tanto dignior est , quanto ijs , quas mihi tribuistis , ego indignior sum . quamobrem litteras vestras , quod ad hanc partem attinet , legi non sine quodam verecundiæ colore , cum vester in me amor , etsi vos facundiores fecerit , oculis tamen vestris alioquin acribus , & acutis tenebras offudisse videatur . itaque cum paullulum ætate progressi fueritis , consilium fortasse uestrum ipsi damnabitis , quod huiusmodi in me laudes contuleritis . nec uero id dico , quod uestram erga me uoluntatem uos aliquando mutaturos in suspicionem ueniam . licet enim , puerilis ætas ad instituendas amicitias fortasse uideri possit

possit promptior, quam ad eas retinendas constantior: vos tamen, qui in puerili ætate senili estis prudentia, perpetuam in amicitia constantiam seruaturus confido. has igitur laudes, tanquam splendidiores exuias, mihi-
que fortasse breui detrahendas reijcio: amorem ipsum, qui me tantopere exornat, pari amore complector. vos igitur, quamdiu viuam, amabo fraterno pane amore, virtutemque vestram, quæ instar exorientis solis novos emittit radios, ipse ad Occasum vergens procul suspi-
ciam; nouaque ista luce tenebras meas aliqua ex parte conabor illustrare. Valete. Genue. VII. Kalend. Nouemb. MDCXIV.

IOANNI NICOLAO SAVLIO
CARREGAE.

Gregorius Bertolottus.

NVLIVS licet vnquam dubitandi locus relictus mihi fuerit, Religiosissime Pater, quin aliquando pro maxima virtutis tuæ, tuique ingenij expectatione, proque eximio tuæ familiæ splendore te singularem, præstantemque virtutis, & sapientiæ gloria virum visuri aliquando essemus; incredibili tamen prope latitia sum affectus, cum id mihi nunciatum fuit re, & verbis accidisse, Deumque immortalem virtutem tuam amplissimæ dignitatis radijs collustrasse, cui te a primis adolescentiæ tuæ floribus, tamquam nouum semen in amœnissimis Orthodoxæ Ecclesiæ viridarijs addixisti. Incredibilis igitur, atque immensa fuit latitiæ meæ significatio. Verum illud vnum nescio gratuler ne tibi, an Iosepho Araldo

do erudito pariter, atque religioso adolescenti; etenim
 si perspiciam, quorum gratia apud me magis excellens
 videatur; ante oculos mihi proponitur præclarum, atque
 singulare eiusdem beneficium, qui, cum nondum ego vir-
 tutis tuæ radijs fuisset aspersus, ita mihi eos patefecit,
 ut nonnullas mihi ex tuis litteris typis mandatas lar-
 giendo animum meum ad maiores virtutis amplexus
 confirmarit. si vero te inspicio, video te mira conspicuum
 virtute, fulgentissimisque Tullianæ eloquentiæ radijs ita
 decoratum, ut quisque te summo in honore habeat, iustis-
 simisque laudibus exornet. Quapropter & utrique, &
 mihi pariter gratulabor, cui, cum & tua perfrui amici-
 tia concedatur, tum etiam, cum amicorum omnia ami-
 cis sint communicanda, ex tua summa laude in me hono-
 ris aliquid redundaturum minime despero. Te igitur di-
 uina voluntas, tuæque cœpta fortunare velit, teque ad
 altiores virtutis gradus, pro ut postulant tua promerita,
 extollat, ut duce te, tuo Ordini, tuisque amicis ad im-
 mortalem gloriam aditus aperiatur. Vale.

IN EIVSDEM LAUDEM.

SI tantos video radios, dum lumina claustris
 Clauduntur, quales, si patefacta forent?
 Cernere fas esset nitida te in luce micantem,
 Phœbæamque tuo fronte nitere facem.

O

GRE-

106 IO. NICOLAI SAVLII CARREGAE
GREGORIO BERTOLOTTO
Philippi filio.

QVANTOPERE a verbis facta distent, & hæc illis anteponenda sint, neminem esse arbitror, qui ignoret. Grauibus, ornatisque verbis me laudas, & tanquam claritatis fama conspicuum omnibus proponis, cum ipsis tamen laudibus re ipsa minime respondeam, & in tenebris ita deliteſcam, ut, quid optimum sit, nec ipse videam, nec alijs videndum præbeam. alios progressus in litteris, ac moribus fecisse me oportuit, ut is essem, quem me facis, quemque ab alijs haberi vis; cum mihi tamen ultra mediocritatem quamdam progredi datum non esse res ipsa indicet. Laboravi equidem semper, non ut illam, quam appellas Tullianam eloquentiam, mihi compararem, sed ut cogitationes meas non inornate explicare possem; & in hoc ipso studio diligenti satis cultura ingenium excolui meum. verum dum aliquem in laboris fructum inde me percepturum sperabam, ipsius me fructus exspectatio sterilitate, atque inanitate quadam elusit egregie. Sed litterarum studia omitto. nihil enim nunc minus cogito, quam ut, quod adhuc non feci, deinceps facturum sim; cum immutata vitæ ratione, ad alia mihi animus conferendus sit. in hoc autem ipso vitæ instituto numquid Religiosi viri officio fungor? num D. O. M. cui me totum, licet undecima hora, addixi, vere, & ex animo serui? num saltem illi pro tanto beneficio gratias ago? vereor enim, cum plus debeat qui plura acceperit, ne maius mihi onus, quam antea imposuerim. quamobrem nihil mihi laudatore, sed acri potius monitore opus est, cuius voce, longo veluti e somno excitatus, ipse

ipse mihi serio, quamuis sero consulere possim. Verum-
 tamen, quia tuus in me amor, ut video, laudatoris par-
 tes tibi imposuit, hunc ipsum amorem complector, &
 amo; nihilque malo, quam ut, si laudibus longe impar
 meritum sit, tuo tamen in me amoris meus itidem in te
 amor par, & equalis omnino sit. At optimi, & mode-
 stissimi adolescentis Iosephi Araldi, qui mihi epistolam
 tuam attulit, & amorem detulit, mirum ad concilian-
 das amicitias artificium laudo: quamquam ipsius ni-
 mis propensam ad me, meaue laudanda voluntatem
 laudare nec possim, nec debeam. is enim si tibi vera de
 me narraſſet, eas in me laudes profecto non contulisses,
 quae, patefacta veritate, & tibi recti iudicii laudem adi-
 mere, & mihi timorem dedecoris iniicere possent. quae
 quidem laudes quanto magis tibi conueniunt? tu enim
 nullam praestantiorē adolescentiae commendandae ratio-
 nem existimans, quam pietatem in Deum, & littera-
 rum cognitionem, altera quotidie magis incenderis, in
 altera vero non mediocriter excellis. tu his nouissimis
 temporibus, quibus antiquus Poetarum, & Oratorum
 flos exstinctus videtur, in tenera etate maturiori ingenio,
 suauissimos utriusque facultatis fructus iam affers. tu
 denique viam ingressus es, quae nullo est vulgi impressa
 vestigio, quaque ad laudem, & gloriam aditus patet.
 perge, ut coepisti, Adolescens mihi carissime, nec vlla te
 retardet vel Mundi fallacia, vel voluptatis illece-
 bra. cerno iam animo, ubi cursum perfeceris, fore,
 ut Familia tua non tam Paterna uirtute, quam tua
 ipsius propria commendetur; Patria uero non magis
 rerum gestarum splendore, quam praclaris ingenij tui
 monumentis illustretur; ipse denique eam tibi gloriam

*compares, quæ innumerabili annorum serie uiuat, atque
uigeat. Vale. Gen. Pridie Kal. Decemb. MDCXIV.*

AD MODVM REVERENDO PATRI
Iacobo Lambertengo è Societate Iesu.

TAM arctis amicitiae uinculis cum alijs Societatis
uestrae Patribus astrictus antea fui, ut, nihil arctius
astringi posse existimauerim: sed multo arctioribus
nunc tecum ita astringor, ut, illa priora laxissima fuisse
uideantur. idque plane sum admiratus, ac nunc etiam
magnopere admiror. inerat in illis doctrina singularis;
multa non deerant, quibus ad amandum allicimur; &
nullus tamen eorum, æque ac tu, amabilis mihi, atque
coniunctus fuit. nimirum humanitas ad animos capien-
dos multum potest; occultior uero naturæ uis ad eosdem
coniungendos plurimum ualet. utrumque in amicitia
nostra re ipsa comprobari uideo, cum & humanitate tua
me plane deuinciri, & sensus meos cum tuis omnino con-
gruere perspiciam. quæ quidem humanitas cum summa
generis nobilitate, summaque Theologiæ, ac utriusque
Iuris scientia coniuncta multo quidem acrius me obstrin-
xit, atque uehementius. Sed illud mirum, quod quamuis
tot ornamentis ipse excellas, ex ijs tamen laudem non
aucuparis, cum & bonis externis propter Deum nun-
cium remiseris, & bonis animi ad ipsius Dei laudem,
hominumque utilitatem tantummodo utaris. Quis scien-
tiæ tuæ fontem sibi clausum esse unquam sensit? ille qui-
dem ita mihi patet, ut, quidquid opis, quidquid consilij
ad me ipsum, vel alios iuuandos opus sit, ex eo singulis
horis haurire possim. nam, cum propter rei ipsius difficul-
tatem,

tatem, & varias Doctorum opiniones, quod ad moralem Theologiam attinet, multi sepe fallantur, & cæcis in tenebris oberrent; ego, qui meis viribus ita diffido, ut, tutiorem in partem semper inclinem; te vnum præcipue elegi, qui me, expulsis errorum tenebris, in veritatis luce constitueres. idque tam diligenter præstitisti, & præstas, ut peritiorem ego animi Medicum, vel præstantiorem viæ salutis Ducem, quam te, nouerim neminem. itaque quod nemo præterea querendus mihi sit, magnam sanè letitiam, utilitatemque capio. nam, qui crebro remedia mutat, sanitatem non consequitur; & qui per multas vagatur vias, quod constituit, nunquam peruenit. Neminem itaque plane dixerim esse, cui me plus, quam tibi debere confitear: cum pijs hominibus nihil gratius, utilius ve sit, quam, cum ex varijs opinionum fluctibus, in tutum, & tranquillum veritatis portum leniter prouehantur. cuius quidem utilitatis & alij pene innumera- biles participes sunt, qui propriæ salutis amantes ad te concurrunt, vel consilium, vel auxilium petentes, in ijs, & fortunas suas, & salutem sitam arbitrati. profecto quemadmodum in quibusdam Ciuitatibus patronus causis publice constituitur, ita in hac nostra animabus curandis, ijsque in viam rectam deducendis, ipse Medicus, & Dux publice constitutus videris; ita ut ex tua vnus vita omnium pene vitam pendere fateamur. nullus igitur est, qui non hanc ipsam vitam tibi longio- rem dari velit; immo qui non suam, si fieri possit, tibi libenter largiatur, ut animarum vitæ quæ vera demum vita est, diutius consulas. ac utinam totum Ius Pontifi- cium ita disponderes, & explicares, ut unico prope intui- tu posset perlustrari. non profecto paratiores in eo, ac
prom-

promptiores essemus; ipse vero quemadmodum praesentibus, ita & posteris, maxime prodesse. quod enixe a te petimus, id omnino nos impetraturos confidimus, cum praesertim in hoc opere omnium tuorum laborum fructus pene consistat, teque Virum esse prorsus ad hanc rem natum videamus. Ac Societas quidem vestra huius rei spem nobis maximam affert, cum illa veluti pia mater non tam praesentis, quam futuri temporis rationem habens, complures quotidie libros à filiis suis, in omni scientiae genere docte, eleganterque conscriptos in lucem emittat. praemanibus nunc habeo eiusdem Societatis Historiarum volumen primum, quae ita me delectant, ut eas nunquam intermittam, nihilque in vita mea legerim libentius. quod si Deus mihi largiatur, ut, cetera Volumina iam instituta, absoluta videam, pro tam exoptato beneficio maximas illi gratias agam. quod non despero: quid boni enim non parturit Societas vestra? illa quidem ad Iuuentutem sancte, & sapienter instituendam, & ad Dei cultum augendum, & conseruandum, ipsius Dei munere Christianae Reip. data mihi videtur. tuque illam doctrina, & prudentia ita adiuuas, ut ex laboribus tuis illius laus & existimatio non parum augeatur. Ego certe eam tanti facio, ut mecum praecclare actum existimarem, si qua mihi contingeret illi inseruiendi facultas. quod si nunquam acciderit, quod proximum est, libenter faciam, ut scilicet, quantopere ipsam, teque in primis amem, atque reuerear, quibuscunque significationibus possim, & tibi, & alijs ostendam. quod adhuc & diligenter praestiti, & diligentius deinceps, Deo iuuante, praestabo; mei in te amoris aliam mercedem non desideraturus, quam ut mei
semper

EPISTOLARVM LIB. QVINTVS. III

*semper memineris, meque tui amantem velis redamare.
Vale. Genue. ex Carbonaria. Prid. Idus Aprilis.
MDCXV.*

IOANNI BAPTISTAE PONTE.

NON satis firmo nititur adminiculo Sodalitas Natiuitatis B. Mariæ Virginis, postea quam & Superiorum iussu, & Sodalium voluntate ego adductus illius regendæ, gubernandæque onus suscepi. quod quidem tametsi libenter subierim, ita in dies graue experior, ut nisi me Deus idemtidem alleuasset, illud iampridem deposuissem. Difficilis enim est animarum cura: & qui alios meliores præceptis suis faciendos suscipit, ut factis dicta comprobet, & ipse perfectus, ac sapiens sit, necesse est. ut omittam. quod tanta sit diuersitas eorum, qui in via Dei ambulant, & ad perfectionis metam adspirant, ut diuersæ quoque instituendi rationes sint adhibendæ. alia enim incipienti, alia properanti, alia peruenienti debetur institutio. Illud quidem uerè affirmare possum, me adhuc Sodalitati non defuisse, nec ullo unquam tempore defuturum esse. omnia enim libenter amplectar, quæ ad eam ornandam, augendamque pertineant. idque ut faciam, una harum quæuis ratio me magnopere hortatur, uel Obedientia, quam profiteor; uel quod à Sodalibus me amari intelligo; uel quod ipsi B. Mariæ Virgini sum addictissimus. quid præterea tam pium, tam religiosum, tam utile, quam à uitijis homines detertere, ad uirtutem adhortari, ad æternam uitam incendere? itaque cum salus omnium uestrum mihi proposita sit, ac pro ea nulum sim recusaturus laborem, sequitur, ut uos quoque
omnes

omnes amem, charosque habeam, charioresque, quo meliores eritis, & magis studio summi boni incensi. Tu ipse vero, ut mihi charissimus, iucundissimusque sis, sermonis affabilitate, suauitate morum, vitae integritate consecutus es. & cum te filij loco habeam, quia si minus natura, tibi Pater animo sum; hinc fit, ut paternè te amem, & tibi vicissim omnia timeam, carnis illecebras, Mundi pericula, Sathanae insidias. cum præterea multis viarum ambagibus nihil quidquam magis tortuosum sit, aut erroribus magis obnoxium, quàm rerum humanarum cursus; ut cautè incedendum sit, ne amisso prudentiæ filo, labyrinthæis seculi flexibus implicemur. Itaque quamuis omni laude dignissimus sis, tamen non tam ad te laudandum, quàm in ipsa laude cohortandum impellor, eoque vehementius, quo ipse magis culpari metuis, quàm laudari cupias, & sine vlla spe laudis ad ipsam virtutem animum inflammas. neque vero dubito, quin ipse tibi in rectè agendi perpetuitate constes. nam cuius constans vitæ ratio est mihi notissima, illius inconstantia cur mihi sit pertimescenda? cur non potius maiora ab eo sint mihi exspectanda? sed Imperatores imitari volui, qui militum præliandi ardorem adhuc etiam verbis incendunt. Illud in primis tibi penitus hæreat, pietatem in Deum fundamentum esse omnium virtutum. quod a te præclare iactum cum videam, non dubito, quin singulas partes rectè sis quasi exædificaturus, unde admirabilis surgat vitæ spiritualis constructio, & prosperè tibi procedant omnia. neque ipse tanta afflueres consolatione; non tam Matri tuæ obsequens; non erga amicos tam officiosus esses; neque in rebus prosperis, vel aduersis tam moderatus, & constans, nisi tibi Deus adesset, qui actiones

nes tuas vnus moderatur, ac regit. hinc euenit, vt in
 consilium cogitationum tuarum timorem Dei semper ad-
 hibeas; virtutis possessionem tanti aestimes, vt prae ea
 cetera contemnas; & nihil labores, quid homines de te
 loquantur, aut cogitent, sed a te ipso pendeas, & in opti-
 ma conscientia omnia posita habeas. Ego equidem mise-
 rius nihil esse existimo, quàm a vulgo pendere, qui in
 iudicandis rebus opinione magis ducitur, quàm veritate.
 Vbi enim veritatem opinio vincat, nihil ibi inesse boni
 quis ignorat? nec illud in tuis laudibus postremum du-
 xerim, quod in eligendis amicis ita cautus, & diligens
 sis, vt nisi optimos, & probatissimos eligas, his praesertim
 temporibus, quibus paucos inuenias, quorum consilio
 adiuueris, paucissimos vero, ne dicam nullos, quibus pe-
 ctoris arcana tutò committas, aut quorum auxilio uta-
 ris. quod autem in amicorum consuetudine tam comis, &
 facilis sis, & pro temporis opportunitate, dulcibus eam
 colloquijs, facetijsque condias, id quoque nemo non laude
 dignum magnopere duxerit. Si quidem non est animus
 assiduo labore intendendus, sed honesto otio interdum re-
 laxandus, vt haec alternantes ad ipsos labores perferen-
 dos alacriores reuertamur. qui quidem labores tanto tibi
 leuiores videri debent, quanto maiora ex ijs Matrituae
 comoda comparas, quae maxima afficitur letitia, cum
 te videat alacri, libentique animo regendae domus ita
 secum munus sustinere, vt domesticam rem à Patre re-
 lictam industria, & labore augeas, atque conserues; ope-
 ramque des, ne, si paterna mors vobis mœrorem, dolo-
 remque attulerit, ipsi domesticæ rei damnum attulisse
 videatur. Praclarum quidem vitæ genus instituisti, in
 quo te perseueraturum, & ex eo haec te bona laturum
 P. confido.

confido. quietè, & tranquillè viues; ex temperante adoleſcentia corpus firmum, & integrum ſenectuti trades; & paratior eris, atque promptior, cum te Deus ex hac miſerrima vita ad ſe vocauerit. miſerrima, inquam, cum planè nihil ſit, quod nos hoc tempore ad viuendum inuitet; cum armis omnia perſtrepant; cum litteræ omnino iaceant; cum diuitiæ, quæ virtutis inſtrumenta eſſe deberent, ſeges vitiorum ſint, atque materies: vt nihil de Cœli intemperie, ac terræ ſterilitate dicam: vt omnium fraudes, odia, atque cædes, quæ vbique maxime vigent. quamobrem his malis relictis, ad illam cœleſtem Patriam omnibus bonis circumfluentem citato gradu properemus, ad quam cum vna, & ardua via ſit, ipſe tibi Dux, ipſe PONS eſſe debes, vt multò breuiore, & certiore itinere ad eam peruenias. Vale. Genuæ ex Aedibus. III. Kal. Nouemb. MDCXVII.



IOAN.

IOANNIS NICOLAI
SAVLII CARREGAE
GENVENSIS.

EPISTOLARVM
LIBER SEXTVS.

ADMODVM RR. PATRI
FRATRI FABIANO
FRAVEGAE GENVENSIS.

EREMITAE AVGVSTINIANO
EX CONGREGATIONE
Sanctæ Mariæ Consolationis.

SAONAM.

*Q*UAS in itinere ex Tristoria Genuam rediens
molestias pertuli, leues sanè fuisse arbitror
præ ea voluptate, quam ex nostra nuper
instituta amicitia solidam capio; cum ille
iam planè præterierint, hæc vero perpetua, ut opinor,
futura sit. nam, cum istuc iter haberem, & ab istis Pa-
tribus ita exceptus essem, ut nec hospitium melius, nec
hospites meliores inuenire potuissem; ipse in primis ita
me tibi deuinxisti probitate, modestia, humanitate, ut
non alius mihi quisquam te ipso charior sit. Cum autem

P. 2 maxi.

*maxima aeris perturbatio, frequentioresque de Cælo plu-
 uia omnem nauigandi facultatem adimerent, bono ani-
 mo ut essem hortatus es; mihiq̃ue mœrore penè confecto
 omnibus in rebus te auxilio affuturum non spopondisti
 modo, verum etiam re ipsa præstitisti; ut nec opera, nec
 consilium, nec labor unquam tuus vlla in re mihi defue-
 rit. his sanè de causis ad te amandum satis incensus
 sum; quibus cum accesserint amor Patriæ, quo nihil fa-
 cilius animos coniungit, & vincula Religionis, quæ in-
 dies arctiora fiunt, multo etiam vehementius sum in-
 flammatus. Militamus siquidem omnes in hac Christi
 militia sub egregio illo Antesignano Patre nostro Diuo
 Augustino, externis quibusdam ritibus discrepantes, re
 ipsa tamen mirifice congruentes. Itaque ubi primum in
 Patriam reuerii, illicò promisso satisfeci, & Epistolæ-
 rum librum ad te misi, quem abiens me missurum pollici-
 tus sum. Nam cum tu in meis rebus tam diligens fue-
 ris, me in tuis negligentiorẽ esse minime conuenit. Qui
 quidem liber cum tibi gratissimus fuerit, maximum om-
 nino fructum tulisse mihi videtur diligentia mea. Non
 enim illos imitari placet, qui ita ingrato animo sunt, ut,
 cum beneficium acceperint, nihil de referenda gratia
 cogitent; adeo ut, quisquis illis gratificatur, operam
 nusquam peius potuerit collocare: sed promerentes optime
 amo, & obseruo; optime de me meritos officijs prosequor,
 cum hoc eorum in me amor, illud eorum virtuti facili
 concefferim. Occasionem igitur mihi offerri cupio, in qua
 meam erga te beneuolentiam, & erga Familiam ve-
 stram obseruantiam declarare possim, & oblatam aui-
 de arripiam, vehementerq̃ue gaudebo. Quam quidem
 Familiam cum antea probarem, atque etiam laudibus
 ornarem;*

ornarem; tum multò magis eam probo, atque laudo, posteaquam illam erga peregrinos homines tam amicam, & beneuolam sum expertus. Ac ut habeas aliquod mei erga te amoris certius argumentum, te ad virtutem, ad decus, ad veram laudem cohortabor: quamuis tibi magnos in ijs progressus habenti gratulatio potius debeatur, quam cohortatio. In primis quid Deo potissimum debeas, & tibi ipsi, ac proximis, diligenter tibi considerandum est; cum viri Religiosi officium Viro Religioso negligere turpissimum sit. Obedientia tibi præcipue seruanda est, & Superiorum iussis, ut filium bonum optimo parenti, audientem esse oportet; cum obedientia Religiosis Familijs veluti ianua sit, qua effracta, & reuulsa tantis illæ ruinis patent, ut nullo modo subsistere satis queant. Quidquid oneris tibi impositum erit, quanto alacriori animo illud subieris, tanto leuior labor erit, maioremque tibi lætitiā pariet. Contemplationi denique tibi iugiter insistentum, cum illa viro Religioso anima sit, sine qua nullo viuere pacto potest. Hæc quæ scripsi, superuacanea fortasse fuerunt, sed eo lubentius scripsi, quod ea mihi quoque plurimum profutura intelligebam. Animus enim tuus mihi iam satis spectatus est: scio tibi ante oculos propositos esse Fabianum Clauarium. D. Matthæi Abbatem, qui de Cambijs egregie scripsit, & B. Baptistam Pogium istius Congregationis Auctorem, ambos Genuenses, quorum alter doctrina, & sanctitate floruit, alter pietate in Deum, & charitate in proximos maxime enituit. hos tibi imitandos existimas, ut eam gloriam, quam multis virtutibus partam sibi, & posteris reliquerunt, per summos labores non modo conserues, sed etiam augeas. quod te præstare cum intellexi antea, tum multò certius

certius deinceps intelligam . si de studijs tuis , deque profectu spiritali letiora in dies ad me perscripseris . quas enim proxime accepi , & quia tuam in me voluntatem apertius significabant , & quod ingenuè . ac simpliciter scriptæ erant , mihi iucundissimas fuisse scias velim . Ego quamquam tum officio Vicarij , quo fungor , tum illo Trioriensi negotio quotidie ferè distinear , è medijs tamen occupationibus ad te scribendi tempus eripiam ; & de profectione mea , cuius consilium in aliquot dies abieci , non committam , ut aliquid ignores . cum illud interea pro certo habeas velim , me quemcumque locum mutaerim , quasunque rerum varietates tulerim , animum erga te meum , qui amicitie nostræ perpetuitatem spectat , nunquam esse immutaturum . Vale . Genue . Kalend. Decemb. M D C X V I .

CAMILLO, ET ALEXANDRO
Pallauicinis Fratribus Ioannis
Andreae Filijs .

TERTIVS ferè agitur annus , adolescentes nobilissimi , ex quo ad D. Nicolai religionis causa vos contulistis ; & ego mirifica indole vestra impulsus , vos amare coepi , & amabiles cognoui . verum quamvis benevolentia erga vos mea mihi conscius essem ; tamen quomodo eam vobis probarem in tam tenera ætate constitutis non planè videbam . cum ætate postea virtus vestra simul accreuit , & mea pariter erga vos benevolentia magno incremento aucta est , adeo ut eam omnibus notam esse vehementer cuperem , atque testatam . hoc mihi cogitanti perbelle cecidit , ut proximis superioribus diebus iterum

rum ad nos veniretis; & virtus vestra, quam animo contemplabar, clarior oculis meis se se offerret. quæ cum eò, quo mea sponte propendebam, ipsa me impulerit, ad vos scribendi tempus maturius haud expectandum duxi. idque eo lubentius feci, quo gratius futurum intelligebam Iosepho Araldo adolescenti optimo, atque humanissimo, qui sæpe mecum, ut ad vos scriberem, accuratè egit: promeruitque, ne quid unquam à me petat, quod ego possim, quin illud statim obtineat. is profectò vos amat, obseruatque vehementer, ita ut, uno me excepto, qui ei minime concedo, alios quidem omnes faciliè vincat. Vobis igitur magnopere gratulor, quod in tantis errorum tenebris, quibus est hominum vita referta, veritatis lucem agnoueritis; quodque adolescentes cum tales existatis, quales vos esse oportet, qui Viri, confirmatam iam, & corroborata ætate futuri sitis, clarè ostendatis. nam, ubi animus semel ab adolescentia se virtutis amore deuinxerit, reliquæ vitæ partes similes consequentur: & quem semel accepit odorem ex pretioso liquore sincerum vas, eum postea nunquam amittet. Vos scitis, quam pauci sint, qui cum ex ephæbis excesserint, & paullo liberiores viuendi licentiam nacti fuerint, ab antiqua Maiorum virtute non degenerent; & Patriæ, Familiæ, existimationis denique suæ obliui non se totos voluptatibus dent, & inanibus rebus ducantur. horum more, atque exemplo vos victuros nunquam esse, sed potius operam daturus, ut quod rectè incipiendo virtuti didistis, id perseverando constantiæ tribuendum existimetis, magnopere confido. Vobis ingenium, valetudo opes non desunt: Parentes habetis optimos. vestrique amatissimos, Ioannem Andreæ Pallavicinum, & Dorotheam

theam Nigronam, ex quibus exempla vobis sumere licet ad omnes virtutes exercendas præclarissima. qui cum vos omni laude ornatos esse velint, non labori, non sumptui parcunt, ut res ipsa voluntatem consequatur. Itaque cum Thadaum Riccium, & Nicolaum Michaelium viros probitate, & doctrina præstantes, dignos iudicarent, quibus vos litteris, & moribus expoliendos committerent, nihil potius habuerunt, quam ut eos omni cura, ac studio ad hoc munus accerferent. quod illi quidem tantò diligentius præstant, quanto magis sperant fore, ut vos suam illustretis disciplinam, ipsi vero diligentia suæ uberiores in dies capiant fructus. Felici vestro contigit fato, ut vobis undique suppetant ad gloriam adiumenta. evoluite Annales. multos reperietis de nobilissima Gente vestra præstantissimos Viros, & imitatione dignissimos, quorum egregia merita omnis posteritas admirabitur. inter quos præcipue gratam, & iucundam memoriam habet Thobie Pallaucini Aui vestri clarissimi Viri nomen, non tam propter ædificiorum magnificentiam, quam propter amorem in Patriam, & Ciues, de quibus ita meritus est, ut quamvis ille iam pridem mortuus sit, omnibus tamen viuat, sitque semper victurus. Videte nunc à quibus Viris originem ducitis. quasi necessitas quedam vobis imponitur, ut per eam viam, quam vobis Maiores vestri vestigijs suis tritam reliquerunt, ad eorum gloriam perueniatis, aut aliam ipsi tentantes maioris gloriæ amplitudinem posteris relinquatis. Difficillima quidem res. Sed difficillima vobis, & optima molientibus aderit Deus, cuius quæ sit voluntas, quidque a vobis ille postulet, atque expectet diligenter est vobis attendendum, ut inter diuersa vitæ genera
illud

illud eligatis, quod illi gratius, vobis utilius, & gloriosius sit futurum. Non enim idem omnes vitæ genus delectat. alij litterarum scientiæ, alij rei militari operam dant. sunt qui in honoribus, Reque publica libenter versantur, non desunt, qui honestissimum otium molestissimis negotijs anteponunt. Vos interim, vt facitis, litterarum studia colite, in quibus plus præsidij esse ad bene beateque viuendum, quam in ipsa natura, nemo infitias ierit. In densa nocte essemus, nisi litterarum luce vita nostra collustraretur. qua quidem luce quia multi carent iam vita functi, ideo eorum nomina idem tumultus obruit, qui corpora contegit. & quia ex ijs, qui nunc viuunt, pauci sunt, qui litteris exculti sint, ideo Doctorum Virorum penuria laboramus, & multos rudes, & incultis moribus videmus. libri vero non vobis strictim attingendi, sed attente legendi sunt, & ad lectionem scriptio adiungenda, vt vtriusque rei ratio extet, & à vobis tempus utiliter traducatur. quid enim ad scribendum requiritur, quod vobis abunde non adsit? quæ amœnitas, quæ salubritas desiderari vnquam potest, quam vobis non suppetat Suburbanum vestrum ad D. Bartholomæi tam amplè, tam magnifice exstructum, vt illud admirari potius, quam æmulari aliena possit industria? Vita, quam viuimus, brevis est. sed hac breuitate non contenti, agendo, scribendo eniti debemus, vt, quanto vita breuior est, tanto nostri memoria longior sit. litteratos homines amate, amplectimini, & eos præsertim, per quos proficere, & a quibus virtutem accipere vobis contigit, nec eorum consuetudinem imitemini, qui eos, quos in adolescentia Duces in litteris habuerunt, cum ad prouectiorem ætatem peruenerint, contemnunt, atque despiciunt. Et quia

¶

valde

*valde diuites estis, quanto ditiores, tanto cautioreſe debetis in appetendis, vtendisq̃ue diuitijs. Honeſta ac-
quiſitio, & rei familiaris amplificatio laudatur, non
turpis quaestus, & auaritia. illa eſt hominis ingenui, &
liberaliter educati, hæc contempti prorsus, atque abiecti.
Thobias Frater veſter natus maior, cui in Sanctiſſima
Carmelitarum Diſcalceatorum Familia Ioanni Fran-
ciſco à Ieſu Maria nomen eſt, quanta animi altitudine
diuitias contempſit? quanta alacritate pro Chriſti nomi-
ne paupertatem elegit? ſed non omnes viuimus in Clau-
ſtris. in vobis nititur Familiæ dignitas, ſpes Parentum.
hic igitur ita viuite, vt illam augeatis, hanc vero felici
exitu comprobetis; & poſt eum vitæ curſum, quem vel
temperantia, vel natura dederit, meritis circumfluenteſ,
& gloria, in æternas Beatorum Sedes recipiamini, vbi
immortalem vitam degatis. Valete. ex ædibus. XI. Kal.
Februarij. MDCXVII.*

ADMODVM REVERENDO
D. Ioanni Baptiſtæ Caluo. I. V. D.

*MVLTIſ quidem, grauibuſq̃ue nominibus ornatif-
ſimo Adoleſcenti Iosepho Araldo me debere profiteor;
ſed nullo æque graui, atque illo, quod ipſe operam dederit,
vt amicitiam tuam conſequerer. nam, cum ille tibi de
mea erga litteras, & litteratos homineſ propenſione nar-
raſſet, aliqua mei conueniendi cupiditate incenſus eſ: ego
vero, cum idem mihi de mirificis tuiſ in omni genere lit-
terarum progreſſibus, deq̃ue tua in litteratos homineſ
præſtanti humanitate ſignificafſet, amicitia tuæ deſide-
rio ita ſum inflammatus, nihil vt ſenſerim ardentius.*
cui

cui quidem desiderio cum ipsa humanitas tua abundè satisfecerit, tantam concepi animo letitiam, ut quoniam ea haud contineri potuerit, foras ut erumperet, necesse fuit. Ac sanè diuinitus factum esse existimo, ut quo tempore de Seraphica Virgine Catharina Senensi, quam mihi aduocatam elegi, aliquid scribere cogitarem, eodemmet tempore litterarum ad te aliquid exarare animum inducerem. cui enim ad pietatem magis propenso, & eidem Virgini magis addicto, quam tibi, de ijs rebus, quæ ad illius Sanctissimam vitam pertinent, edifferere possem? quamobrem te rogo, ut omissis paullisper Iuris Pontificij, Cæsarei quæ studijs, in quibus excellis; posthabitis etiam Clarorum Virorum congressibus, qui amicitia tua vehementer delectantur; dilata denique multarum litterarum scriptione quibus ad Proceres, Purpuratosque Patres quotidie rescribis, hanc epistolam legas; & ad ea, quæ in ipsa scripta sunt, animum aduertas. Multos quidem Viros tulit Vrbs Senæ, qui in Sanctorum numerum relati sunt; sed nullum tulisse aut cælestibus donis ornatior, aut sanctitate celebriorem, aut Dei familiaritate admirabiliorem ipsa Catharina Virgine verè dixerim. quæ cum vel puellula externo corporis habitu omnibus amabilis esset; & interno mentis affectu Deo tantopere placeret; certè diuini aliquid, quod intus lateret, foris præseferbat. Vestigium vix imprimere, vix fari incipiebat, cum diuino iam ardebat amore, quem illi Deus inspirauerat, quippe qui eam sibi sponsam consecrandam, dedicandamque elegerat. in Deo illius spes, opesque omnes sitæ erant. vel eo præsentem se se oblectabat, uel absentem desiderabat. fruebatur sæpissime illius conspectu in Sanctissimo Eucharistiæ Sacramento, quod

Q 2 pro

pro suauissimo cibo habebat, eoque quotidie reficiebatur, ita ut nullam naturalis cibi suauitatem sentiret, quae multos etiam menses carere consueuerat. & ipse Deus in eius corde habitabat, quia mente, & animo purissima erat; & corpore in terris degens, animo tamen uersabatur in Caelis. Contemplationis dono fuit insignis. illa saepe orans in aerem sublimis eleuabatur. Saepe immota iacebat sine mente, atque sensu, ut pene mortua uideretur. uberrimos autem fructus ex contemplatione percipiebat. illius enim mens quanto altius, & excelsius appropinquabat Deo, ac se uiciniorum splendori lucis eius obijciebat, tanto magnificentius, & clarius eius lumine radiabatur. hinc multos scientia antecedeat, tametsi litteras non didicerat; scientia, inquam, non humanitus acquisita, sed diuinitus infusa; non a libris petita, sed ex ipsius Domini Saluatoris pectore hausta. hinc etiam prophetiae dono pollebat, ita ut ea non modo, quae facta erant eloqueretur, sed quae erant futura, sciret, & prauideret. neque uero propriae consolationi tantummodo indulgens, quae sua erant, cogitabat, atque querebat; sed ad animarum salutem se se conuerterat; & ad eam procurandam cum domesticos fines angustos existimaret, uniuersum pene Mundum mente, & animo comprehenderat; totumque, si opus fuisset, uel nudis pedibus libenter peragrasset. Nam licet a publicis rebus curandis sexus, & inualetudo eam auocarent; tamen, & quia Deus opera illius ad renouationem Ecclesiae, totiusque Orbis salutem uti volebat; & quia ualde indiligentes erant ij, quos haec omnia curare oportebat; diuinæ uoluntati obtemperandū; & aliorū indiligentia sua diligentia occurrendū existimauit. Infirma ferè seper ualitudine

tudine fuit : sed tantum abest , ut corporis infirmitas
 vim animi refringeret , ut etiam quanto corpus infir-
 mius , tanto illi animus acrior . & vegetior esset ad cari-
 tatis officia exercenda , in quibus illa ita diligens erat , ut
 ne nocturnum quidem sibi tempus ad quietem relinque-
 ret ; sed proximorum curam saluti corporis anteferret .
 Errantes reducebat ; labantes confirmabat ; cadentes eri-
 gebat . quis illius praeceptis non commutabatur ? quis adeo
 ferus , ut non mansuesceret ? quis non alius , quam vene-
 rat , reuertebatur ? sola omnium erat remedium ; com-
 mune omnium erat perfugium . certè quod Florentia In-
 terdicti percussa gladio , Summo Pontifici reconciliare-
 tur ; quod Pontificia Sedes Auenionem translata , Romæ ,
 ut antea , collocaretur ; quod denique Ecclesia Dei maxi-
 ma Schismatis perturbatione iam diu fluctuans in tran-
 quillo , & tuto sisteretur ; huius Virginis pietati potius , at-
 que sanctitati , quam aliorum virtuti , atque consilio est
 assignandum . neque illos , quos in vita iuuerat , in morte
 deferuit ; sed quanto ipsa Deo vicinior , tanto illis prae-
 sentior erat . quæ quidem mors extremus veluti actus cæte-
 ris vitæ partibus sanctissimè peractis consentanea fuit .
 in imaginem enim Christi Cruci affixi oculis defixis , ea
 loquebatur , quæ humanam intelligentiam superabant .
 idemtidem sanguinem repetebat , illum videlicet sangui-
 nem , qui pro salute hominum effusus , dubium non est ,
 quin Deum adiutorem , deprecatoresque habeat . percu-
 tiebat pectus , & de multis se accusabat , ac cælesti spon-
 so pro adstantibus supplicans , quibus salutaria consilia
 dederat , cum ipso dulcissima colloquia habens , ad illius
 suauissimos amplexus euolauit . Ad illius sacrum cor-
 pus non tam odoribus fragrans , quam miraculis coru-
 scans ,

scans, incredibilis hominum multitudo concurrat; amissam Virginem lacrymis requirunt; & cum ea simul vitam amississe fatentur. Felix quidem Vrbs Senæ, quæ talem edidit partum. Felix etiam Roma, quæ tantum in sinu retinet pignus. O si mihi daretur ad illius sepulchrum assistere, quas tunc lacrymas, quæ tunc oscula illi darem? quam libenter illud mihi domicilio eligerem? sed quando hoc non licet, illud saltem liceret, cubiculum illud scilicet amplecti, osculari, in quo ipsa habitasse dicitur, dum Genua iter habens Auenionem peteret. Omnia enim, quæ huius Virginis memoriam mihi afferre possunt, libenter perquiro; & pictam illius imaginem mecum semper habeo singulis horis conspiciendam. quæ quidem quomodocunque expressa ita delector, ut, cum in ea ipsam Virginem contemplor siue sacra stigmata accipientem, siue cor suum cælestis sponsi corde commutantem; siue diuino coniugio se promptam exhibentem; summa voluptate perfundar, pari utilitari coniuncta. Restat nunc, ut ad hoc clarissimum Cæli lumen, & amplissimæ Prædicatorum Familiæ splendorem, & decus oculos conuertamus; eamque assidue rogemus, ut de loco illo tranquillissimo nos incerto salutis exitu, cæcis in undis miserè errantes respiciat. sit nobis portus, & requies, cum in ea sit spes tanta sita salutis. ut nos non deserat, ne pereamus, sed nos adiuuet, ut salui simus: cum adiuuare nos possit, tanta illius sanctitas est, & cum sanctitate potestas. Sed longior fortasse fui, quam studia patiantur tua. ea igitur per me, ut repetas licet, & Primarijs quoque Viris consuetudinis, & eloquentiæ tuæ, ut consuesti, copiam facias. Non enim exigua esset iactura, si aut ipsis studijs deesses, quibus te ipsum, Familiam, Pa-

Patriamque illustras; aut amicis te subtraheres, qui ex sermonibus, & epistolis tuis maximam percipiunt utilitatem. Ego equidem satis habeo, si locum dederis mihi inter eos, qui tibi aliquando in animo adsunt; huic vero epistolæ interea, quæ non omnino tuis ab oculis absunt. quam quidem nulla alia de causâ ad te scripsi; nisi ut illa sit meæ erga te voluntatis pignus, quod in dies arctius obstringatur; pietatis vero meæ in Diuam Catharinam Senensem perenne monumentum. Vale. Genuæ ex Aedibus. Kal. Aug. M D C X VII.

IOANNI FRANCISCO BALDO.

BELLVM quantumuis crudele inferat hominibus antiquus ille hostis: optimis eos armis paratiores inueniet, quam ut ullo modo vinci possint. verum nulla armatura melior contra eum potest inueniri, quam Beatissimæ Mariæ Virginis patrocinium. Extulerat caput successumens callidus ille serpens, posteaquam Euam insecerat. Sed ex quo illud ei per Mariam Virginem contritum est, ita debilis iacet, ut nullos nisi sibi adherentes acerbitalis suæ viru possit inficere. Illius igitur auxilium tanquam remedium valde efficax aduersus tam venenati serpentis pestiferos afflatus, merito imploramus. Sed si tempus ullum datum fuit hominibus per eiusdem Virginis merita a Deo impetrandæ veniæ, consequendæ salutis; nunc certe opportunissimum datur, posteaquam ipsa. B. Virgo, cui in Cælo celsissima sedes est, in templo, quod a Vineis appellatur, suam mirabiliter dignata est opis præsentiam declarare. Duo quidem templa extra Urbem habemus Sanctæ Mariæ Coronatæ unum, eiusdem

dem de Monte alterum. Sed ea longius absunt, quam ut commode adiri, frequentarique possint. inter alia vero, quae Urbis ambitu continentur, illud quidem à Vineis antiquitate magis, quam cultu, aut religione praestabat. nunc autem tanta hominum frequentia celebratur, ut non illius antiquitas maior, quam sanctitas, atque religio sit. Hic ardentiori pietatis studio ipsi Mariae Virginis preces fundimus. Hic illa nobis munificentiori manu Filij sui dona distribuit. In quo quidem templo, cum multa laudanda sint, tum in primis concio illa, quae de huius Virginis laudibus singulis diebus Sabbati habetur, & admirabilis titulorum series musico modulata concentu, quibus eam inuocamus, nunquam satis laudari potest. Illud vero Virginis simulachrum è marmore quanto pere intuentes ad pietatem excitat? optimum quidem exemplar animo comprehensum artifex habuit, nec minus artificiosas ad illud perficiendum manus admouit. Sic est in Virginis vultu mixta Virginitati animi submissio, amoris reuerentia, ut ex ijs amabile nescio quid, & admirabile oriatur, quod maxima letitia, & admiratione homines afficiat. Cui quidem simulachro cum Sacellum aedificari institueretur, tanta Virorum, ac mulierum multitudo confluxit lapides, & camenta portantium, ut illius perficiendi desiderio omnes urgeri, & omnes tam pium hoc opus urgere viderentur. res quidem pulchra visu, & admirabilis fuit; at illa pulchrior, & admirabilior, cum omnes ferè hominum Societates, & Ordines ad hanc ipsam Virginem concurrebant aliquod ei donum deferentes, suam, ut poterant, pietatem testantes. ut, admirabilem illam celebritatem omittam, quae per multos dies totam Urbem occupauit, cum in eodem templo,

templo, eidem Virgini est aurea imposita corona, & festis ignibus, latisque plausibus collucebant, resonabantque omnia. Quæ quidem officia illi grata exstitisse, vel ipsi muti parietes, in quibus tot donaria, votivæque tabellæ suspensæ visuntur, abundè testantur. quamquam tanta est magnitudo beneficiorum, quæ ex ea quotidie accipimus, ut, ne minimam quidem partem, vel omnibus ei tribuendis honoribus, vel exhibendis obsequiis, assequi possimus. Nunquam illa de nobis vel indignis ejicit animum matris. & quia tanto est potentior, quanto benignior, cum filiorum miseretur, tum illis omnia impetrat à Deo. Quis unquam ab hac Virgine frustra auxilium petijt? quis unquam spe deceptus est, qui in ea spem collocavit? quis non maiora accepit bona, quàm quæ sperare ausus sit? Felix Genua, si illud sibi persuasit nulla re magis tutas reddi ciuitates, florentes ve, quàm si in eis Beatae Mariæ Virginis vigeat cultus. Felicior vero, si thesaurum tam magnum, tamque præclarum nullo unquam tempore amiserit. Memoria certè Patris Fidelis à Sancto Germano Capuccini Concionatoris egregij, qui tam salutaris operis fuit inuentor, perpetuò vigeat. nec ullus templum illud aspiciet, quin huius Patris studij, laboris, diligentiae testis, & præco futurus sit. id enim facere consueuerunt homines, quibus in summi Dei obsequio, non modo sua, sed aliorum etiam salus curæ est, ut, quocunque ierint, ibi pium aliquod institutum relinquant. Ego equidem in animo meo nescio quid inesse sentio, quo me plus, quam cetera omnia, hoc templum delectet. & cum in eo, huius Virginis laudibus intersum, in earum contemplatione defixus, ita suauiter afficior, ut, mistis letitia lacrymis, Angelico con-

R centui

centui mihi videar interesse. O si viueret P. D. Benedictus Clericus Regularis iuuenis æque pius, ac doctus Frater tuus, pro sua in eandem Virginem incredibili obseruantia, quanta letitia perfunderetur? quamquam multò magis nunc ille letatur, cum huius Virginis præsentia fruatur in Cælo. quæ quidem res aliquanto minuit dolorem illum, quem ex illius præmatura morte omnes accepimus; tuque præsertim, Ioannes Franciscæ, cui ille frater erat, & huiusmodi frater, quo non alter amabilior, nec ab alio fratre magis amatus. & quem admodum moribus pares eratis, ita pietate erga Deum, & Deiparam Virginem uterque pariter excellebat. ex hoc tam firmo a te iacto fundamento, nihil non laude dignum, nihil non admirabile potuit excitari. hinc ille constans & æquabilis vitæ modus: hinc summa grauitas, cum pari humanitate coniuncta: hinc illa incredibilis modestia, & beneficentia, quam pro facultatibus libenter exerces. & ijs non contentus ornaſti pectus litterarum studijs, vel quibus ad humanitatem informamur, vel quibus rerum causas latentes exquirimus. & in ijs temporis tantum haud ponis, ut negotijs tractandis, vel curæ rei amplificandæ ullo modo desis. non quod nimia cupiditate habendi tenearis, sed ut inter æquales honestè viuas, litteratos homines foueas, & in pietatis officio totus incumbas. itaque non solum diues existis. quod assequuntur multi, sed etiam diuitijs sapienter uteris, quod paucorum hominum semper fuit. non igitur mirum, si tibi cuncta prosperè succedant; & maiores in dies accessiones fiant opum, honoris, existimationis. quod acceptum Beatissimæ Virgini Mariæ, quam vnicè diligis, merito refers. Cuius laudes celebrandi, cum pium illud opus
maxi-

maximo me desiderio inflammasset, te potissimum, cui hæc pauca perscriberem, mihi dari optabam. quæ cum longiorem desiderent orationem, ad totam historiam scribendam, cum per occupationes licuerit, animum fortasse adijciam. Hoc interim, quidquid est, summam perscriptum libenti animo accipias velim, testimonium futurum obseruantie erga te meæ iampridem aliqua epistola debitum, & nunquam persolutum; pietatis vero meæ erga Beatissimam Virginem Mariam aliàs persolutum, & tamen semper debitum, & deinceps nunquam non persoluendum. Vale.

I V L I O C A E S A R I I O A N N I N O;
Romam.

AMOR in te meus silere diutius non potest. qui quamuis idem sit, ac semper fuit; tamen tam diuturni silentij impatiens illud me rumpere tandem coegit. tibi igitur intimo mentis sensu salutem impertio, meque & corpore, & animo valere, tua causa omnia cupere, facile præstaturum quidquid possum, & valeo, omni asseueratione affirmo. te eodem erga me animo esse multis argumentis sum expertus. manet igitur amicitia nostra, mansura usque ad mortem. eaque coniungimur, quamuis locorum interuallo disuncti. Sed huius epistolæ non tam causa fuit silentium utriusque nostrum, quam laudabilis rei desiderium; quæ cum penes te sit, eam me facile habiturum confido. nam cum istic essem, teque domi tuæ conuenissem, vidi in cubiculo tuo picturam non minus pulchram, quam utilem, effigiem scilicet Thomæ Mori, quem Henricus Octauus Angliæ Rex crudelitate

R 2 inflam-

inflammatus cupiditati suae aduersantem occidi iussit.
 quam quidem effigiem cum ab homine Anglo accepisses,
 eam veræ consimillimam esse existimabas. illius igitur
 exemplar, in decima sexta, ut aiunt, folij parte, desi-
 gnatione tantummodo adumbratum, non coloribus ex-
 pressum, ita, ut, quilibet Pictor vel una hora extremam
 manum possit imponere, ut, ad me mittere velis, te
 etiam, atque etiam rogo. Multi enim sunt anni, cum
 ex Nicolao Sanderō, qui de Schismate Anglicano scrip-
 sit, Ioannem Rossensem Cardinalem, & Thomam Mo-
 rum martyrij gloria claros, ac Reginaldum Polumiti-
 dem Cardinalem martyrij cupidissimum, in summa ve-
 neratione habeo. quorum constantiam si quis non admi-
 retur; & eorum morti non illacrymetur Sanderum le-
 gens, durus, ac ferreus sit, necesse est. De imagine igi-
 tur mentis Thomæ Mori ex ipso Sanderō iampridem no-
 ueram; de corporis effigie ex te ipso nouisse magnopere
 letor: cum illa nihil consideratione dignius, hac nihil
 aspectu pulchrius esse possit. Et quoniam, librum te le-
 gisse dixeras, cui Titulus est Tres Thomæ, quos Aquina-
 tem, Cantuariensem, & hunc ipsum Morum esse existi-
 mo; si operam dederis, ut, quemadmodum in Summario
 Constitutionum Societatis Iesu, cuius desiderio ardebam,
 mihi satisfacisti, in hoc etiam libro, mihi satisfacias,
 præterita beneficia, ut soles, nouis beneficijs cumulabis.
 quæ quidem beneficia, ut, quantum tibi debeo, omnes in-
 telligant, alijs libenter prædicabo. tametsi id minime
 spectas, cum studio placendi Deo, non ambitione permo-
 tus benefacere consueueris. qua animi moderatione cun-
 ctis amabilior es, sicut vitæ integritate, atque doctrina
 dignissimus Paulo Aemilio Ioannino Episcopo de Monte
 alto,

alto, Fratre tuo Viro optimo, atque doctissimo. faxit
Deus, ut, quemadmodum ille ex longa peregrinatione
in illam Cœlestem Patriam feliciter peruenit, nos quoque
eadem felicitate vtentes in eam ipsam Patriam tandem
admittamur, ipsius Dei conspectu in æternum fruituri.
Vale. Genuæ. ex Carbonaria. V. Idus Maij.
MDCXVIII.

ADMODVM REVERENDO
D. Alberto Magno Romam.

TRIENNIVM, ut opinor, iam præterijt, ex quo
domum tuam veni tum tui salutandi causa, tum Siluij
Cardinalis Antoniani maturioris ætatis effigiem videndi.
Hæc enim deerat ad animum meum gaudio cumulan-
dum; posteaquam ab Albinio Attio Tudertino, & Ra-
phaele Gualterio Vrbeuetano duas habui effigies, qua-
rum altera ipse Siluius puer, altera iuuenis repræsenta-
tur. qui quidem viri nobilitate, & virtute præstantes,
ac ipsius Cardinalis propinqui, tanta humanitate, & ce-
leritate meo satis desiderio fecere, ut eis me magnopere
deuinctum fatear. Tibi vero quantum debeo, qui nulli
humanitate cedens, non modo optatam illam effigiem, sed
etiam alia multa videri digna mihi ostendisti; & insu-
per ad amicitiam tuam, qua nihil mihi carius esse potest,
aditum patefecisti? Non enim in tuo Museo quibuscumque
picturis locum dare soles, sed ijs tantummodo, quæ eorum
manu sunt, qui in pictura florere: cum illos tibi imita-
ri haud placeat, qui sine ullo delectu tabulas pictas coe-
munt; in quibus tantum abest, ut ulla sit utilitas, ut
etiam in ijs opera ludatur egregiè. Nam cum ædificium
quod-

quoddam deturbandum esset, in cuius pariete inerant Apostolorum effigies, manu Raphaelis Volaterrani pictura insignis, egregiè picta; ne simul cum edificio illa quoque delerentur, parietem ipsum in superficie secari, & ipsas effigies integras tolli iussisti. ijsque pulchrè circumornatis tuum voluisti cubiculum exornari. quamquam tota domus tua magnificè exstructa, non picturis tantum, sed & libris, & signis, ac eleganti supellectile abundè sit ornata: cum studio talium rerum a natura incitatus in eas pecuniae multum infumas; & quidquid infumis, tibi verè lucro, haud sumptui esse existimes. nec idcirco tua minor est erga Viros doctos beneficentia; cum bonis externis tanto magis abundes, quanto ijs sapientius utaris, Deo omnium bonorum largitore ea tibi de hominibus benemerenti conduplicante. Cum enim aliquot è Natione nostra Adolescentes Muscis dediti, alumni Simonis Molinarij ea scientia clarissimi, pietatis causa Romam venissent, in ijs excipiendis, atque adiuuandis ipsa tua magnopere enituit singularis beneficentia. quo quidem facto te non modo virtutem colere, sed etiam erga Viros virtute praeditos egregiè animatum esse ostendisti. rari exempli res. cum multi his temporibus oratione benefici sint, quorum auxilio ad rem non plus uti possis, quam eorum, qui iam vita functi sunt. De amicitia vero tua, ex qua mihi plurimum ornamenti, & gloriae potest accedere, magnopere mihi gratulor; existimoque illud haud paruum esse beneficium; quod nos, ut nos, cum planè nihil simus; ut clarorum tamen Virorum auctoritate innixi, aliquid, atque adeo plurimum esse videmur. ac nobis quidem valde honorificum est, cum ijs Viris placeamus, qui ob egregias suas virtutes clarissimis Viris cari accepti-

acceptique fuerunt . quis ignorat te in intimis ipsius Cardinalis Antoniani familiaribus fuisse , & sua illum consilia tecum libenter communicasse ? nec ille te tantopere amasset . nisi suo te dignum amore cognouisset : quippe qui amicos non ex diuitijs , opibus , aliquo ve priuato commodo , sed ex ingenio , doctrina , & sanctitate aestimabat . Vir ille quidem in omni etate , omni virtutum genere fuit egregius . & , quemadmodum bene posuit vitæ initia , ita is consentanea clausula fuit . ut non ille maiorem ineuntis etatis commendationem ab ingenij præstantia , quam progredientis , & deficientis a vitæ sanctitate duxerit . Tu verò illius per vestigia ad summam gloriam ita properas , ut nullus ferè tecum loquatur , quin statim singularis tuæ humanitatis , prudentiæ , doctrinæ , probitatis sit spectator , ac testis . Itaque necesse non erat , ut effigiem tuam pulcherrimè pictam mihi ostenderes ; quia cum mihi præsens esses , & effigiem virtutum tuarum in animo meo impressisses , altera illa coloribus expressa non indigebam nimirum nihil sapientius , utilius ve esse duxisti , quàm ex honestis cogitationibus , ac studijs eiusmodi in animo parare auxilia , quibus aduersa toleremus ; sæuientis huius vitæ maris impetum frangamus ; ac nos in tuto , & tranquillo statu collocemus . Non diuitias , honores , & cætera huiusmodi querenda , quæ varijs exposita casibus nobis vel inuitis sæpe auferuntur : sed virtutes , & animi bona , in quibus nullam homines partem habent , nihilque iuris rerum humanarum inconstantia . nec mirum , cum hoc sit proprium Familiæ tuæ Viros verè Magnos producere , qui eloquentia , & prudentia excellant ; & omnes in sui amorem , & obseruantiam pertrabant . nam , ut te omittam ,

cuius

136 IO. NICOLAI SAVLII CARREGAE

cuius modestia in os laudari minime patitur, Petrus ille Magnus, cuius elegantissimæ Orationes omnibus vigent, & in rebus agendis felicitas laudatur, verum esse, quod ego dico, fidem faciet. Ego equidem cum ipsi Cardinali Antoniano, vel mortuo, addictissimus sum. tum te, qui illum imitaris, & assequeris ita amo, & obseruo, ut, quacunque in re opus esset, meum omne studium, operamque omnem tibi libenter præstarem. qua quidem ut libentius, liberiusque utaris, ego prius exercendæ humanitatis, benignitatisque tuæ tibi occasionem præbebo. Cum enim Cardinalis Antoniani effigiem ob oculos mihi versari assidue velim, cubiculi ornamentum, animi incitamentum futuram; te rogo, ut illius exemplar, in parua solij forma, rudi penicillo utcunque delineatum ad me quamprimum mittere velis. quod si feceris, non paruo me beneficio obstringes; & cum tuam de hominibus bene merendi consuetudinem seruabis, tum ea, quæ ego de ipsa humanitate, benignitateque tua præsens sum expertus, non modo confirmabis sed etiam augebis. Vale. Genuæ. Nonis. Septemb. MDCXVIII.

IOANNI NICOLAO SAVLIO
CARREGAE.

Andreas de Benedictis. S. P. D.

PROXIMIS fortè diebus, cum in Patru mei Ioannis Augustini de Benedictis bibliotheca obuersarer, in Epistolarum familiarium Ioannis Nicolai Saulij Carregæ nomine librum incidi; quas cum ipsarum iucunditate captus totas perlegissem, ita rediuiuum in illis epistolarum

larum decus perspicuum, ac familiarem sermonem, venustos dicendi modos; apteque dispositos sales sum admiratus, ut ullis non modo non secundas eas duxerim, sed & omnes antecellere, & eloquentiae fontis Ciceronis epistolis conferre (pene dixi praepone,) non dubitarim. atque ubi ex eodem Patruo meo (ex illo quippe quis nam is esset, sciscitatus eram) tuum hoc in saeculo agentis nomen fuisse cognoui: & tibi non gratulari, & mihi non gaudere non potui; cum tantum, cuius instem vestigijs, virum habere, eique inter deditos pro ipsius humanitate cooptari contingeret. O te felicem optime Sauli, ac ter, & quater felicem, qui tale doctrinae summum posuisti, quod nemo adhuc posuit, fastigium. illudque virtutis superasti culmen, quod vel paucis peruenire, ijsque non nisi maximis cum laboribus, contingit. atque eo, mea sententia, felicior, quod in eiusdem placidissimo virtutis gremio positus, alios illam sectantes, aspero ad eam ascensu deterritos desistere, alios medio ascensu lapsu cadere miserrimo tutus prospectas. & hercle ipse inter discrimen subeuntes sum: quod si me in tuorum numero habeas, (quod vel maxime opto) felicissimis tuis auspicijs voti compotem futurum me nequaquam dubito. Vale. Genuae. Pridie Non. Octobris. Anno a Partu Virginis. MDCXIX.

ANDREAE DE BENEDICTIS.

LITTERARVM suauitate pascor: ex quibus maximas capio voluptates omnibus voluptatibus anteponendas. Si quidem alteras animi tranquillitas, alteras perturbatio consequitur. satiant istae, delectant illae. nec

S ipse

ipse animus dulciori alitur pabulo, quam cum rerum naturam contemplatur, & ex ijs, quæ oculorum sensu percipimus, erigitur ad ea, quæ intelligentia comprehendimus. Et certè, cum homo ad excelsa, & sublimia a Deo conditus sit, illius proprium est, ut litterarum scientia animum excolat, earumque cognitione ad ipsius Dei cognitionem aditum sibi communiat. Sed plerique mortalium inania quædam sectantur, & in ijs mente, animoque defixi veram solidamque gloriam contemnunt. qui quidem cum eam in diuitijs positam esse existiment, tota errant via, & viuentes, præter auræ popularis nescio quid, nil reliqui habent. morientes verò in æternæ obliuionis gremio sepeliuntur. Interim litteræ iacent deserte ab ijs, qui, cum opibus abundant, easque subleuare possint, in facinorosos potius homines opes ipsas effundunt. & non tam graue esset, si, cum litteris subleuandis laudem merere nolint, ijs non deprimendis culpa vacare vellent. profectò cum ipsis litteris non tam male his temporibus ageretur; neque illæ abiectæ, atque prostratæ ita duplici urgerentur ruina, ut se se erigere non possent. Sed ipsos litterarum contemptores omittamus; earumque, quantum possumus, tantum nos amatores simus. ijs enim a vulgo secernimur, & non minus ceteris præstamus, quam ratione mutis animantibus ipsi homines præstant. quod verum esse cum ipse noueris, ad ea, quæ in te natura contulit dona, etiam studia doctrinæ, quasi ornamentum, adiunxisti. in quibus ita versaris, ut Latinam linguam in delicijs habeas, iamque in ea tantum profeceris, quantum epistola mihi tua indicio fuit. Cuius ego amore ita incensus sum, ut nihil unquam senserim ardentius. Ambo igitur eloquentiam Latinam
amamus,

amamus. suspicimus, admiramur. riuales planè sumus,
mi Andrea; nec alter alteri de illius studio vel tantil-
lum concedimus. amamus tamen inter nos; nec alter
agrè fert, quod alter bonum illud consequatur, quod ipse
tantopere cupiat. qui quidem amor fortasse causa fuit,
cur me nimio plus in epistola tua laudaueris, tantumque
mibi in Latina lingua tribueris, quantum ego nunquam
sum ausus optare, nedum consequutus sim. Itaque si hæc
ipsa epistola in manus eorum fortè inciderit, qui dente
maledico omnia carpunt; & quantum alijs laudis ac-
crescit, tantum sibi minui putant; tibi certè negotium
non deerit, neque eorum acutissima linguæ tela euitabis.
quamobrem te rogo, ut ratione potius, atque veritate,
quam sensu amoris, qui sæpe fallitur, rem ipsam perpen-
das; & ea, quæ de me scripsisti, aut modereris, aut, quod
mibi gratius erit, omnino tollas. At quanto rectius nos
fecerimus, si eas ipsas laudes Ioanni Augustino de Bene-
dictis Patruo tuo Viro singulari eruditione, & probitate
prædito tribuerimus? is enim cum omnibus se bonis arti-
bus expoliuit, tum eas, nisi pietate in Deum innixas vir-
tutum omnium fundamento, inanes prorsus existimat.
profectò si domesticum istud, egregiumque exemplar ti-
bi ad imitandum proposueris, præclarum vitæ genus am-
plexeris; & in hoc itinere gloriæ, per eum cursum,
quem ipse Patruus tuus consilio, & prudentia diriget, ad
immortalitatis metam peruenies. Itaque quantum exi-
stimas eum ætate, & sapientia plus scire, & providere,
quam te ipsum tibi; tantum tibi providendum est, ut eum
attentè audias, ac illius consilijs, præceptisque obtempe-
res. Sed cohortatione non indiges: gratulatio potius tibi
debetur, quod a nullo magis, quam ab ipso, unde in litte-

S 2 ris,

ris, & in moribus proficias, tibi petendum existimes, atque adeo petas; ut de virtute potius, quam de bonis externis cogitare videaris; cum diuitias stabiles, & diurnas queras; nec industria vitæ, nec vigilandi labore ab ijs, qui citò perituras accumulant, vinci patiaris. Ego equidem, cum & Patruī tui amicitia, & amore, quo me complecteris, magnopere mouear; tantum te amo, quantum quis ab alio amari potest; & ad omnia, quæ opus fuerint, me tibi quam paratissimum offero. occasionem tibi gratificandi libenter arripiam. si minus se se obtulerit, hunc tamen animum perpetuò retinebo, eroque tuæ laudis non modo fautor, sed quantum in me erit, etiam amplificator. Vale. Genuæ. ex Carbonaria. XVIII. Kal. Februarij. Anno. MDCXIX.

BERNARDO CASTELLO.

POSTVLABAT vetus amicitia nostra, ac tua iam satis cognita virtus, ut aliquid etiam ad te scriberem; & illam quanti facerem, hanc vero quantopere admirarer per litteras ostenderem. Verum, quia tibi notum id esse sciebam: & amicitiam nostram ita firmam, ut nullo adminiculo; virtutem vero tuam ita illustrem, ut nullius testimonio egeat; hoc litterarum officio mihi supersedendum existimaui. in hoc autem proposito diu permansissem, nisi tua singularis industria, quæ in admirabili Tassij Poemate Picturis exornando vteris, de illo me deduxisset; effecissetque, ut ego secreta necessitudinis nostræ conscientia non contentus eam omnibus notam esse vehementer cuperem. Enimvero multis modis cum isto animo laudandus es, qui quantum penicillo, & arte vales, ad hoc

Poema

Poema decorandum niteris : ita ut quamuis illud antea
 & sententiarum grauitate , & maiestate verborum no-
 bis gratissimum , iucundissimumque esset ; nunc praeclaris
 imaginibus , & ornamentis gratius , iucundiusque videat-
 ur . quo Poemate ego ita delector , ut illud saepissime le-
 gam , & ita lego , ut illud mihi in dies magis placeat , at-
 que probetur . pulcherrima vero lectionis apud me haud
 ullum est maius indicium , quam crebra illius repetitio
 nunquam odiosa , nunquam molesta , semper grata , sem-
 perque iucunda , atque lectorem inuitans . Itaque cum
 saepe contingat , ut quae prima dies multis ingenij partu-
 bus initium dederit , haec eadem attulerit finem ; hoc Tas-
 sij Poema è contrario in dies magis , magisque vigeat ;
 & praesentis aetatis iudicium posteritas ipsa libenter se-
 quetur . At felici nostro contigit fato , ut , cum ipse Tassius
 ad Hetruscam lyram elegantissima varijs de rebus car-
 mina antea cecinisset , ad tubam maiore postea sonitu
 Bullionij res gestas caneret ; & quem nos in lyricis prae-
 stantem agnouimus , eum in Heroicis admirabilem cer-
 neremus . quamuis enim illius eximij ingenij acumen in
 omni ferè scriptorum genere , quo alios vicit , nobis co-
 gnitum sit ; in hoc tamen Poemate , in quo se ipsum vicif-
 se videtur , longè patet illustrius . quod quidem Poema
 tanquam sol inter sidera , sic ipsum inter reliqua Poema-
 ta , ipsis pene obscuratis , praecipuè fulget . cuius Aura-
 ram alterum illud Poema fuisse , quod ipse Tassius de Ri-
 naldo adolescente scripsit adolescens , rectè dixerimus . Ab
 Aristotelis praeceptis minime discedens unius rei argu-
 mentum ex nota , veraque Historia sumptum ipse Tas-
 sius exsequitur ; & super ipsam Historiam multa suo
 Marte , admirabilia fingit ; varijsque digressionibus a
 prima

prima propositione dependentibus, illud ipsum argumen-
 tum amplificans, usque ad finem summa dexteritate
 perducit. Prima autem Poeta laus in deligenda ex Ari-
 stotelis arte materia Poematis, mihi consistere videtur.
 hoc enim posito fundamento, tota Poematis constructio
 pulchrior, maiori comprobabitur plausu, ac magis, ma-
 gisque laudabitur. Quis eum Poetam libenter legat, qui
 lectoris animum in varias distrahat partes, ac exitus ex-
 spectatione, & argumenti obscuritate suspensum teneat,
 atque incertum? praeerea ipse Tassius Historiae verita-
 tem sequutus in suo Poemate personas inducit, iustitiam,
 fortitudine, & pietate insignes, cuiusmodi ex ipsa Histo-
 ria eas fuisse constat, quibus, quid deceat, quid aptum
 sit, diligenter attribuit, & attributum non adimit; ita
 ut quales ab initio descripserit, tales toto opere, & exitu
 praestet. illius vero Oratio, quantam vim, & efficaciam
 habet? quam iucundas translationes? quam praeclaras
 similitudines, & sententias? quam elegantes temporis
 descriptiones? semper novi aliquid affert, quod alios de-
 lectet; semper sui similis est; semper grandis, atque
 sublimis. nam, & si omnia in hoc viro fuerint Poetica
 ornamenta, praecipue tamen cernitur admirabilis, & ve-
 re Heroica dicendi maiestas. profecto quantum lingua
 Hetrusca, atque Poesis Torquato Tassio debeat, egregium
 hoc illius, ac singulare Poema erit testis. scio equidem fuisse,
 qui dixerit, ipsum Tassium eliciendis lacrymis haud
 satis esse felicem; a qua ego opinione ita dissentio, ut eum
 & legentis affectibus suavissime imperare, & eorum
 quasi quasdam habenas quamcunque in partem velit fa-
 cillime deflectere existimem. Quis tam ferus, ac ferreus
 sit, qui legendo Tancredi in morte Clorindae lamentatio-
 nem,

nem, ut alia loca omittam, lacrymas contineat? eo enim minus detrahentis oratio auctoritatis habebit, quo plus res ipsa, cui ille detrahit, ex contrario veritatis habet. nec magis est animus ad rectè iudicandum idoneus, si odio, aut amore impediatur, quam probè affectus sit oculus ad suum munus exsequendum, si aliquo impedimento conturbetur. multi enim sunt, qui quam gloriam scribendo consequi desperant, eam aliorum scripta malignè vellendo se consequuturos confidunt. Verumtamen ipsi Tassio, oppugnatio paucorum haud tantum nocuit, quantum defensio multorum profuit. quamuis enim fuerit semper inimica veritati improbitas, virtuti invidia, ipsa tamen veritas, atque virtus nunquam ita deprimi potuerunt, ut non illa notior, hæc verò fortior emerferit. Ego equidem nunquam adduci potui; ut ea legerem, quæ pro ipso Poemate, vel contra illud scripta sunt, cum in eo nihil mea quidem sententia iure reprehendi possit, sed omnia admiratione digna sint, adeo ut nullum illius vel impugnandi, vel defendendi relictum esse locum, & neminem ei maledicere, qui se ipsum inscitiae, aut malevolentiae non condemnet, existimem. Sed quid ego ipsius Poematis tibi nunc præstantiam prædicem, aut laudem, mi Bernarde? cum ipsum te nouerim, quam illius studiosus, ac bonus existimator sis. quamque ipsi Tassio vel mortuo addictus, qui eum in vita unice amaueris, multisque officijs adiuueris. quin etiam uni ex filijs tuis Torquato nomen indideris, ut huius clarissimi Nominis memoria ei ad virtutem incitamento esset. qui humanioribus litteris, ac Iuris Ciuilis scientia præstans, & insigni laurea parta, ac tanto se nomine dignissimum præbet. Ac mihi quidem, hanc tuam tam propensam voluntatem, & ad
picturam

picturam illustrandam, quam profiteris, & ad Poësim
 ornandam, quam vnice diligis, consideranti, & liberos
 tuos, vel picturæ, vel litteris deditos intuenti, domus tua,
 tuaque omnia Apollini, & Musis consecrata videntur.
 Vtinam multos socios haberes ad rem litterariam adiu-
 uandam, & tam præclaræ laudis possessionem, quæ nunc
 penè vacua conspicitur, simul tecum occuparent multi:
 magis profectò in litteras, ac litteratos homines id esset,
 meliusque res ipsa litteraria iret, quam contra nunc ire
 videmus. Tu verò perge, mi Bernarde, ut cœpisti in hoc
 tam præclaro virtutis ornandæ, illustrandæque sensu, &
 animum tuum aliorum auaritia liberaliorem faciat.
 hoc enim nomine haud mihi paulo chariores; quam quod
 multa mea causa præstiteris, & in ijs singulari diligen-
 tia, atque industria usus sis. meus vero in te amor,
 quamuis antea eum ego tibi sæpe declarauerim, & tu il-
 lum constantem expertus sis; spero tamen fore, ut dein-
 cept tibi notior & illustrior sit, eundemque perpetuum
 experiaris. Cuius quidem tanquam pignus, ac testem
 hanc epistolam habebis, quæ amicitiam nostram cunctis
 patefaciet, simulque meum de Torquato Tassio iudicium,
 opinionemque circumferet. quorum alterum huiusmodi
 est, ut ex omnibus, quot quot sunt, & fuerunt, neminem
 cum ipso conferendum existimem; altera verò huiusmodi
 nititur coniecturis, ut ex ijs, qui venturi sunt, neminem
 futurum augurer, qui ex Poetica laude ad ipsum adspi-
 ret. Vale. Genue. ex Carbonaria. XVI. Kal. Quinct.
 M DC XIX.

LAV.

LAVRENTIO RAGGIO.

TANTIS me obstrinxisti amoris vinculis, mi Lau-
 renti, ut me commouere nequeam. quibus alia adiunxi-
 sti officij, beneficij: factusque est arctior amicitiae nostrae
 nodus, nulla alia re, quam ipsa morte dissoluendus. Ita-
 que magis tuus, quam ego sum, esse non possum; operam-
 que do, ut tibi in amore respondeam, cum ceteris planè
 rebus nullo modo possim. cum amore autem cetera non
 congruere vehementer dolerem, nisi illud scirem, te,
 quae humanitas tua est, eo ipso esse contentum. humani-
 tate enim ceteras virtutes, quae in te sunt, quaeque alio-
 rum animos tibi conciliant, amabiliores reddis. in te
 igitur amamus, praeter Generis nobilitatem, ingenij sub-
 tilitatem, comitatem sermonis, pulcherrimarum rerum
 cupiditatem, pietatem in Deum, aliasque multas, quas
 nunc silentio praetereo. quis in adiuuandis amicis prom-
 ptior? in naturae causis inuestigandis solertior? in pro-
 curanda salute diligentior? Te felicem, qui veram glo-
 riam in virtute, non in diuitijs positam esse existimas;
 & quamuis mortale corpus habeamus, nos tamen fieri
 virtute immortales non ignoras. Viues post mortem, in-
 ore omnium gloriosus, ipsi morti, temporique superstes,
 cum mors contra multorum obliuione apud posteros, non
 gloria notetur. Sed quid obsecro tibi in mentem venit, de
 Imaginè nostrà in tuo Museo omni genere ornamento-
 rum referto collocanda? me planè rubore perfundit peti-
 tio tua, nec tanto dignor honore, qui hanc meam ingenij
 mediocritatem longè, multumque superat. cum praeser-
 tim industria uti velis Bernardi Strotij, qui his tempo-
 ribus Picturae est decus, & ornamentum: nec minus vi-

T t.e

te exemplo animos hominum informat, quam penicillo eorum corporeas effigies ad viuum exprimit. Et quamuis id nemini concedere iam pridem in animum induxeram, mihi que semper neglectui fuerat, tamen, ne aut tua causa noluisse me, aut fugisse molestiam putes, ipsum animum vincam, ut tua morem geram voluntati. Verum tamen, ne te amor, vel opinio fallat, praedico tibi, me litteratorum magis umbram, quam litteratum esse, nec unquam meruisse, ut inter clarorum Virorum Imagines, quas in ipso Museo habes, mea obscurior locum teneat. ad quam quidem quotiescunque oculos conuerteris, te rogo, ut non tantum os, vultumque meum, ac lineamenta corporis, sed simul etiam animi effigiem ad voluntatis tuae nutum promptissimi, paratissimi que te aspicere credas. Cumque viuere desinam, mei quadam miseratione permotus haec pauca ex intimo proferes. hic vere amicus amico, & si non litteratus, at litterarum, & litteratorum amantiissimus fuit. Vale. Genuae. ex Carbonaria XVI. Kal. Quinct. MDCXIX.

A GIO. BATTISTA CASTELLO
 Miniatore Eccellentissimo.

QUANDO fra me stesso considero (Carissimo Sign. Gio. Battista) quei valorosi huomini, che cosí ne i moderni tempi, come ne gli antichi, hanno la Patria nostra in varie maniere illustrata, giudico per certo, che voi col pennello le habbiate apportato tanto splendore, quanto altri habbia mai fatto con l'armi, e con le lettere. Impercioche fui sempre mai, e sono ancora di tal parere, che non l'ampie ricchezze, non i superbi edificij rendino chiare,

chiare, ed illustri le Città, ma si bene la virtù de' Cittadini, e gli egregj fatti loro, e che essi facciano glorioso, ed immortale il nome di quelle. Il che conoscendo esser vero la nobil Patria nostra, e che difficilmente ella potrebbe conseruarsi, se non castigasse i rei, e premiasse i buoni, essendo il castigo, & il premio come due Poli, intorno a' quali ella continuamente rauuolger si dee, è stata perciò mai sempre grata verso i virtuosi Cittadini, e seuerà verso i tristi: e così spero che ella vn giorno giudicherà altresì conuenirsi alla di lei gratitudine, che la virtù vostra sia con grandi honori come ella merita, remunerata. E ben vero, che voi altro honore non hauete mai desiderato, ne altro premio, che il felice testimonio della propria coscienza, il quale vi fa viuere in tal maniera, che senza mirare ad altro, ne alcuna fatica vi par dura, ne alcun tempo longo, nel quale con l'industria vostra possiate alla commune Patria qualche giouamento arrecare. Della quale essendo pure ancora voi natio, le sete tanto affettionato, che, hauendo in essa insieme con la dolce Famigliuola, e l'altre piu care cose tra noi, ogni vostra cura, e pensiero collocato, finalmente giudichereste non poter uoi meglio spendere la propria vita, che se per lei stessa la spendeste. ma veramente non sareste di cotal animo, se non foste acceso grandemente della pietà verso Dio, la quale è il fondamento di tutta la vita vostra; e se sopra esso non haueste fondato edificio così stabile, e fermo, che porge marauiglia a ciascheduno, che attentamente lo considera. Sin da piu teneri anni hauete sempre tenuto per costante, che si come l'huomo non può viuere senza l'anima, così l'anima non può uiuer senza Dio; e però a lui, il quale è fonte d'ogni bene, in ogni vo-

T 2 stra

*stra attione hauete in costume di ricorrere . e perche il
 vitio della ingratitudine troppo vi spiace, conoscete hauer
 da lui, e non d'altronde quello, che hauete ; onde vi rende-
 te degno di riceuere maggior aumento, & accrescimen-
 to di gratia di giorno, in giorno . per qual cagione adun-
 que essendo voi cotanto grato verso Dio de' beneficij già
 riceuuti, non doueranno la Patria, e gli altri, a quali voi
 apportate tanto utile, & honore con la virtù vostra, esser
 grati verso voi vicendeuolmente ? ed ecco che la nobilissi-
 ma arte della Miniatura, la quale ancor che per se stes-
 sa sia assai chiara ed illustre, voi nondimeno con le ri-
 guardeuoli opere vostre, di tanto splendore hauete orna-
 ta, & accresciuta, che se lo Miniare alluminar non si
 chiamasse, voi cotal nome gli haureste facilmente acqui-
 stato ; in ricompensa di ciò, ha si fattamente diuolgato il
 nome, e la fama vostra in ogni parte, che quanto viuerete,
 e doppo la morte ancora sarete da tutti con perpetua
 memoria conosciuto, & honorato . e ciò meritcuolmente .
 che tanto honore non vi potrà mai esser fatto, che rispon-
 da alla molta bellezza, e varietà delle opere vostre, &
 alla grande utilità, e diletto, che da quelle riccuono i ri-
 guardanti . io certamente non le vedo mai, che nel disio
 di riuederle piu non mi accenda, & all' amor del sommo
 bene maggiormente non m'infiammi . ne meno con bei
 discorsi, che con vaghi colori porgete diletto, & utile al-
 trui ; ne meno per quelli, che per questi sete degno di esser
 lodato, e commendato da tutti . La onde non mi marauig-
 lio punto che tante persone virtuose volentieri si ritrag-
 ghino nella vostra stanza, si per vedere le vostre bellissi-
 me Miniature, e si per godere la vostra parimente dilet-
 teuole, & utile conuersatione : per quelle vi ammirano,
 per*

per questa vi amano; con quelle ricreano piu l'animo, con questa alla virtù maggiormente l'accendono. perche hà gran forza la varietà de' colori, e delle inuentioni, e grande altresì la varietà de' dotti, e saui ragionamenti vostri. O quanto mi dispiace, che io non possa così spesso, come io vorrei, esser partecipe di cotal frutto, e diletto. mi sforzerò almeno con la miglior parte di me stesso, che è sempre con voi, di esserne priuo piu di rado, che fie possibile. Non sete solito di dipingere, come alcuni altri fanno cose lasciue, e bellezze terrene, dalle quali allettate, & ingannate le misere anime, non altrimenti che gli uccelli dalle reti, e i pesci da gli hami, si conducono a mortal pericolo: ma opre spiritali, e di diuotione, le quali destano le anime addormentate in questi beni temporali, a' beni eterni, che sono i maggiori beni, che desiderar possiamo. E che sono altro quei tali, se non alberi infruttuosi, e sterili, i quali occupando la terra vanamente vorrebbero togliere il luogo a' fruttiferi, e buoni a voi all'incontro a guisa di fruttifera pianta siete sempre di fiori, e frutti santi ripieno, i quali per variar di stagione non perdono mai la bellezza loro. Et essendoui dato con ogni studio, e sollecitudine a così nobil arte, & hauendola ridotta a quella maggior perfettione, che si possa desiderare, date ad intendere altrui, che se haueste impiegato l'animo in qual si voglia altra impresa, ei sareste altresì riuscito felicemente. non è marauiglia adunque se, i maggiori Rè, e Principi del Mondo desiderano di hauere le vostre bellissime Miniature per ornamento delle loro reali Camere, accioche mentre dimorano in esse, spediti dalle cose terrene possino piu facilmente contemplar le celesti, e nutrire, e pascere l'animo di così soaue, e nobil cibo.

cibo . non hanno chi ponga loro innanzi così viuacemente
 come fate voi, i Sacri misteri della fede , non essendo al-
 cuno a questi tempi, il quale pur da lunge vi seguiti, non
 che vi raggiunga , o vi s'appressi . E qual piu famoso sia
 stato in questa arte per li tempi a dietro , se hora viuen-
 do , e mirando l'opere sue , egli forse si riputasse perfetto,
 mirando nelle vostre poi , come in un chiaro specchio di-
 scernerebbe quanto egli fosse dalla perfettione lontano . se-
 te vero imitatore di quello , che hà fatto quel sommo ar-
 tefice Iddio , dalle cui mani tutte le cose , delle quali è or-
 nato il Mondo , uscirono perfettissime . qual cosa può far
 la natura , che voi col pennello non la rappresentiate a
 gli occhi altrui ageuolmente ? quando ella è mai stata piu
 feconda in generar le cose , che voi copioso in dipingerle ? i
 turbati muouimenti dell'animo , gli stessi pensieri occulti
 nel cuore , ci fate vedere chiari , & aperti . ma se in alcu-
 na cosa imitate il sopremo facitore , nel dipingere la sua
 Santissima Madre , ciò fate diuinamente . Spira , parla ,
 si muoue , ò se ella posta in ginocchione adora il suo dolci-
 ssimo Figliuolo , ò se recatolosi in braccio affettuosamente
 lo strigne , ò se leuata si ardentemente nell'amor di esso
 tutta si infiamma . O quante volte da marauiglia , e da
 dolcezza astratto ho detto fra me stesso . se il finto è così
 bello , il vero che sarà ? beati gli occhi , che la videro vi-
 ua , & hora a faccia , a faccia la vedono in Cielo . Della
 qual beatitudine voi di già hauete caparra in questa vi-
 ta , per douer poi goderla appieno nell'altra . poi che vi-
 uete in tal maniera , che non solamente non è chi di fuori
 in detto , ò in fatto possa accusarui , ma ne anco hauete la
 propria coscienza per vostra accusatrice dentro a voi me-
 desimo . & in questi tempi d'hora , che i vitij regnano , e
 le

le virtù son poste in bando, ne gli errori, e tenebre del peccato, ritenere la purità, e chiarezza dell'innocentia, è di perfetta virtù certissimo argomento. l'imitatione della quale, e di voi stesso similmente sarà il maggior Patrimonio, e la più ampia heredità, che possiate giamai lasciare a' vostri figliuoli. se ben della prosperità, e buono stato, che ad essi lascierete, haueranno cagione di lodarne, e ringratiarne Dio infinitamente. e già eglino per le vestigia vostre corrono alla gloria sì velocemente, che poco sono lontani ad auuicinarlesi, & apprenderla. Così potes' io auuicinarmi al segno delle lodi vostre, & agguagliar con la penna quello, che il desiderio pareggia. Ma se ciò io non haurò potuto conseguire, si almeno haurò conseguito, che, si come voi sete certissimo, & io consapeuole a me stesso dell'amor grande, che vi porto, così quei, che verranno doppo noi, conosceranno l'amicitia nostra essere stata al pari di qual si uoglia altra uera, stabile, e fedele. State sano. Di Carbonara alli. XXVI. di Genaro. MDCXV.

F I N I S.



GENVAE,
EX TYPOGRAPHIA PAVONIANA,
MDCXIX.
SUPERIORVM PERMISSV.


153


C. K.

1.7.116


1.7.116


2











005644603

